

## Chijnie ndo Jesús chronga ndo Mateo

*Sen kuachrjenixin ndo Jesús  
(Lc. 3:23-38)*

<sup>1</sup> Ji i sen kuachrjenixin ndo Jesucristo. Je e ndo kuachrjenixin ndo, ndo David ko ndo Abraham.

<sup>2</sup> Ndo Abraham ikjui ndotée ndo Isaac ko ndo Isaac ikjui ndotée ndo Jacob ko je e ndo ikjui ndotée ndo Judá ko sen kichuu ndo.

<sup>3</sup> Ko ndo Judá ikjui ndotée ndo Fares ko ndo Zara ko janée sen ikjui jan Tamar. Ndo Fares ikjui ndotée ndo Esrom ko je e ndo Esrom ndotée ndo Aram.

<sup>4</sup> Ndo Aram ikjui ndotée ndo Aminadab ko je e ndo ndotée ndo Naasón ko ndo Naasón ikjui ndotée ndo Salmón.

<sup>5</sup> Ndo Salmón ikjui ndo ndotée ndo Booz ko janée ndo jan Rahab.

Ndo Booz ikjui ndotée ndo Obed ko janée ndo Obed jan Rut.

Ndo Obed ikjui ndo ndotée ndo Isaí.

<sup>6</sup> Ko ndo Rey David, chjen en ndo Isaí, ko jan Betsabé, jan ikjui janchri e ndo Urías, ko ndo Rey David, me e sen ikjui ndotée ko janée ndo Salomón.

<sup>7</sup> Ko ndo Salomón ikjui ndotée ndo Roboam ko je e ndo ndotée ndo Abías ko je e ndo Abías ikjui ndotée ndo Asa.

<sup>8</sup> Ndo Asa ikjui ndotée ndo Josafat

ko ndo Josafat ikjui ndotée ndo Joram  
ko ndo Joram ikjui ndotée ndo Uzías.

<sup>9</sup> Ko ndo Uzías ikjui ndotée ndo Jotam  
ko ndo Jotam ikjui ndotée ndo Acaz  
ko ndo Acaz ndotée ndo Ezequías.

<sup>10</sup> Ndo Ezequías ikjui ndotée ndo Manasés  
ko ndo Manasés ikjui ndotée ndo Amón  
ko ndo Amón ikjui ndotée ndo Josías.

<sup>11</sup> Ko ndo Josías ikjui ndotée ndo Jeconías ko kain  
xjan kichuu ndo.

Sen bake e nchakon sabikao na sen israelita  
tjajna Babilonia, bikao na sen xranchi sen itji  
ndo achjiso ko nti a juinchenche e na sen ixra  
ko juenge a na sen na.

<sup>12</sup> Juexinja ti bije e na sen nti a tjajna me e,  
tjume e ndo Jeconías ikjui ndotée ndo Salatiel  
ko ndo Salatiel ikjui ndotée ndo Zorobabel.

<sup>13</sup> Ko ndo Zorobabel ikjui ndotée ndo Abiud  
ko ndo Abiud ikjui ndotée ndo Eliaquim  
ko ndo Eliaquim ikjui ndotée ndo Azor.

<sup>14</sup> Ko ndo Azor ikjui ndotée ndo Sadoc  
ko ndo Sadoc ikjui ndotée ndo Aquim  
ko ndo Aquim ikjui ndotée ndo Eliud.

<sup>15</sup> Ko ndo Eliud ikjui ndotée ndo Eleazar  
ko ndo Eleazar ikjui ndotée ndo Matán  
ko ndo Matán ikjui ndotée ndo Jacob.

<sup>16</sup> Ko ndo Jacob ndotée ndo José  
ko ndo José ndoxi e jan María  
ko je e jan María janée ndo Jesús,  
ndo Jesús, ndo nchekin in sen Cristo.

<sup>17</sup> Itenoó sen xranchrjen kuachrjenixin ndo  
Abraham ko tjume e konoxin ndo David ko kaxon

itenoó sen kuachrjenixin ndo David, ko tjume e ni tjajna Babilonia sabikao na sen israelita tjajné na ko tjume e íjngo itenoó sen jongí e, tjume e jongí e ndo Cristo.

*Xranchi jongí e ndo Jesucristo*

*(Lc. 2:1-7)*

<sup>18</sup> \*Ja in jongí e ndo Jesucristo: Jan María, jan xrokjui janée ndo Jesús, ó tsijanchia ndo José jan. Ko xratintekao a kichuu sen, ó jiyá jan ichjan ixi juachaxien Espíritue ndo Dio.

<sup>19</sup> Ndo José, ndo tsoña ndoxi e jan María, je e ndo naa xi tsango jian, méxin, imao tjaun ndo xrokuintu e ndo jan ixi tjaun a ndo xrokono e chujni.

<sup>20</sup> Ko ó tsixraxaon ndo jaña, nchakon naa ndo ángel ne e Ncháina tsikonoxin en ndo ngaya kotáchrién ndo ko ja in nichja ndo ángel:

—José, ja a ti kuachrjenixian ndo David, xrakon a ixi tsaye é jan María xranchi janchri a ixi ichjan xrochóna jan, xjan me e ixi juachaxien Espíritue ndo Dio tsjongíexin xjan.

<sup>21</sup> \*Ko jan María sinchejongí e jan naa xjan xi ko sincheki ian xjan Jesús; jaña tsin in xjan ixi je e xjan tsantsje xjan ijie chóna chujni.

<sup>22</sup> Kain ji i kon en ixi jaña tsichronga ndo Dio ngajin sen kuanichja chijnie Ndo ó sa ó. Ja in tsindachro ndo:

<sup>23</sup> Naa nchrichajan tseyá nchrichan ichjan, ko xrochóna nchrichan naa ichjan, ko je e xjan ndatsin in xjan Emanuel. Ji i xrondachro: ndo Dio steku una ndo.

24 Hora xingame e ndo José kuitikaon ndo nge e ti ndachro ndo ángel ne e Ncháina\* Dio ko kuayé e ndo jan María xranchi janchri e ndo.

25 \*Xra kuintejuakao a kichuu sen, je e jan juinchejongí e jan naa ichjan ko ndo José juinchekin in ndo xjan Jesús.

## 2

### *Sen nchekuanxin nchanotsé kuitsje e xa xjan Jesús*

1 Tjajna Belén tikinixin en Judea, nti a jongíexin ndo Jesús. Nchakon me e bake e naa xi rey bakin in Herodes, xi me e bakituan an nti a. Nchakon me e kuii kaxin sen tsango no e nchekuanxin nchanotsé. Sen me e kuixin sen ndatsjonxin chjuya.

2 Ko juanchangi sen:

—¿Ti no jii xjan tsijongí e xjan rey tsetuen en ni judío? Ixi bikona nchanotsée xjan ndatsjonxin chjuya, ko jui ina ixi tsajonna juasaya\* ngajin xjan.

3 Ko xi rey Herodes kuin en xa me e, juinche a xa juaxruxin ko kaxon kain ni tjajna Jerusalén.

4 Tjume e xi rey Herodes kuiye e xa sen taana ícha tetuan an ko kain ni tjako ley, ko juanchangi e xa na ixi no xrojongíexin ndo Cristo.

5 Je e na juatingíexin na:

—Je e xjan tsjongíexin xjan tjajna Belén tikinixin en Judea, jaña tsikjin sen kuanichjaxin chijnie ndo Dio ó sa ó:

\* **1:24 Ncháina** Señor, *Ncháina Jesús o Ncháina Dio* **1:25** Lc. 2:21.

\* **2:2 juasaya** respeto, honor

<sup>6</sup> Ja a tjanya Belén nunte e Judá,  
 á je a ja a naa tjanya ícha nchíín  
 ngakjen en ikaxin tjanya ícha ijié,  
 ko nti i tsachrxexin naa ngisen ícha tsetuan an, ko  
 je e ndo tsayakon en ndo tjanána Israel.

<sup>7</sup> Tjume e xi Herodes imao kuiye e xa sen  
 nchekuanxin nchanotsé ko juanchangi xa ngisa  
 konoxin nchanotsé.

<sup>8</sup> Ko tjume e ndachro xa:

—Itjinta Belén, nti a tjanchangínta ixi ichjan  
 me e, ko ti no tsinchíínta xjan, nchenónanta ixi  
 jan an kaxon itsji ngajin xjan tsajon juasaya.

<sup>9</sup> Ko sen nchekuanxin nchanotsé kuin en sen  
 nge e ichro xi rey ko sakuíntekji sen ko nchan-  
 otsé bikon sen me e kuitao en sen nti a ko tjume e  
 kuíxin nchanotsé ngata a ti no jii je e xjan.

<sup>10</sup> Ko sen nchekuanxin nchanotsé tsango ché e  
 sen ixi bikon sen no bake e nchanotsé.

<sup>11</sup> Ko hora kuixin in sen nchia ko bikon sen  
 xjan jikao xjan jan María, janée xjan, bake exin  
 ntatuchi in sen, kuajon sen juasaya ngajin xjan ko  
 kuantje e sen ntábaúl tsikika o sen ko kuajon sen  
 chika oro ko tsjo xraxe ko xroan mirra.

<sup>12</sup> Ko tjume e koxienxin sen ixi íxrokjan i sen ti jii  
 xi Rey Herodes. Méxin, kua sen inaa cha o, sakjui  
 sen tjanée sen.

### *Sabinga sen tjanya Egipto*

<sup>13</sup> Ko nchakon sakuíntekji sen nchekuanxin  
 nchanotsé, tjume e naa ndo ángel ne e Ncháina  
 konoxin ngaya kotáchrién ndo José ko ndachro  
 ndo ángel:

—Tingatjen, satiko a ichjan ko janée xjan,  
 satjinta tjanya Egipto. Ko nti a tinteenta ti

xrondachrjanjan jan an, ixi xi Herodes tjaun xa tsen en xjan.

<sup>14</sup> Tjume e ndo José kuaya ndo ko sabikao ndo ichjan ko janée xjan, tiie me e kua sen cha o sakjui sen tjajna Egipto.

<sup>15</sup> Nti a bake e sen, kuenjan xi Herodes. Jaña kon en ixi jaña tsichronga sen kuanichjaxin ndo Dio: “Tjajna Egipto bake e chjan na ko jan an kuiya a xjan.”

*Xi Herodes kuetuan an xa ixi tsen en ichjan*

<sup>16</sup> Hora kono e xi rey Herodes ixi sen nchekuanxin nchanotsé íkjan i sen xranchi kuetuen en xa sen, me e xi Herodes tsango koñaao xa ko kuetuan an xa ixi tsen en kain xjan xi, xjan xrachónda i yuu nano ste tjajna Belén ko xjan ste ngande e tjajna kaxon. Jaña kuetuan an xa ixi jixraxaon xa nge e ndachro sen nchekuanxin nchanotsé.

<sup>17</sup> Ja in kon en ixi ti tsikjin ndo Jeremías, ndo kuanichja chijnie Dio, nchakon tsindachro ndo:

<sup>18</sup> Ja in kuin en chujni tée naa sen nichjaxin tjajna

Ramá,

tsango kuyako sen ko tsango tsjanga sen.

Me e nchri Raquel jitsjangaxin chjen en nchra.

Ko tjaun a nchra ixi xrojan ngisen sinchecháxin nchra ixi ó tsikinteken en chjen en nchra.

Jaña jitaxin xroon.

*Kjanxin sen tjajna Egipto*

<sup>19</sup> Nti a kuintee sen tjajna Egipto kuenjan xi Herodes ko naa ndo ángel ne e Ncháina konoxin ndo ngajin ndo José गया kotáchrién ndo ko ja in ndachro ndo:

20 —Tingatjen ko satiko a ichjan ko janée xjan, ikjannta tjajna Israel ixi ó ndakuen en ni tjaun xrokóña xjan.

21 Ko tjume e ndo José kuaya ndo ko sabikao ndo xjan ko janée xjan tjajna Israel.

22 Ko kono e ndo José ixi xi Arquelao, chjen en xi Herodes, tetuan an xa nunte Judea, ti baketuan an ndotée xa, xronka ndo José ixi xrokjui ndo nti a. Ko ixi tsichronga ndo Dio ixi kotachrin, méxin sakjui sen nunte tikinixin en Galilea.

23 \*Ko tjajna ndatin in Nazaret, nti a kuintee sen. Jaña kon en ixi jaña tsichronga sen kuanich-jaxin ndo Dio ó sa ó ko tsindachro sen ixi ndo Jesús xrojuinchekin in na ndo nazareno.

### 3

*Ndo Juan Bautista nichja ndo chijnie ndo Dio  
(Mr. 1:1-8; Lc. 3:1-9, 15-17; Jn. 1:19-28)*

1 Nchakon me e ndo Juan Bautista kuiji ndo ti jii ijna nchese nunte Judea, nti a nichja ndo chijnie ndo Dio

2 \*ko ja in nichja ndo:

—Ikjan titikaonnta ndo Dio ixi ó tuinxin tsonoxin juachaxien ndo.

3 Ndo Juan, me e ndo tsindachro ndo Isaías:  
Tée naa sen tuyako ti jii ijna:

“Nchekonchjiannta cha o tsi x̄in Ncháina  
ko nchenataoxinnta cha o.”

4 Ko manta jitsáa ndo Juan Bautista tsikonchjianxin chjuen kucamello ko naa tjuá

jingatoxin ndo. Ko ti bajine ndo jeoxón kuxru a ko tsjeen kunoa, kuntajie.

<sup>5</sup> Ko bakiji chujni Jerusalén ko ni Judea ko kueya chujni tjajna ste ngande e inda Jordán ko baki en na ti kuandachro ndo.

<sup>6</sup> Ko kuachronga na ti ndako a juinche e na ngajin ndo Dio ko tjume e ndo Juan bikitée ndo na ti jii ndajitinga ndatin in Jordán.

<sup>7</sup> \*Ko bikon ndo Juan ixi kueya xi fariseo ko xi saduceo kuiji xa ixi tjaun na tsikitée xa kaxon, méxin, ndachro ndo:

—Ja anta tsikachrjenixinnta kunchee, ¿ngisen ntatjunta satsinge enta juañaue ndo Dio ti ó tuxin tsii?

<sup>8</sup> Xrokonda ixi nduaxin tsjakonta ixi ó ti jian rinche enta ko titikaonnta Ncháina.\*

<sup>9</sup> \*Ko xrondachro anta ixi kuachrjenixinnta ndo Abraham ko jaña sinchejiénta asáanta ixi jan an ntatjunta ixi ixro ji i chao ndo Dio sinchéña ndo chujni tsachrjenixin ndo Abraham.

<sup>10</sup> \*Ko jacha ó jichón en jacha xrochrijinxin nue e ntayua ixi kain ntaa tajon a itu jian xrokonda xrochrijin ntaa ko xroche ntaa.

<sup>11</sup> Ko nduaxin tjakonta ixi juincheni anta ti ndako a juinche enta ko jan an inda bikitéexinta. Ko ícha tjume e tsii inaa ndo ícha tetuan an, ko jan an tikinixinna i tsiki an katée ndo, ko je e ndo tsikitéxinnta ndo Espíritue ndo Dio ko xro i.

<sup>12</sup> Ko je e ndo ó jitika o ndo kachrintue ndo tsjenduaxin ndo noatrigo ko tsinchexin ndo no ti

---

**3:7** Mt. 12:34; 23:33. \* **3:8** *Ncháina* Señor *Ncháina* *Jesús o Ncháina*  
**Dio** **3:9** Jn. 8:33. **3:10** Mt. 7:19.



xineno ko tsake e ndo noa ti jii ntane to ko xineno tsjaaka ndo xineno, ko xro i me e nai a tsanga xro i.

*Xranchi bikitée ndo Jesús*

*(Mr. 1:9-11; Lc. 3:21-22)*

<sup>13</sup> Ndo Jesús kuixin ndo nunte Galilea ko kuiji ndo ti jii ndajitinga ndatin in Jordán ti jii ndo Juan Bautista ixi tsikitée ndo Jesús.

<sup>14</sup> Ko ndo Juan tjaun a ndo tsikitée ndo ndo Jesús ko ja in ndachro ndo:

—Xrokonda ja anta tsikiténinta jan an, ko ja anta tji inta ngajin ixi jan an tsikitéenta.

<sup>15</sup> Ko ndo Jesús juatingíexin ndo:

—Jaña xrokonda sinche ena jai, ixi jaña tsitikaonna kain ti kuetuan an ndo Dio.

Me e ndo Juan kuitikaon ndo.

<sup>16</sup> Ko ndo Jesús bikitée ndo, tuinxin xenduaxin ndo inda ko me e xitje e ngajní† ko bikon ndo Espíritue ndo Dio xingajin xranchi naa kuntúá ko bake e ngata a ndo.

<sup>17</sup> \*Ko tuinxin kuin enni naa téé séen kuixin ngajní ko ndachro:

—Ji in chjan na tsango tjua a ko juaxruxin ritjén ngajin xjan.

## 4

*Xixron anxrée tjaun xa tsakaon xa ndo Jesús*

*(Mr. 1:12-13; Lc. 4:1-13)*

<sup>1</sup> \*Tjume e Espíritue ndo Dio bikao ndo Jesús ngata a ijna nchese ko nti a Xixron anxrée tjaun xa tsakaon xa ndo Jesús.

† **3:16 ngajní** cielo **3:17** Mt. 12:18; 17:5; Mr. 1:11; Lc. 9:35. **4:1** He. 2:18; 4:15.

<sup>2</sup> Bake e ndo ijna, ko yuukan nchakon ko tiie juinchekatse ñao ndo jinta, méxin kuen en ndo jinta.

<sup>3</sup> Ko Xixron anxrée konchjiñe e xa ti jii ndo Jesús ixi tjaun xa tsakaon xa ndo, méxin ndachro xa:

—Siá nduaxin ja a Chjen en ndo Dio, ndache ixro me e xrokjan xro nutja.

<sup>4</sup> Ko je e ndo juatingíexin ndo:

—Jitaxin xroon chijnie ndo Dio: “Je a je o nutja tsechónxin chujni. Kaxon kain chijnie ndo Dio, me e tsechónxin chujni.”

<sup>5</sup> Tjume e Xixron anxrée bikao xa ndo Jesús tjajna tsango tjúá, tjajna Jerusalén, ko juinchengajin in xa ndo ti ícha nui ngata a ni ngo,

<sup>6</sup> ko ndachro xa:

—Siá nduaxin ja a Chjen en ndo Dio, chrinka ti nunte ixi jitaxin xroon chijnie ndo Dio:

Je e ndo tsetuen en ndo sen ángel tikinixin en ndo ixi xrotsengia sen

ixi tsontengíxin a tutáa ixro.

<sup>7</sup> Ko je e ndo Jesús juatingíexin ndo:

—Kaxon ndachro chijnie ndo Dio: “Tsaké a naa nge e ixi tsikuan á chao sinche e ndo Dio.”

<sup>8</sup> Ko íjngo nchakon bikao xa ndo Jesús ngata a ijna ícha noi ko juako e xa ndo kain tjajna jii ngata a nunte xasintajni\* ko kain nge e ti tjintee chóna na.

<sup>9</sup> Ko ndachro Xixron anxrée:

—Kain jii xrotjá a siá ja a tsake exian ntatuchi ian ko xrochjánana juasiaa.

<sup>10</sup> Tjume e je e ndo Jesús ndachro ndo:

---

\* **4:8 xasintajni** mundo

—Satjia ja a Xixron anxrée, ixi ndachro xroon chijnie ndo Dio: “Je o Ncháa ndo Dio xrokonda xrochje é ndo juasaya ko je o ngajin je e ndo tsitikaoan.”

<sup>11</sup> Ko Xixron anxrée ngaxiton xa ko tjume e kuij kaxin sen ángel ngajin ndo Jesús ko kuayakon en sen ndo.

*Ndo Jesús juangíxin ndo xrée ndo nunte Galilea  
(Mr. 1:14-15; Lc. 4:14-15)*

<sup>12</sup> \*Nchakon ndo Jesús kuin en ndo ixi ndo Juan xraxin in na ndo ndo achjiso, je e ndo ikjan ndo nunte Galilea.

<sup>13</sup> \*Ko kuitue a ndo tjajna Nazaret; sakjui ndo tjajna Capernaum, tjajna me e jii ngande e ndachaon tjenka nunte Zabulón ko Neftalí.

<sup>14</sup> Ja in kon en xranchi ti tsikjin ndo Isaías chijnie ndo Dio. Ja in tsindachro ndo:

<sup>15</sup> Nunte Zabulón ko nunte Neftalí ti jii cha o ngande e ndachaon tuenxin ndajitinga ndatin in Jordán,

nunte Galilea ti ste ni chúxin a ndo Dio.

<sup>16</sup> Chujni tjajna ste naxixe e bikon na ijié xro i, ko ni ste ti jii tsa on ne e xichononte,† xro i bingasáñe e na.

<sup>17</sup> \*Ko nchakon me e kuaxi juako ndo Jesús ko kuandachro ndo:

—Tintu enta ti ndako a kuanche enta ixi juachaxien ndo Dio jii ngajni ó tjenkanta jii.

*Ndo Jesús kuiye e ndo noó sen kuatse kuchee ti jii ndachaon  
(Mr. 1:16-20; Lc. 5:1-11)*

---

**4:12** Mt. 14:3; Mr. 6:17; Lc. 3:19, 20.    **4:13** Jn. 2:12.    † **4:16** *xichononte* muerte    **4:17** Mt. 3:2.

<sup>18</sup> Ndo Jesús jitatsinga ndo ngande e ndachaon ndatin in Galilea, nti a bikon ndo yuu sen, sen me e kichuu sen, naa ndo ndatin in Simón ko kuanche kin in nã ndo Pedro, ko ndo kichuu ndo ndatin in ndo Andrés. Je e sen stetánka sen nocha a ngangí inda, ko kuansengi sen kucheē x̄i je e sen ixrã me e kuanche e sen.

<sup>19</sup> Ko ndo Jesús ndache ndo sen:

—Xrokuiinta rua naninta ko jan an sintakuan annta xronichje enta chujni me e tsitikaon nã najan an, ko xrokjui xranchi xrotsénta kucheē.

<sup>20</sup> Ko tuinxin kuintu e sen nocha a ko rué e sen ndo.

<sup>21</sup> Ko kuiji ndo Jesús ícha ndá a bikon ndo íjngo yuu sen, ko sen me e kaxon kichuu sen, naa ndo ndatin in Jacob ko inaa ndo ndatin in Juan, yui sen chjen en ndo Zebedeo ko yui sen stekao sen ndotée sen ngaxin in ntábarco x̄i stetjaun sen nocha a tséxin sen kucheē. Tjume e ndo Jesús kuiye e ndo sen.

<sup>22</sup> Ko je e sen tuinxin kuintu e sen ntábarco ko kuintu e sen ndotée sen ko rué e sen ndo Jesús.

*Ndo Jesús nchekuen en ndo kueya chujni  
(Lc. 6:17-19)*

<sup>23</sup> \*Ndo Jesús kuaji ndo nchijí nunte Galilea ko banchekuen en ndo chujni ngaxin in ningue ni israelita ngujngu tjajna ti bakiji ndo ko kuanchekuen en ndo nã chijni natjúá ti tetuan an ndo Dio ko kuanchexruen en ndo kain ichin ko kain ti tíin nã.

<sup>24</sup> Ko kain ti ixra jian kuanche e ndo, me e kono e ni ste nunte Siria ko bika o na kain ni kuachón<sup>da</sup> ngixe i ichin ko ni chón<sup>da</sup> espíritue Xixron anxrée, ni bakendáa, ko ni jua i itji, ko ndo Jesús juinchexruen en ndo na.

<sup>25</sup> Ko kueya chujni kuarue e na ndo Jesús, ni nunte Galilea ko ni tjajna Decápolis ko ni tjajna Jerusalén ko nunte Judea ko ni kuixin tuenxin ndajitinga ndatin in Jordán.

## 5

### *Ndo Jesús nichja ndo ngata a ijna*

<sup>1</sup> Ndo Jesús bikon ndo ixi xejo kueya chujni, me e kuajin in ndo ngata a ijna ko nti a bake e ndo nunte. Ko kaxon sen teyuu kuarue e ndo, konchjiñe e sen ngajin ndo.

<sup>2</sup> Tjume e ndo Jesús kuaxi nichja ndo ko ja in ndachro ndo:

### *Sen chaxro tsake e (Lc. 6:20-23)*

<sup>3</sup> —Juaxruxin tsake e sen xraxaon ixi nduaxin xrokonde e sen ndo Dio ixi sen me e tsayé e sen juachaxin tsintee sen ti tetuan an ndo Dio.

<sup>4</sup> 'Juaxruxin tsake e kain sen stechíin ixi xrojan nge e ti ndako a kon en sen, ko je e ndo Dio tsajon ndo juachaxin ixi juaxruxin tsintee sen.

<sup>5</sup> 'Juaxruxin tsake e sen nchejié a aséen ixi je e sen tsayé e sen nunte ti ó ndachro ndo Dio tsajon ndo.

<sup>6</sup> 'Juaxruxin tsake e kain sen tjaun xranchi xrojuine o xrokui i chijnie ndo Dio ixi je e ndo Dio tsajon ndo ti jian ngaya aséen sen.

7' Juaxruxin tsake e sen tingijna sen kichuu, jaña ndo Dio kaxon tsikonóe e ndo sen.

8' Juaxruxin tsake e sen kuitikaon ko juinchetjúá aséen ixi je e sen nduaxin tsikon sen ndo Dio.

9' Juaxruxin tsake e kain sen stetingijna ixi tsinteketō a chujni ko ndo Dio sinchekin in ndo sen chjen en ndo.

10' \*Juaxruxin tsake e sen chinga nchekao na ixi titikaon sen nge e tjaun ndo Dio, me e je e sen tikinixin en sen ngajní ti tetuan an ndo Dio.

11' \*Juaxruxin take é ja anta ti chinga tuyaku anta na ko ningakon annta na ko tjangi anta na ixi kondanaxin jan an.

12' \*Chá anta ko juaxruxin take énta ixi ja anta tsaye enta naa nge e ícha jian jii ngajní. Ixi jaña juinчекao na sen sa ó, sen kuanichja chijnie ndo Dio.

*Ja anta xranchi xíjnta, ko xranchi xro i tingasáña  
(Mr. 9:50; Lc. 14:34-35)*

13' \*Xranchi xíjnte e nunte xasintajni me e ja anta, ko siá xíjnta ijní a xíjnta, ¿xranchi tsojnínin xíjnta íjngo?, ko jaña íxro an tsonda xíjnta, tsintji xíjnta, ko tsingatjangi na xíjnta.

14' \*Xro i tingasáñaxin nunte xasintajni me e ja anta. Naa tjajna jii ngata a naa ijna jua i tsemá tjajna.

15' \*Xro an ngisen sinchekakiin naa xro i ko tsake e sen xro i ngangí naa chikute. Na i, xro i

take e xro i noi ngata a naa ntaa ixi sinchengasáña xro i kain chujni ste nchia.

<sup>16</sup> \*Jaña ja anta kaxon nchengasáñe enta kain chujni jii ngandajinnta, me e tsikon chujni ti jian nche enta, jaña je e na tsajon na juasaya ngajin Ndotáina jii ngajní.

*Ndo Jesús tjako ndo ley kuetuan an Ncháina*

<sup>17</sup> 'Ja anta xraxaon anta ixi jan an jui i ixi sintama a ley kuajon ndo Moisés ko ti nge e ndachro ikaxin sen nichja chijnie ndo Dio. Na i. Jan an jui i ixi tsitika on kain ti kuetuan an ndo Dio ko sintakuan annta nge e xrondachro chijni me e.

<sup>18</sup> \*Ko nduaxin xrontatjunta ixi xratsatsinga i ngajní ko nunte xasintajni, xro an ley kuetuan an ndo Dio tsomé e, ko ní naa letra tsachrjende a. Na i, kain ti ndachro chijni, me e xrokonda tson en.

<sup>19</sup> Ko ngisen tsitikaon a ko sinche a ti ndachro ley kuetuan an ndo Dio, maski naa ley nchíin tsitikaon a sen, ko jaña sinchekuen en sen chujni, kaxon nchion juasie ndo Dio tsayé e sen ti jii ngajní tetuan an ndo Dio. Ko siá ndako tsitikaon sen ley kuetuan an ndo Dio ko jaña sinchekuen en sen chujni, ijié juasie ndo Dio tsayé e sen nti a ti jitetuan an ndo Dio,

<sup>20</sup> Méxin, jan an ntatjunta xrokonda tsango jian tsitikaonnta ndo Dio ícha ixi ni fariseo ko ni tjako ley kuetuan an ndo Dio, ko siá sinche anta ícha jian jua i tsixin innta ti tetuan an ndo Dio.

*Ndo Jesús juako ndo kondee juañaao  
(Lc. 12:57-59)*

21 'Ja anta ó kuin ennta ti kuituen en sen sa ó: "Jua í naatsóñaxónnta ni kichuunta, ixi ngisen sinche e jaña tsitsingata a sen ijie."

22 Ko jan an ndachrjan siá xrojan ngisen xraningakon en sen sen kichuu, sen me e tsitsingata a sen ijie. Ko ngisen tsenge e kichuu teka, sen me e, ni tetuan an tsjankata a na sen ijie. Ko ngisen xronache sen kichuu ixi tsinchetjáña jaa sen, sen ndachro me e satsji sen ngangí xro i kain nchakon.

23 Méxin siá tsiku unta naa nge e tsajonxinnta juasianta ngajin ndo Dio ngaxin in ni ngo ko nti a xroxraonnta ixi xrojan sen kichuunta toña o anta sen,

24 nti ao tintu enta nge e ritikuunta ngata a altar, ko itjinta, tjaunnta sen ko tjanche enta sen juatitjáña kondeexin nge e kuetonta. Tjume e ikjannta ko tájonnta ti bikuunta ngajin ndo Dio.

25 'Siá xrojan ngisen kuichro ijie kontraanta, cháña tuinxin tjaunnta sen ko nchekonchjiannta ti stetoñaoxinnta ixi xraya onta cha o, ko xratjaso anta ti jii xi nchéña ijie ba tsituan an xa xi policia xroxraxonnta xa ndo achjiso.

26 Ko nduaxin ntatjunta ixi tsachrjexin anta ndo achjiso tsjengajanta na kain ti tasinkanta.

*Ndo Jesús juako ndo ijie tama ni chóna inaa nchri o inaa xi*

27 'Ja anta kuin ennta chijni tsikitue en sen sa ó ja in ndachro: "Chonda inta inaa nchri, nchri je a nchrinchri anta o je a xixi anta."



28 Ko jan an ndachrjan ngixe i naa xi xrotsje e xa inaa nchri ko tsingakuenxin xa nchra, me e ó juinche e xa ti ndako a ngaya aséen xa.

29 \*'Méxin siá ikuan ndatsjonxin jian sintekateya ixi sinche e ti ndako a, cháña tantsjengia ko ndá a tjanka, ixi cháña tsitjáña tu o cuerpoa ko je a tsitjáña nchijí ja a ti jii xro i nai a tsanga.

30 \*Ko siá tjáa ndatsjonxin jian sintekateya ixi sinche e ti ndako a, cháña tonchrijian tjáa ko ndá a tjanka ixi cháña tsitjáña tu o cuerpoa ko je a tsitjáña nchijí ja a ti jii xro i nai a tsanga.

*Ndo Jesús ko sen tsikute e*

*(Mt. 19:9; Mr. 10:11-12; Lc. 16:18)*

31 \*'Kaxon kuituen en sen sa ó ixi ngisen ítjaun a janchri e, chao tsonchjian naa xroon tsintuexin kichuu sen.

32 \*Ko jan an ndachrjan ixi ngixe i xi ítjaun a nchrinchri e xa, ko tjaun xa tsintu e xa nchra, chao, je o siá nchrinchri e xa juincheye e nchra xa ixi inaa xi. Siá na i, me e je e xa xranchi xro-juinchekateya xa nchra sinche e nchra ti ndako a. Ko xi tsute e naa nchri, nchri tsikintu e xixi e, xi me e tsama xa ijię kaxon, xranchi naa xi kue-juakao inaa nchri.

*Ndo Jesús juako ndo ixi jua i sincheyani ixi je e ndo*

33 'Kaxon tsikin ennta ti kuetuen en sen sa ó: "Take anta ndo Dio xranchi nduaxin xrojuinche enta ti ndachronta ko nche anta;

ja anta xrokonda sinche enta ti tsindachronta ngajin Ncháina.”

<sup>34</sup> \*Ko jan an ndachrjan ixi jua i tsakéenta ndo Dio ko nche anta ti ndachronta o ngixe i naa nge e ti jii ngajní ixi ngajní me e ntaxitueen ndo Dio, ti tetuanxin ndo.

<sup>35</sup> Ko kaxon jua i tsakéenta nunte xasintajni ko nduaxin a sinche enta ixi ngata a nunte nti i take e tutée ndo Dio, ko jua i xronichjxinnta ixi tjajna Jerusalén ixi tjajna me e tjajnéé ndo Dio, ndo Rey tsango tetuan an.

<sup>36</sup> Ko kaxon jua i tsakéexinnta jáanta ko nduaxin a sinche enta ti ndachronta, ixi ja anta chonda inta juachaxin xrondachronta ixi naa xrajaanta tsontjúá xra o tsontie xra.

<sup>37</sup> Méxin nchakon xrondachronta jaán, jaán tson en, o siá xrondachronta na i, na i tson en ixi kain ti ícha xronichjanta, me e nchekateyanta Xixron anxrée.

*Ndo Jesús juako ndo ixi jua i tsjenge eni  
(Lc. 6:29-30)*

<sup>38</sup> 'Ó kuin ennta ixi kuandachro sen sa ó siá kuande ena iton ikonnta, ja anta kaxon tande enta iton ikon na. Ko siá iton kuantsjexin na nenonta, ja anta kaxon tande enta iton neno na.

<sup>39</sup> Ko jan an ndachrjan tetoko inta ni ña i, ko siá xrojan ni me e tsandé e na itja na ngaya ikonnta, ndatsjonxin jian, takéenta ti ndatsjonxin ikjon kaxon.

<sup>40</sup> Siá xrojan ni ña i tsichro na ijie ixi tjaun na tsantsja anta na camisaanta, tájonnta kaxon chamaranta.

<sup>41</sup> Ko siá xrojan ni tjaun tsamanta ti iye jitikao na naa kilómetro, ja anta tiku unta yuu kilómetro.

<sup>42</sup> Siá xrojan ni tsjanchaka a ngajinnta, chje énta na, ko siá xrojan ngisen tjaun sinchekjennta na xrojan nge e, tájonnta.

*Ndo Jesús juako ndo ixi xrotjue ena chujni ningakoína*

*(Lc. 6:27-28, 32-36)*

<sup>43</sup> 'Ó kuin ennta kaxon ti kuandachro sen: "Tjue enta ni tjua anta ko ningakon ennta ni ningakon annta."

<sup>44</sup> Ko jan an ntatjunta ixi tjue enta ni ningakon annta, ko ndachenta ndo Dio sinchenchaon\* ndo ni ndako a nichja anta, ko tingijnanta ni ningakon annta, ko ndachenta ndo Dio ixi sinchemé e ndo ti ndako a junta anta na ko ti chinga nichja na ixi ja anta ko ti benginta na.

<sup>45</sup> Me e ja anta xrokjannta chjen en Ndotáina jii ngajni, ndo tetuan an tsachrje chjiixro ngata a ni titikaon ndo ko ngata a ni ña i, ko kaxon nchekania ndo ichrin ngata a ni jian nche e ko ni ndako a nche e.

<sup>46</sup> Siá ja anta je o tjue enta ngisen tjua anta, ¿nge e tsjachanta ixi me e? Ixi ni tjejo tomi ne e xi tetuan an jaña nche e na kaxon.

<sup>47</sup> Siá je o jian nichje enta sen kichuunta, ¿á jian rinche enta, richronta? Jaña nche e ni chúxin a ndo Dio kaxon.

---

\* **5:44 sinchenchaon** bendecir

<sup>48</sup> Méxin tsango jian ko ndako nche enta kain nge e xranchi Ndotánta jii ngajní, jian nche e je e ndo ko jian ndo.

## 6

*Ndo Jesús juako ndo kondee ti jian tsingijnani chujni*

<sup>1</sup> \*Tingijna inta ni xrokonde e ixí je o tjaunnta tsikon chujni ti jian rinche enta. Siá jaña sinche enta, Ndotánta jii ngajní tsajon a ndo nge e tsjachanta.

<sup>2</sup> Méxin nchakon tsingijnanta naa ni nóa, ndache anta ikaxin chujni nge e juinche enta. Nche anta xranchi nche e ni tjako inaa ikon. Nchakon ste nã ngaya cha o o ni ngo, tingijna nã ni nóa ixí tjaun nã tsikon chujni nge e nche e nã ixí jaña xrondachro chujni ixí tsango jian je e nã. Ko jan an ndachrjan ixí ni me e ó kuayé e nã ti tikinixin en nã.

<sup>3</sup> Ko ja anta nchakon tsingijnanta naa ni nóa, imao nche enta, ko sen ícha tjentonta tsonoe a sen.

<sup>4</sup> Imao tingijnanta ni nóa ko ndotánta jii ngajní, ndo tsje e nge e nche enta imao, je e ndo tsajon ndo nge e tsjachanta ixí ti jian juinche enta.

*Ndo Jesús juako ndo xranchi xronichjani ngajin ndo Dio*

*(Lc. 11:2-4)*

<sup>5</sup> \*Ko nchakon ja anta xronichje enta ndo Dio, nche anta xranchi nche e ni tjako inaa ikon, ni me e nche e nã juaxruxin siin nã nichje e nã ndo Dio ngaxin in ni ngo ko ngaya cha o, ixí jaña tsikon

chujni nge e stenché e nã. Ko jan an ndachrjan ixi ni me e ó chónða nã nge e tikinixin en nã.

<sup>6</sup> Ko ja anta nchakon xronichje enta ndo Dio, tixin innta ndointa, tije enta ntachja ko nti a nichje enta ndo imao. Ko je e ndo ó jitsje e ndo nge e nche enta imao ko je e ndo tsajon ndo nge e jian tsaye enta.

<sup>7</sup> 'Ko nchakon nichje enta ndo Dio, nichja inta xraje o ko xraje o chijni, xranchi nche e ni chúxin a ndo Dio, ixi je e nã xraxaon nã ixi siá itsjé xronichja nã, me e tsin en ndo Dio.

<sup>8</sup> Ja anta nichja inta xranchi nche e je e nã ixi Ndotánta ó no e ndo nge e xrokonda anta maski xratjanche anta ndo.

<sup>9</sup> Ja anta ja in nichje enta ndo Dio:  
Ndotána, ja anta ritjennta ngajní, tsango tjúá ja anta.

<sup>10</sup> Jan anna tja onna tsji inta tsetuan annta ngata a nunte nti i  
ko tson en xranchi xrondachro ja anta ngata a nunte nti i,  
jaña kaxon tson en ngajní.

<sup>11</sup> Tájonnta nutja sinena jai.

<sup>12</sup> Ko ja anta nchemé enta kain ti ndako a junta ana xranchi jan anna ntamá ana ngaya aséenana ti ndako a juinchenana ikaxin chujni.

<sup>13</sup> Tintue anta ixi ti ndako a sinta ana,  
ko tájon anta juachaxin ixi xrojan nge e sinchenana Xixron anxrée  
ixi ja anta tituan annta kain nge e ko chondanta ijié juachaxin kain nchakon.

Jaña tson en.

14\* Ko siá ja anta sinchemé enta ngaya asáanta ti ndako a junta anta na, kaxon Ndotánta jii ngajní sinchemé e ndo ti ndako a juinche enta.

15 Ko siá ja anta sinchemé anta ngaya asáanta ti ndako a junta anta na, kaxon Ndotánta jii ngajní sinchemé a ndo ti ndako a juinche enta.

*Ndo Jesús juako ndo kondee ti sinchekatse ñaoni jinta*

16 'Ja anta nchakon sinchekatse ñaonta jinta, nche anta xranchi nche e ni tjako yuu ikon, ixi je e na juichenchín ikon na, me e jaña tsikon chujni ixi je e na jinchekatse ñao na jinta. Jan an nduaxin ntatjunta ixi ni me e ó kuayé e na ti tikinixin en na.

17 Ja anta nchakon rinchekatse ñaonta jinta, néma ikonnta ko jian tonchjiannta

18 ixi jaña tsonoe a chujni ixi ja anta rinchekatse ñaonta jinta. Je o Ndotánta jii ngajní tsono e ndo, ko je e ndo jitsje e ndo ti imao rinche enta, je e ndo tsajon ndo naa nge e tsjachanta.

*Ngajní jii kain ti nduaxin tjintee  
(Lc. 12:33-34)*

19\* Tasintja inta ti tjintee jii ngata a nunte nti i, ixi nti i ti i kuchji ko itjo kain nge e, ko xiche e chao tixin in xa ndointa ko tsee xa ti tjintee chondanta.

20 Cháña ngajní tasintjanta kain ti tjintee ixi nti a kuchji xro an nche e ba, ko nti a xro an nge e itjo, ko xiche e jua i tsee xa.

21 Ixi ti no jii ti tsango tjintee chondanta, nti a tsake e asáanta kaxon.

*Xro i tingasáña anta**(Lc. 11:34-36)*

<sup>22</sup> 'Ikonnta me e nchengasáña anta. Méxin, siá jian ikonnta, jian tsingasáña nchijíi ja anta.

<sup>23</sup> Ko siá ikonnta je a jian, kaxon nchijíi ja anta naxixe e tsake enta. Ko siá xro i chondanta je a xro i jian tingasáña, tsango naxixe e tsake enta.

*Ndo Dio ko tomi**(Lc. 16:13)*

<sup>24</sup> 'Xro an ngisen jian sinche e ixrā ngajin yuu nchéé; xroningakon en sen naa nchéé sen o xrotjue e sen inaa nchéé sen, kaxon tsango jian sinche e sen ixrā ngajin naa nchéé sen ko ngajin inaa nchéé sen, na i. Jua i sinche eni ixrā ngajin ndo Dio ko xrotjue eni tomi.

*Ndo Dio tayakon en ndo chjen en ndo**(Lc. 12:22-31)*

<sup>25</sup> 'Jan an ntatjunta: Ta inta juachjaon ixi nge e sintenta o nge e tsi inta o nge e tsaritsiinta. ¿Á ícha tjintee nge e ti sintenta ixi ti chondanta juachaxin tsarichonnta? Xraxaonnta ixi ícha tjintee asáanta ko ti chondanta juachaxin tsarichonnta ixi ti tsaritsiinta ko ti sintenta.

<sup>26</sup> Tsje enta kuxe, je e ba tenga i ba ko tandá i ba ko tatsin a ba ti sine ba, ko Ndotáina jii ngajní tajon ndo nge e sine ba. Ko ja anta ícha tjinteenta ixi naa kuxe.

<sup>27</sup> ¿Ko ngixe i ja anta ixi tsango taanta juachjaon, á me e ícha tsojinenta xranchi ngusinexin naa metro?

<sup>28</sup> ¿Ko sonda tsango taanta juachjaon ixi nge e tsaritsiinta? Tsje enta xranchi tangi itsjo. Itsjo me e nche a tsjo ixrā ko tjaun a tsjo manta,

<sup>29</sup> ko jan an ntatjunta ixi xi rey Salomón, xi kuachónnda tsango itsjé nge e, kuitsa i xa xranchi itsjo me e.

<sup>30</sup> Ko siá ndo Dio jaña nchekitsáa ndo ika, ka jai jichón, ko ndúya xroche ka ngaya itja, ¿xranchi sinchekitsá inta ndo Dio ja anta ti chuntia inta ndo?

<sup>31</sup> Méxin, ta inta juachjaon, ko ndachro anta ixi nge e sintenta o nge e tsi inta o nge e tsaritsiinta,

<sup>32</sup> ixi chujni chúxin a ndo Dio tsango taa na juachjaon ixi me e. Ko Ndotáina jii ngajní, je e ndo ó no e ndo nge e xrokonda anta.

<sup>33</sup> Sa ó tjéenta juachaxien ndo Dio ko nche enta ti jian, ko tjume e je e ndo tsajon ndo kain nge e xrokonda anta.

<sup>34</sup> Ko ta inta juachjaon nge e tson en ndúya ixi nchakon ndúya, nchakon me e noa inta nge e juachjaon tsika o.

## 7

### *Tjankata inta ijię ngajin chujni* (Lc. 6:37-38, 41-42)

<sup>1</sup> Tjankata inta ijię ngajin ikaxin chujni ixi jaña ndo Dio kaxon tsjangata inta ndo ijię.

<sup>2</sup>\*Ndo Dio tsjankata a ndo ijię ngajinnta xranchi ja anta tsjankata anta ijię ngajin ikaxin chujni. Ko xranchi sinche e ja anta jaña kaxon ndo Dio sinche e ndo ngajinnta.

<sup>3</sup> Ja anta tikonnta naa xineno jingi ikon sen kichuunta ko tikon anta naa ntasiji jingi ikonnta.



4 Ko siá ja anta chondanta naa ntasiji jingi ikonnta, ¿xranchi xrondachenta sen kichuunta ixi ja anta tsantsjengínta xineno jingi ikon sen?

5 Ja anta ti yuu ikonnta nichjakuanta, sa ó tantsjenginta ntasiji jingi ikonnta ko tjume e chao tsikonnta tsantsjengínta xineno jingi ikon sen kichuunta.

6 'Chje anta kunia kain ti tjúá tikinixin en ndo Dio ixi ba xrokjan ba ngajinnta ko sina anta ba ko naatsónaxónnta ba. Kaxon chje anta kuchinga ixro tjintee ndatin in perla ixi ba tsingatjangi ba ixro.

*Tjanchianta ko tjéenta ko tinganta ntachja  
(Lc. 11:9-13; 6:31)*

7 'Tjanchianta ko ndo Dio xrotjáanta ndo nge e tjaunnta. Tjéenta ko tsinchínta. Tinganta ntachja ko xroxitje e ntachja.

8 Ixi ngisen tjanchia, tayé e sen, ko ngisen tjée, titja sen, ko ngisen tinga ntachja, xitje e ntachja.

9 '¿Á xrojan ja anta, xrochje énta chjan anta naa ixro sine xjan, siá jitjanchia xjan naa nutja?

10 O, ¿xrochje énta xjan naa kunchee sine xjan, siá juanchia anta xjan naa kuchee?

11 Ko ja anta ña inta, ko no anta chje énta chjan anta nge e ti jian, Ndotáina jii ngajní ícha jian ndo, ko je e ndo tsajon ndo nge e ícha jian tsayé e sen tjanchia ngajin ndo.

12 \*'Ja anta nchekuunta chujni xranchi tjaunnta sinta anta na ixi jaña kuetuan an ley ne e ndo Moisés ko jaña ndachro xroon tsikjin sen kuachronga chijnie ndo Dio.

*Ntächja tsango ijno*

(Lc. 13:24)

<sup>13</sup> 'Tixixinnta ntächja ijno. Ixi ntächja ko cha o tsitjáñaxin chujni, yui me e tsango iton ko kueya chujni nti a tixixin na.

<sup>14</sup> Ntächja ko cha o tixixinni ngajní, me e tsango ijno ko tsjé a sen tixixin ntächja me e.

*Ti itu tajon ntaa, me e tjatsuanxinni ntaa*

(Lc. 6:43-44)

<sup>15</sup> 'Tsje enta jian ixi kueya ni ndachro ixi je e na nichja na chijnie ndo Dio ko nduaxin a. Je e na tetsáa na xranchi naa kutuchjon, ko ngaya aséen na nche e na xranchi naa kundanixra tsango jie e.

<sup>16</sup> Ja anta jaiko tsichuxinnta na ixi ti nge e nche e na, xranchi ntacha a jua i tajon ntaa tu uva o tu higo.

<sup>17</sup> Méxin, kain ntaa jian tajon ntaa itu jian, ko ntaa je a jian tajon ntaa itu xro an xrée.

<sup>18</sup> Naa ntaa jian, ntaa me e jua i tsajon ntaa itu xro an xrée, ko ntaa je a jian, ntaa me e jua i tsajon ntaa itu jian.

<sup>19</sup> \*Kain ntaa tajon itu xro an xrée xrokonda xrochrijin ntaa ko xroche ntaa.

<sup>20</sup> \*Ko jaña tsichuxinnta chujni kaxon ixi ti nge e nche e chujni.

*Kain a chujni tixin in ti tetuan an ndo Dio*

(Lc. 13:25-27)

<sup>21</sup> 'Kain a ni xrondachro: “Ja anta, Nchána”, tsixin in na ti tetuan an ndo Dio. Je o sen titikaon ti tetuan an Ndotána jii ngajní, tsixin in sen nti a.

<sup>22</sup> Nchakon tsii ti tetuan an ndo Dio, itsjé sen xrondachro sen: “Nchána, Nchána, jan anna nichjaxinna nombreanta ko nombreanta kuantsjexinna espíritue Xixron anxrée ko nombreanta juin-taxinna kueya ixra ijié.”

<sup>23</sup> Ko tjume e ndo Jesús xrondache ndo sen: “Jan an chuxin anta, ndá a itjinta, ja anta ti juinche anta ti ndako.”

*Ndo Jesús nichjaxin ndo ixi nchia jita a itjao*  
(Lc. 6:47-49; Mr. 1:22)

<sup>24</sup> Méxin ngisen tin en ko titikaon nge e ndachrjan, sen me e ste sen xranchi naa xi xraxaon jian ixi juinchekonchjian xa ndo a xa ngata a itjao\*.

<sup>25</sup> Kuania ichrin, ko koyeé inda tsaaka, ko soji kujj chrinto ngata a nchia me e, ko kuitsinga i nchia ixi ngata a ixro soji jita a nchia.

<sup>26</sup> Ko ngisen tin en nge e ndachrjan ko titikaon a na sen, sen me e nche e sen xranchi naa xi ninta ixi juinchekonchjian ndo a xa ti jii nchese.

<sup>27</sup> Ko tjume e kujj ichrin ko koyeé inda tsaaka, ko kujj chrinto ngata a nchia me e; méxin kuitsinga nchia, ko tsango ijié juachjaon kon en ixi ngata a nchese juinchekonchjian xa nchia.

<sup>28</sup> \*Ko hora juexin nichja ndo Jesús, chujni stetin en ndachro na ixi tsango ijié juachaxin chónnda ndo ko chaxro juako ndo

<sup>29</sup> ixi juako ndo xranchi naa ngisen tsango ijié tituan an ko juako a ndo xranchi ni tjako ley.

---

\* **7:24** itjao tepetate, roca      **7:28** Mr. 1:22; Lc. 4:32.

## 8

*Ndo Jesús juinchexruen en ndo naa xi chónnda chin lepra*

*(Mr. 1:40-45; Lc. 5:12-16)*

<sup>1</sup> Hora xingajinxin ndo Jesús ijna, itsjé chujni rué e na ndo.

<sup>2</sup> Ko konchjiñe e naa xi ni e chónnda xa ichin lepra ko bake exin ntatuchi in xa ngajin ndo Jesús ko ndachro xa:

—Nchána, siá tjaunnta chao sinchexruananinta —ichro xa.

<sup>3</sup> Ko tjume e ndo Jesús baxe e itja ndo ngata a xa ko ndachro ndo:

—Jaán tja on. Jai tsachrja a ichin ji in.

Ko juexin ndachro ndo jaña, je e xa tuinxin kuachrje e xa ichin me e.

<sup>4</sup> Ko ndo Jesús ndache ndo xa:

—Xro an ngisen teki é ji in. Je o itjia ngajin xitaana ko tájuan juasiaa xranchi tsiketuan an ndo Moisés ixi jaña tsono e xitaana ixi ó koxruan an.

*Ndo Jesús juinchexruen en ndo naa chajan*

*(Lc. 7:1-10)*

<sup>5</sup> Nchakon kuixin in ndo Jesús tjajna Caper-naum, konchjiñe e naa xi capitán ne e Roma ko kuinóatée xa, ko ja in ndachro xa:

<sup>6</sup> —Nchána, nía jii naa chán nchexrana ko je e chán níexin chán ichin jua i tontengini ko tsango tíin chán.

<sup>7</sup> Me e ndo Jesús juatingíexin ndo:

—Jan an itsji syntaxruan an chán.

<sup>8</sup> Ko xi capitán juatingíexin xa:

—Na i, Nchána, jan an tikinixinna i tsixin innta nía. Ja anta je o tetuen ennta ichin tsachrje ichin, ko je e chán tsoxrue en chán.

<sup>9</sup> Jan an kaxon chonda ngisen tetuanna ko kaxon jan an chonda xi soldado tetuan an. Nchakon jan an tetuan an naa xi soldado ixi itsji xa xrojan no, je e xa titikaon xa. Ko jan an tetuan an inaa xa tsij xa nda i, ko je e xa tij xa. Ko kaxon tetuan an xi nchexrana xrojan nge e sinche e xa, ko je e xa nche e xa ti ndachrjan.

<sup>10</sup> Ko kuin en ndo Jesús nge e ndachro xi capitán, tsango juinche e ndo juaxruxin nge e chro xa, ko ndache ndo chujni sterué e:

—Nduaxin xrontatjunta ixi xro an ngisen nchijí nunte Israel kuin an ja in nichja ko tsango chuntia xranchi xi ji i.

<sup>11</sup> \*Jan an ntatjunta ixi tsij kueya chujni, ni tsj xin chjuya ko ni tsj xin retuya sineka o na ndo Abraham ko ndo Isaac ko ndo Jacob ti jii nchia tetuan an ndo Dio ngajní.

<sup>12</sup> \*Ko kueya sen tikinixin en xrobake e sen nchia ti tetuan an ndo Dio, sen me e tsachrjexin sen nti a, ko nduja tsake e sen ti naxixe e ko nti a xrotsjanga sen ko tseto neno sen ixi tsango xroxronka sen.

<sup>13</sup> Tjume e ndo Jesús ndache ndo xi capitán:

—Itjia ndúya, ko tson en xranchi ja a kuitikaoan.

Ko chán nchexrée xi capitán hora me e koxrue en chán.

*Ndo Jesús juinchexrue en ndo jachée ndo Pedro (Mr. 1:29-31; Lc. 4:38-39)*

14 Ndo Jesús ikjui ndo ndo a ndo Pedro ko nti a bikon ndo janchée ndo Pedro jitsinga jan ko tsango yaa jan súa.

15 Me e ndo Jesús itsé ndo itja jan ko tuinxin kuachrje e jan súa, ko jaiko bingatjen jan juincheckonchjian jan nge e sine sen.

*Ndo Jesús juinchexruen en ndo kueya sen ni e  
(Mr. 1:32-34; Lc. 4:40-41)*

16 Ko tiie me e bikao e na ndo Jesús kueya chujni chóna espíritue xi ña i ko je e ndo naáko chijni nichja ndo ko tuinxin kuachrje e na espíritue xi ña i, ko kaxon juinchexruen en ndo ikaxin ni ni e.

17 Ji i kon en ixi jaña tsichronga ndo Isaías chinnie ndo Dio ó sée: “Je e ndo kuama ndo ichin chondana ko je e ndo kuama ndo ti tíinna ko ti soji ana.”

*Sen tjaun xrorué e ndo Jesús  
(Lc. 9:57-62)*

18 Hora bikon ndo Jesús ixi kueya chujni xejo ngandajin ndo, kuetuan an ndo ixi tsatsingatu e sen ndalago.

19 Ko naa xi tjako ley kuetuan an ndo Dio konchjiñe e xa ngajin ndo Jesús ko ndachro xa:

—Maestro, jan an tja on xrorua anta ko itsji ti no itsjinta.

20 Ko juatingíexin ndo Jesús ko ndachro ndo:

—Kutuunta chóna ba itjaq\* tejuaxin in ba, ko kuxe chóna ba kakée ba. Ko Chjen en ndo Dio, xjan jongíe xranchi chujni, chóna i xjan ti no tsjokéexin xjan.

21 Ko naa sen chrikao ndo, ndachro sen:

---

\* **8:20** *itjaq* cueva

—Nchána, chjánanta juachaxin tsjabaja ndotána.

<sup>22</sup> Ko ndo Jesús juatingíexin ndo:

—Tuinxin rua nana ja a. Tintu é ni tsiken en tsjabaa kichuu na.

*Ndo Jesús nichje e ndo chrinto ko inda ko ndabake e nda*

*(Mr. 4:35-41; Lc. 8:22-25)*

<sup>23</sup> Ndo Jesús kuixin in ndo ntabarco ko sen teyuu chrikao ndo kaxon kuixin in sen.

<sup>24</sup> Kuania ichrin ko kuii naa chrinto tsango soji ko ndachaon tsango soji jamangitaon nda. Ko ndo Jesús jijua ndo.

<sup>25</sup> Tjume e sen teyuu chrikao ndo Jesús ikjui sen juinchexingame e sen ndo ko ndachro sen:

—Nchána, tingijnaninta ixi xrojamangi ntabarco.

<sup>26</sup> Ko je e ndo ndachro ndo:

—¿Sonda stexronkanta, ja anta? ¿Á chuntia inta ndo Dio?

Tjume e bingatjen ndo ko kuyakutee ndo chrinto ko ndachaon ko tuinxin ndabake e nda.

<sup>27</sup> Ko sen rué e ndo ndastetsjeko sen ixi nge e kon en, ko ndachro sen:

—¿Ngixe e xi ji in?, ixi nichje e xa chrinto ko ndachaon ko titikaon nda.

*Xi chóna espíritue Xixron anxrée ste tjajna Gadara*

*(Mr. 5:1-20; Lc. 8:26-39)*

<sup>28</sup> Hora ndo Jesús kuiji ndo tuenxin ndachaon ti jii nunte Gadara, kuachrje kuii yuu xi ste ti no xrabaa ni tsiken en. Xi me e chóna xa espíritue Xixron anxrée ko tsango chinga nche e xa, me e xronka chujni, méxin tatsinga i na ti jii cha o me e.

<sup>29</sup> Ko xi me e kuaxi kuyako xa ko ndachro xa:  
—¿Sonda nchexronkana, Jesús, Chjen en ndo Dio? ¿Á ó jui ia ixi sinchexronkana maski xrati a nchakon sinchéña ijie ngajinna?

<sup>30</sup> Tjenka nti a jii kueya kuchinga steneña ba.

<sup>31</sup> Ko espíritu Xixron anxrée kuinóatée ngajin ndo Jesús ko ndachro:

—Siá tsantsjexianna nti i, tintunana tsixin inna kuchinga ste yá a.

<sup>32</sup> Ko ndachro ndo Jesús:

—Chao tixin ia ngaxin in kuchinga.

Tjume e espíritu Xixron anxrée kuachrjexin xi me e ko kuixin in ngaxin in kain kuchinga. Ko kain kuchinga chrinka ba ti jii yaso e, ko kuitsingangi ba inda, ko nti a kjun en ba inda.

<sup>33</sup> Ko ni stetsje e kuchinga xronka na ko sabinga na sakjui na tjajna ko beki e na chujni nge e kon en kuchinga ko nge e kon en xi kuachóna espíritu Xixron anxrée.

<sup>34</sup> Ko kain ni tjajna me e ikjui na ngajin ndo Jesús ko hora bikon na ndo kuinóatée na ngajin ndo ixi satsjixin ndo tjajna nti a.

## 9

*Ndo Jesús juinchexruen en ndo naa xi tsiken en tutée*

*(Mr. 2:1-12; Lc. 5:17-26)*

<sup>1</sup> Tjume e ndo Jesús kuixin in ndo ntábarco ko kuatsinga ndo tuenxin ndalago ko kuiji ndo tjajnéé ndo.

<sup>2</sup> Ko nti a kaxin chujni bikao e na ndo naa xi tsiken en tutée jitsingata a xa naa kania. Ko ndo



Jesús bikon ndo ixi nduaxin chujni me e chuntia\* na ngajin ndo, méxin nichje e ndo xi ni e ko ndachro ndo:

—Chjan na, take é juaxruxin, ixi kain ti ndako a juinche e, jan an ndachrjan ó komé e jía.

<sup>3</sup> Tjume e kaxin ni nchekuen en chujni chijnie ndo Dio stendachro na गया aséen na:

—Xi ji i nichjangí e xa ndo Dio.

<sup>4</sup> Ko ndo Jesús no e ndo nge e stexraxaon xa गया aséen xa, me e ndachro ndo:

—¿Sonda ndako a xraxaonnta गया asáanta?

<sup>5</sup> ¿Nge e ícha tangi a xrondachroni: “Ti ndako a juinche e ójuintamá a”, o xrondacheni xi ji i: “Tingatjen ko tjasían ko tajia”?

<sup>6</sup> Méxin, sintano anta ixi Chjen en ndo Dio, xjan jongí e xranchi chujni, tsango tituan an xjan ngata a nunte nti i ixi sinchemé e xjan ti ndako a juinche e chujni.

Tjume e ndache ndo xi ni e:

—Tingatjen, tama kani a ko satjia ndúya.

<sup>7</sup> Ko xi tsiken en tutée bingatjen xa ko sakjui xa ndo a xa.

<sup>8</sup> Ko kain ni ste nti a bikon na naa ixra tsango ijié kon en, xronka na ko kuaxi na kuajon na juasaya ngajin ndo Dio ixi tsango ijié juachaxin tsikajon ndo ngajin chujni ste ngata a nunte xasintajni.

*Ndo Jesús kuiye e ndo ndo Mateo*

*(Mr. 2:13-17; Lc. 5:27-32)*

<sup>9</sup> Hora sakuixin ndo Jesús nti a, tjume e bikon ndo naa xi ndatin in Mateo jitayé e xa tomi ne e xi tituan an. Me e ndachro ndo Jesús:

---

\* **9:2 chuntia** tener fe

—Ja a rua nana.

Ko je e xi Mateo bingatjen xa ko rué e xa ndo Jesús.

<sup>10</sup> \*Nchakon me e ndo Jesús ko sen teyuu chrikao ndo ikjui sen ndo a xi Mateo bijine sen, ko nti a ste ikaxin xi tayé e tomie xi tituan an ko ikaxin ni ndako a nche e.

<sup>11</sup> Ko kaxin xi fariseo bikon xa ndo Jesús ngakjen en chujni me e, méxin juanchangi e xa sen teyuu chrikao ndo Jesús, ko ndachro xa:

—¿Sonda ndo ntakuan annta nekao ndo ni xenge e na tomie xi tituan an ko ni ndako a nche e?

<sup>12</sup> Ko ndo Jesús kuin en ndo nge e stendachro na, me e juatingíexin ndo:

—Je a sen chao ste xrokonde e xi nchexruan; sen ni e, me e sen xrokonde e xa.

<sup>13</sup> \*Itjinta ko tanginta nge e jitaxin xroon chijnie ndo Dio ti ndachro: “Jan an tja on ixi ja anta tsikonóe enta chujni; je a je o tson inta iko ko xroche jnié ba, me e tsayá a.” Ja in ndachro chijnie ndo Dio. Ixi jan an jui a nti i ixi tsiya a chujni jian nche e. Na i. Jan an jui i ixi tsiya a chujni ndako a nche e ko je e na tsintu e na ti ndako a nche e na.

*Kaxin chujni juanchangi na ixi ti nchekatse ñaoni jinta*

*(Mr. 2:18-22; Lc. 5:33-39)*

<sup>14</sup> Naa nchakon konchjiñe e sen chrikao ndo Juan Bautista ko juanchangi e sen ndo Jesús:

—Sonda jan anna ko ni fariseo nanao ntekatse ñao o na jinta, ko sen chrjiku unta, ¿sonda na i?

15 Tjume e juatingíexin ndo Jesús:

—Sen tsikiye e xi tsute e ko sen ste kiée xa, ¿á chao xrotsjanga sen siá je e xa xrají xa ngajin sen? Ko tsii nchakon satsjikao na xi tsute e, nchakon me e tsaxi sinchekatse ñao sen jinta.

16 'Xro an ngisen tjaon mantée ti tsikichje ko take e tu o manta natjúá ixi nchakon tsijma manta tsixe e ti natjúá ko ícha tsinchje ti ntaxi.

17 Ko jua i tsikia ndée tu uva ti nandá tsikoña ixran ngaya naa tjuanxran ntaxi ixi xroxruji xran ko tsinchje xran tjuanxran ntaxi ko íxro an tsonda tjuanxran ko kaxon tsintji xran. Méxin, xran natjúá xrokonda tsikia xran tjuanxran natjúá, jaña yui jian tsonda.

*Ndo Jesús juinchexechón ndo naa ichjan ko juinchexruen en ndo naa nchri*

*(Mr. 5:21-43; Lc. 8:40-56)*

18 Ko xrajnichja ndo Jesús, kuji naa xi tituen en sen tjajna judío bake exin ntatuchi in xa ngajin ndo ko kuinóatée xa:

—Nchrichajan na nandákua juexin kuen en nchrichan. Ko siá suixinnta itsjinta ko tsakée tjáanta ngata a nchrichan, je e nchrichan xroxechón nchrichan.

19 Ko ndo Jesús bingatjen ndo ko sabikao ndo sen kuarue e ndo.

20 Kaxon konchjiñe e naa nchri, ó teyuu nano níexin nchra jnié nchra ko imao konchjiñe e nchra tuenxin ndo Jesús ko itsé nchra ngande e manta jitsáa ndo.

21 Ixi je e nchra jaña tsixraxaon nchra:

—Maski ngande e manta jitsáa ndo Jesús xrotse, me e tsoxruxanna.

<sup>22</sup> Ndo Jesús tuinxin ngatjia ndo ko bikon ndo nchra, ko ndachro ndo:

—Chjan na, take é juaxruxin ja a ixi ti chuntiana me e juintaxruan an.

Ko je e nchra koxruen en nchra hora me e.

<sup>23</sup> Ko hora kuiji ndo Jesús ndo a xi tituen en ni judío, bikon ndo ixi ó tsikiji ni tanoa ntaxro ixi itsji nā tsijabaa nā nchrichajan. Ko chujni ste nti a stetsjanga nā.

<sup>24</sup> Me e ndachro ndo Jesús:

—Tachrjexinnta nti i ixi xjan ji i tsiken a xjan; je o jijua xjan.

Ko je e nā kuaxi juanoa nā ndo.

<sup>25</sup> Ko hora kuachrje chujni ste nti a, ndo Jesús kuixin in ndo ko itsé ndo itjáa xjanchrhajan tsiken en ko je e xjan xechón xjan ko tuinxin bingatjen xjan.

<sup>26</sup> Ko tsango ijié ixrā juinche e ndo Jesús, nchijíi nunte me e kono e nā.

*Ndo Jesús juinhexruen en ndo yuu ni tikon a*

<sup>27</sup> Tjume e sajuixin ndo Jesús nti a ko yuu chujni tikon a jirué e nā ndo, ko ja in stetoyako nā:

—Tikonóa nananta, ja anta ti tsikachrjexinnta ndo David.

<sup>28</sup> Ko kuixin in ndo Jesús naa nchia, tjume e konchjiñe e ni tikon a, ko ndo Jesús juanchangi e ndo nā ko ndachro ndo:

—¿Á titikaonnta ixi jan an nduaxin sintaxruan annta?

Ko je e nā juatingíexin nā:

—Jaán, Nchánana, jan anna chuntiana ngajinnta.

<sup>29</sup> Tjume e ndo Jesús bake e ndo itjáa ndo ngata a ikon na ko ndachro ndo:

—Ja anta tsoxruan annta ixi chuntianta ngajin.

<sup>30</sup> Ko tuinxin ó chao bikon na. Ko ndo Jesús kuetuan an ndo:

—Xro an ngisen teki énta ji in.

<sup>31</sup> Ko je e na kuachrjexón na nti a, tuinxin beki ena kain chujni kuetan na ko nchijí nunte me e kono e na nge e jian juinche e ndo Jesús.

### *Ndo Jesús juinhexruen en ndo naa xi nosin*

<sup>32</sup> Ko hora sakjui ni bakikon a, kaxin chujni bika o na naa xi nosin ko chóna xa espíritue Xixron anxrée.

<sup>33</sup> Ko hora kuantsje ndo espíritue Xixron anxrée, xi nosin chao kuaxi nichja xa. Ko kain chujni ste nti a xronka na ixi kain nge e tsango ijié kon en nti a ko ndachro na:

—Xro an nge e tsango ijié bakon en nchijí nunte Israel xranchi ti kon en jai.

<sup>34</sup> \*Ko ni fariseo stendachro na:

—Xi ji i tantsje xa espíritue Xixron anxrée ixi Xixron anxrée tsikajon xa juachaxin ngajin xi ji in.

### *Ndo Jesús bikonóe e ndo chujni*

<sup>35</sup> \*Ndo Jesús kuaji ndo itsjé tjajna, tjajna ijié ko tjajna nchínchín banchekuen en ndo chujni Israel ngaxin in ningue na, ko chronga ndo ti juachaxin jian bikaoxin ndo ti tetuan an ndo Dio. Ko juinhexruen en ndo kain chujni kuachóna ichin ko kain ti tiín na.

<sup>36</sup> \*Ko bikon ndo ixi itsjé chujni kuiji nti a, ko tsango bikonóe e ndo nã ixi ichrji nã xranchi kutchjon chóna i ngisen tsje e ba.

<sup>37</sup> \*Tjume e ndache ndo sen teyuu chrikao ndo:  
—Tsango itsjé nge e jii tsandáani, ko kueya i sen nche e ixrã ji i.

<sup>38</sup> Méxin tjanche enta nchéé nunte ji i xroxruan an ndo itsjé sen nchexrã, sen tsandáa.

## 10

*Ndo Jesús xruan an ndo sen teyuu chrikao ndo  
(Mr. 3:13-19; Lc. 6:12-16)*

<sup>1</sup> Ndo Jesús kuiye e ndo sen teyuu chrikao ndo ko chjé ndo sen ijíe juachaxin ixi tsantsje sen espíritue Xixron anxrée jitetuen en aséen chujni ko sínchexrjuen en sen kain ichin chóna chujni ko kain ti tiín nã.

<sup>2</sup> Ja in kuin in ti teyuu sen kuinche e ndo Jesús, sen rué e ndo: sa ó ndo Simón, ndo juinchekin in sen Pedro, ko ndo kichuu ndo, ndo Andrés, kao ndo Jacobo ko ndo kichuu ndo ndatin in Juan, chjen en ndo Zebedeo.

<sup>3</sup> Ko ndo Felipe, ndo Bartolomé, ndo Tomás, ndo Mateo, ndo kuaxenge e nã ti bajanchia xi tetuan an, ko ndo Jacobo, chjen en ndo Alfeo, ko ndo Lebeo, ndo tsikake e nã Tadeo.

<sup>4</sup> Kaxon ndo Simón, ndo barué e ni cananista, ko xi Judas Iscariote, xi juinchekji ndo Jesús.

*Ndo Jesús kuajon ndo ixrã ngajin sen teyuu  
(Mr. 6:7-13; Lc. 9:1-6)*

<sup>5</sup> Ndo Jesús xruan an ndo sen teyuu ko ja in ndache ndo sen:

—Tji anta ngajin chujni je a judío ko tixin anta tjajna Samaria.

<sup>6</sup> Ja anta itjinta ngajin chujni bingachrue xranchi kutuchjon, sen tikinixin en tjajna Israel.

<sup>7</sup> Itjinta ko nchekuen ennta chujni ko ja in nichje enta na: “Juachaxien ndo Dio jii ngajni ó tuinxin tsii.”

<sup>8</sup> Sinchexruen ennta chujni ni e ko ni chónnda ichin lepra ko nchengatjennta ni tsiken en, tantsjenta espíritue Xixron anxrée ko ti juachaxin kuito annta kaxon nchikiton ennta chujni.

<sup>9</sup> Tiku inta tomi chika oro, plata o cobre,

<sup>10</sup> \*ko nchakon tsaanta cha o tiku inta nge e sintenta, ko nge e taritsínta, tiku inta kaxon inaa kate xrochjanganta, ko tiku inta ntakuto ixi sen nche e ixra tikinixin tsayé e sen ti sine sen.

<sup>11</sup> Nchakon tsjasonta naa tjajna ijié o naa tjajna nchíin, tjéenta naa ngisen nche e jian ko nti a tituan anta ndo a sen ti satsjixinjanta nti a.

<sup>12</sup> Hora tsixin innta naa ndo a sen, ja in tájonnta juajna: “Juaxruxin xrochónnda ngisen jii nchia ji i.”

<sup>13</sup> Ko sen ndo a siá nduaxin jian aséen sen tsayé e sen juaxruxin, ko siá na i, satiku unta juaxruxin me e.

<sup>14</sup> \*Ko siá xrojan ngisen chro a tsitu anta ndo a sen ko chro a sen tsin en sen nge e nichjanta, tachrxjinnta tjajna o nchia me e ko tontsjenganta tutáanta, jaña tsintji inche ixi jaña tsjakoxinnta ixi je e na chro a na kuayé e na nge e ichronta.

15 \*Ko nduaxin ndachrjan ixi nchakon tsoña ijiē ti tsjexinja kain nge e, ni tjajna Sodoma ko Gomorra tanto a tangi tson en n̄a xranchi ni tjajna tjaun a n̄a kuin en n̄a ti ndachronta.

*Chujni xraningakon en sen titikaon ndo Cristo*

16 \*Jai jan an xroxruan annta xranchi kutuchjon ngakjen en kundanaxra. Méxin jaiko ko jian tsje enta xranchi kunchee ko kaxon nche enta xranchi kuntúá, nchejié a asáanta.

17 \*Jian tsje enta ixi kaxin chujni xrotsénta n̄a ko tsiku unta n̄a ngajin ni tetuan an, ko ngaxin in ningue n̄a, nti a tsikaonxinnta.

18 Ko tsikaannta n̄a ngajin xi tetuan an ko ngajin xi rey ixi chuntianta ngajin. Ko nti a xronichjanta ixi titikaonninta, tsin en ni me e ko tsin en kaxon ni chúxin a ndo Dio.

19 Ko nchakon tsikaannta n̄a ti ste xi tetuan an, ta inta juachjaon ixi nge e xrondachronta o nge e xronichjanta ixi hora me e ndo Dio tsajon ndo nge e xronichjanta,

20 ixi je a ja anta xronichjanta; Espíritue Ndotánta xronichjaxin ixi ja anta.

21 \*Chujni kichuu tsajon n̄a juachaxin ixi tsen en ni kichuu n̄a ko ndotata tsajon ndo chjen en ndo ixi tsóña n̄a xjan. Ko ichjan xraningakon en xjan sen ndo a xjan ko tsajon xjan sen ixi tsen en sen.

22 \*Ko kaxon itsjé chujni xroningakon annta ixi chuntianinta. Ko kain sen tsokuaxi en kain ji i ti

---

**10:15** Mt. 11:24.    **10:15** Lc. 10:4-12.    **10:16** Lc. 10:3.    **10:17** Mr. 13:9-11; Lc. 12:11, 12; 21:12-15.    **10:21** Mr. 13:12; Lc. 21:16.    **10:22** Mt. 24:9; Mr. 13:13; Lc. 21:17; Mt. 24:13; Mr. 13:13.



tsjexinja kain nge e jii ngata a xasintajni, sen me e tsayé e sen juachaxin tsechón sen kain nchakon.

<sup>23</sup> Ko nchakon tsengixinnta nã tjanya ji i, satiganta inaa tjanya. Ko nduaxin xrontatjunta xratsjexin a satsjinta ngujngu tjanya tikinixin en Israel, Chjen en ndo Dio, xjan jongí e xranchi chujni, xrokjan xjan tsii xjan nti i.

<sup>24</sup> \*Naa ndo tjako ícha tjintee ndo ixi sen nchekuen en ndo, ko kaxon sen chónnda ni nchexrã, ícha tetuan an je e sen ixi ni nchexrée sen.

<sup>25</sup> \*Ko ngisen jitangi xroxraxaon sen ixi je o tjintee sen xranchi ndo nchekuen en sen, ko ni nchexrã xroxraxaon nã ixi je o tsituan an nã xranchi nchéé nã. Ixi siá ndotata juinchekin in nã ndo Xixron anxrée, sen rué e ndo ícha jaiko sinchekin in nã sen jaña.

### *Ngisen chao xroxrakon ennta*

*(Lc. 12:2-9)*

<sup>26</sup> \*Ja anta xro an ngisen xrakon enta, ixi kain ti jixratja xrokonda tsonoxin, ko kain ti jimá xrokonda tsono eni nge e me e.

<sup>27</sup> Ko siá xrontatjunta xrojan nge e imao, ja anta séen nichjanta tsin en kain chujni. Ko siá tseki anta naa nge e ngaya ndatsjonnta, ja anta séen teki énta chujni.

<sup>28</sup> Xrakuen anta chujni tsóña ntau eni ixi ni me e jua i tsóña nã aséenni. Ja anta xroxrakon ennta ngisen chao xroxruan an asáanta ko ntau anta ti jiche xro i.

29 '¿Á tuchji a yuu kuxechjan ixi naa tomi nchíín? Ko maski tjinte a ba, ninaa ba ten a ba siá Ndotánta Dio tsajon a Ndo juachaxin.

30 Ko kaxon ndo Dio no e ndo ngijan in xrajaanta chondanta.

31 Méxin, ja anta xrakon anta ixi ja anta ícha tjinteenta ixi kain kuxe.

*Sen tosue a ixi je e sen xrondachro sen ixi titikaon sen ndo Cristo*

*(Lc. 12:8-9)*

32 'Ko siá ja anta xrondachrona ixi titikaon-ninta tsin en chujni, kaxon jan an xrontatjan Ndotána jii ngajní ixi nduaxin me e.

33 \*Ko ngisen xrondache chujni ixi jan an chuxin ana sen, jan an kaxon xrontatjan Ndotána jii ngajní ixi jan an chuxin a sen.

*Kondeexin ndo Jesús tse t̄o n̄a*

*(Lc. 12:51-53; 14:26-27)*

34 'Xraxaon anta ixi jan an bikian juaxruxin ngata a nunte xasintajni. Na i. Jan an bikian ti tse t̄o n̄a.

35 Kondanaxin jan an tsinteke t̄o chujni; xi tse t̄o xa ngajin ndotée xa, ko nchrichajan tse t̄o nchrichan ngajin janée nchrichan, nchritakinda tse t̄o nchra ngajin jachée nchra.

36 Ko sen kichuunta, sen me e ícha xroningakon annta sen.

37 'Ko ngisen ícha tjue e ndotée o janée, kaxon sen tjue e ícha xitsi e o nchrichje en sen, sen me e tikinixien a sen xrorua na sen.

38 \*Ko ngisen tsama i ntacru, ko xroruana i sen, sen me e tikinixien a sen tsin in sen chujnina.

39 \*Ngisen tjaun a tsen en, sen me e tsen en sen, ko ngisen tsen en ixi jan an, ngajin sen me e jan an tsajon juachaxin tsechón sen kain nchakon.

*Ngisen tsjacha tsayé e naa nge e tsango jian*  
(Mr. 9:41)

40 \*Ko nchakon xrojan ngisen xrondachro ixi chao tsatsinganta ngaxin in ndo a sen, sen me e xranchi xrokuayé e sen najan an, ko siá jan an tsayé ena sen kaxon Ndotána Dio, ndo xruan anna, tsayé e ndo sen.

41 Ngisen tsayé e ngaxin in ndo a naa sen nichja chijnie ndo Dio, sen me e tsayé e sen naa nge e tsango jian jii ngajni xranchi ti tsayé e sen nichja chijnie ndo Dio. Ko ngisen tsayé e naa chujni jian, chujni ndako nche e, sen me e kaxon tsayé e sen naa nge e jian jii ngajni xranchi ti tsayé e sen jian ko ndako nche e.

42 Ko ngisen tsajon nchiín ndakin tsi i naa chujni titikaonna, jan an xrotjá a sen me e naa nge e tsango tjintee tsayé e sen.

## 11

*Sen bikao chijnie Ndo Juan Bautista*  
(Lc. 7:18-35)

<sup>1</sup> Ndo Jesús juexin ndache ndo sen teyuu chrikao ndo nge e sinche e sen, tjume e sakjui ndo kaxin tjajna bijako ndo chijnie ndo Dio, tjajna tikinixin en Israel.

---

**10:38** Mt. 16:24; Mr. 8:34; Lc. 9:23.      **10:39** Mt. 16:25; Mr. 8:35; Lc. 9:24; 17:33; Jn. 12:25.      **10:40** Lc. 10:16; Jn. 13:20; Mr. 9:37; Lc. 9:48.

<sup>2</sup> Ndo Juan Bautista jije e ndo ndo achjiso, kuin en ndo ixi ndo Cristo jinhexruen en ndo chujni ko jinche e ndo kaxin ixra ícha ijié, méxin ndo Juan xruan an ndo yuu sen chrikao ndo ixi tsjanchangí e sen ndo Jesús.

<sup>3</sup> Tjume e sakjui sen bijanchiangí e sen ndo ko ndachro sen:

—¿Á suixinnta ngisen ti ndachro ndo Dio xroxruan an ndo ngajinna o xrochon anna inaa sen?

<sup>4</sup> Ko ja in juatingíexin ndo Jesús:

—Itjinta ko ndachenta ndo Juan nge e bikonta ko nge e kuin ennta.

<sup>5</sup> Teki énta ndo ixi sen tikon a, ó tikon sen, sen ntarengo ó ichrji sen ko sen kuachóna ichin lepra ó koxruen en sen, sen ntakuxro, tin en sen; kaxon sen tsiken en xechón sen ko sen nóa stetin en sen chijnie ndo Dio.

<sup>6</sup> Ndo Dio sintanchaonnta ndo ti nduaxin rua naninta ko tintuna ininta.

<sup>7</sup> Hora sakjui sen xruan an ndo Juan, ndo Jesús kuaxi ndache ndo chujni ngisen ndo Juan ko ndachro ndo:

—¿Ngisen kuitsje enta ti jii ijna? ¿Á kuitsje enta naa xi jixrato o xranchi naa ntatji tsijato o chrinto?

<sup>8</sup> Siá na i, ¿nge e kuitsje enta? ¿Á bikonta naa xi jitsáa jeoxón manta tjintee? Xraxaonnta ixi chujni stetsáa manta tjintee, ni me e je o ste na nchiando a xi rey.

<sup>9</sup> ¿Ngisen kuitsje enta tjume e? ¿Á bikonta naa xi jichrónga chijnie ndo Dio? Jaán nduaxin, ko jan an ntatjunta ixi ndo Juan ícha tjintee ndo ixi sen kuachronga chijnie ndo Dio ó sa ó.

10 Ji i ndo xroxruan an ndo Dio xranchi jichrónga xroon chijnie ndo ó sa ó:  
Jan an xroxruan an naa ngisen tsitaon nti a tsikao sen chijnina,

ko sinchenataonxin sen cha o.

11 Ko jan an nduaxin ndachrjan ixi kain sen jongí e ko bake e ngataon nunte nti i, ni naa sen tjinte a sen xranchi tjintee ndo Juan tikitée chujni. Ko naa sen ícha tjinte a jii ti tetuan an ndo Dio, sen me e ícha tetuan an sen ixi ndo Juan.

12 \*Nchakon kuaxi nichja ndo Juan Bautista chijnie ndo Dio, nchakon me e ko ti jai, tsango tangi stetayé e sen chijnie ndo Dio ko ti tetuan an ndo, ko je o sen xronka i, sen me e tsjacha tsayé e juachaxien ndo Dio.

13 Itsjé sen kuanichja chijnie ndo Dio ko kaxon chijni tsiketuan an ndo Moisés ndachro kain ti xrokron en ti xrokuíjja ndo Juan.

14 \*¿Á tsitikaonnta o na i?, ixi nchakon tsindachro ndo Dio ixi xroxruan an ndo ndo Elías, ji i jinichja ixi ndo Juan tikitée chujni.

15 Ko ngisen chónnda ndatsjon, sen me e chao tsin en sen ji i.

16 ¿Xranchi tsjako anta ti nche e chujni jichón jai? Nche e na xranchi nche e kaxin ichjan stesondaon ti jii ntaasin, ko ja in stetoyako xjan:

17 “Kuanoana ntaxro ko ja anta té anta. Itsjena sóen chujni tsiken en ko ja anta tsjanga inta.”

18 Ixi kuij ndo Juan juine a ndo ko kui a ndo ixi juinchekatse ñao ndo jinta, ko ja anta ndachronta ixi espíritue Xixron anxrée chónnda ndo.

<sup>19</sup> Ko jui i jan an, Chjen en ndo Dio, xjan jongí e xranchi chujni, juiné ko kui i, ko ndachronta ixi tsango itsjé iné ko tsango yee ti i ko tjento ni tjáka tomie xi tetuan an ko ni ndako a nche e. Ko jian xraxaonnta ixi ti ixra jian ton en me e tjako ixi ndo Dio tsango no e ndo.

*Tsango tangi tson en tjajna titikaon a  
(Lc. 10:13-15)*

<sup>20</sup> Tjume e ndo Jesús kuaxi kuyakutee ndo chujni ste nti a ixi tjajna me e juinchexruen en ndo kueya chujni ko ikaxin ixra ijié juinche e ndo ko chujni me e kuitikaon a na ko kuindoxin a na ti ndako a kuanche e na.

<sup>21</sup> Tjume e ndachro ndo:

—Ja anta ti stenta tjajna Corazín ko ja anta ti stenta tjajna Betsaida, tsango tangi tson annta!, ixi siá xrokoxruen en kain ni ni e ko xrokon en kain ti jian ngajin tjajna Tiro ko tjajna Sidón xranchi ti kon en nti i, je e ni me e xrokuindoxin na ti ndako a kuanche e na ko xrokuitsáa na manta tiie ko xrokuintjítee na ntesoki i jaa na ixi jaña xrojuako na nduaxin tjaun na ísinche a na ti ndako a.

<sup>22</sup> Méxin nduaxin xrontatjunta ixi nchakon tsoña ijié, ni tjajna Tiro ko ni tjajna Sidón, ícha tangi a tson en na xranchi ja anta.

<sup>23</sup> Ko ja anta chujni tjajna Capernaum, á xraxaonnta ixi ti jii ngajni tsajinnta. Na i, ja anta xroxingajinnta ti ste ni tsiken en, ixi siá tjajna Sodoma xrokoxruen en chujni ko xrokon en kain ti ixra ijié kon en ngajin tjajnánta, tjajna me e xraxrobake e tjajna ngata a nunte jai.

24 \*Méxin nchakon tsjexin kain nge e, ndo Dio sinchéña ndo ijiē ko ícha tangi tson annta ja anta ixi chujni tjajna Sodoma.

*Xrokuiinta ngajin, me e tsjoka anta  
(Lc. 10:21-22)*

25 Hora me e ndo Jesús nichja ndo ngajin Ndotée ndo ko ja in ndachro ndo:

—Ndotána, tjá anta juasiana, Nchéé ngajní ko nunte xasintajni, ixi ja anta kuemé enta chujni tsango no e ko ni tsango tsikangi xroon, ko juinчекue ennta kain ji i ngajin sen nchejié a aséen.

26 Ndotána, jaña kon en ixi ja anta jaña fiaonnta.

27 \*Ko ndache ndo ni ste nti a:

—Kain nge e chjána Ndotána ko je o je e ndo chuxinna ndo jan an, Chjen en ndo, ko kaxon xro an ngisen chúxin je e ndo, je o Chjen en ndo, ko jan an, Chjen en ndo, nichja a chujni ixi jaña je e nā tsichuxin nā Ndotána.

28 Ja anta ti richondanta juachjaon ko konchrjenta, Xrokuiinta ngajin jan an ko jan an tsajon juaxruxin tsjoka anta.

29 Titikaonnta ti ndachrjan ko toñaο anta ko nchejié a asáanta xranchi jan an ntajié a aséenna, me e jaña chao juaxruxin tsinteenta.

30 Ko ti ndachrjan sinche enta tangi a ko ixrā tajon sinche enta, ixrā me e tangi a xrā.

## 12

*Sen chrjikao ndo Jesús kuantsjengí sen trigo nchakon tjoké e na*

*(Mr. 2:23-28; Lc. 6:1-5)*

<sup>1</sup> Naa nchakon tjoké e sen judío, ndo Jesús ko sen teyuu chrikao ndo kuatsinga sen ti jii naa nunte tsikinga noatrigo; sen teyuu chrikao ndo kuen en sen jinta, méxin kuaxi sen kuantsjengí sen trigo ko juine sen noa.

<sup>2</sup> Ko ni fariseo bikon na nge e stenze e sen teyuu chrikao ndo Jesús ko ndachro na:

—¿Á ritsje e nge e stenze e ni chrjiko a ixi jai nchakon tjoké eni?, jua i sinche e ni jaña.

<sup>3</sup> Ko je e ndo juatingíexin ndo:

—¿Á noa inta nge e jitaxin xroon ti juinche e ndo rey David ko sen chrikao ndo, hora kuen en sen jinta?

<sup>4</sup> Kuixin in sen ndo a ndo Dio ko juine sen nutja tikinixin en ndo, ko je e ndo David ko sen rué e ndo, je e sen tikinixin a sen xrojuine sen nutja me e; je o sen taana.

<sup>5</sup> Kaxon, ¿á bikon anta xroon tsikjin ndo Moisés ti ndachro ixi ndotaana chao nche e ndo ixra ngaxin in ni ngo nchakon tjoké eni ko xro an ijié kuama ndotaana?

<sup>6</sup> Ko nduaxin xrontatjunta ixi ngisen jinichja anta jai ícha tetuan an ixi ni ngo.

<sup>7</sup> \*Ko ja anta tienxin anta ti ndachro xroon chijnie ndo Dio: “Jan an ndo Dio tjaun a tson inta iko ko tsjaakanta jnié ba tsayá a jan an. Jan an tja on tsingijnanta ko xrotjue e kichuunta”, siá



xrokuienxinnta chijni ji i, xrojuankata inta ijië ngata a chujni xro an nge e sínká.

<sup>8</sup> Ko Chjen en ndo Dio, xjan jongí e xranchi chujni, chónða xjan ijié juachaxin ngata a nchakon tjoké eni —ichro ndo Jesús.

*Ndo Jesús juinchexruen en ndo naa xi tsixema itja*

*(Mr. 3:1-6; Lc. 6:6-11)*

<sup>9</sup> Ndo Jesús sakjuixin ndo nti a ko tjume e kuixin in ndo naa ningue ni judío.

<sup>10</sup> Ko nti a jii naa xi tsixema naa itja ko nti a kaxon ste kaxin xi fariseo ko tjaun xa tsjankata a xa ijië ngajin ndo Jesús, méxin juanchangi e xa ndo:

—¿Á chao tsoxrue en naa sen ni e nchakon tjoké eni?

<sup>11</sup> \*Ko ndo Jesús ndachro ndo:

—¿Á xrojan ja anta chondanta naa kutuchjon ko iko me e xrokuitsingaya ba naa tuye nchakon tjoké eni, á xrokjui anta ko xrokuantsjenta ba?

<sup>12</sup> Naa chujni ícha tjintee ixi naa kutuchjon. Méxin, chao sinche eni ti jian maski nchakon tjoké eni.

<sup>13</sup> Tjume e ndache ndo xi ni e:

—Tinxe tjáa.

Ko je e xa kuinxe itja xa ko itja xi me e tuinxin koxruen en.

<sup>14</sup> Tjume e xi fariseo kuachrxjexin xa ni ngo ko stetoñao xa ko stexraxaon xa xranchi sinche e xa ixi tsóña xa ndo Jesús.

*Ndo Jesús, ndo tsikinche e ndo Dio*

15 Ndo Jesús kono e ndo ixi nge e stexraxaon xi fariseo, me e sakjuixin ndo nti a ko kueya chujni rué e ndo ko juinchexruen en ndo kain chujni ni e,

16 ko kuetuen en ndo chujni rué e ndo ixi xrochronga i nã ngisen je e ndo.

17 Ja in kon en ixi ó sée tsichronga ndo Isaías chijnie ndo Dio:

18 Ndo kuincha a, nti i jii ndo ngajinnta, ndo sinche e ixrã ngajin,

jan an tsango tjua a ndo ko je e ndo tsango nchexruxin en ndo aséenna,

ko jan an tsakée espírituna ngata a ndo

ixi je e ndo xrochronga ndo chijnina ngajin kain tjajna jii ngata a nunte xasintajni,

ko chijnina me e tsóñaxin ijie ngata a kain chujni tsitikaon ana.

19 Tsjakaxin a ndo ko xro an ngisen tsuyaku e ndo, méxin tsien a nã té e ndo ngaya cha o.

20 Ko ísincheníe a ndo sen ó tsikoni e, ko jua i naatsóñaxón ndo sen ó jite en.

Na i.

Je e ndo sinchesoji ndo aséen sen soji a

ko je e ndo sinche e ndo ixrã tsija nchakon je e ndo sinchéña ndo ijie.

21 Ko kain chujni nunte xasintajni xrochuntia nã ngajin ndo.

Jaña tsichronga ndo Dio ó seno.

*Ni fariseo tjangi e nã ndo Jesús*

*(Mr. 3:19-30; Lc. 11:14-23; 12:10)*

22 Kaxin chujni bika o nã naa xi ni e ixi ndo Jesús sinchexrjuen en ndo xa. Xi me e tikon a xa ko nichja i xa ixi chón da xa espíritue Xixron anxrée.

Ko ndo Jesús juinchexruen en ndo xa ko tuinxin nichja xa ko bikon xa.

<sup>23</sup> Ko kain chujni ste nti a xronka n̄a ko tjan-changí e kichuu n̄a:

—¿Á je a ji i ndo Jesús, ndo xroxruan an ndo Dio tsikachrjenixin ndo David?

<sup>24</sup> \*Ko kuin en xi fariseo ixi jaña stenichja n̄a, méxin ndachro xa:

—Xi Jesús ji i tantsje xa espíritu ña i ixi chónnda xa juachaxien Xixron anxrée, xi tsango ña i, xi tetuen en kain espíritu me e.

<sup>25</sup> Ko je e ndo no e ndo nge e stexraxaon xa, me e ndachro ndo:

—Xro an nación jii, ixi je o n̄a tsinteketoka o kichuu n̄a, ko siá jaña sinche e n̄a, nación me e tsjexin. Ko naa tjajna ti tinteketoka o kichuu n̄a, kaxon tuinxin ni me e xrochjeke e n̄a ko tjajna me e tsitjáña tjajna. Kaxon naa ndo tata ko chjen en ndo, siá je o sen tsinteketoka o kichuu sen, sen nchia me e xrochjeke e sen ko tsitjáña sen.

<sup>26</sup> Ko siá Xixron anxrée je o xa tsantsje xa naa espíritu tikinixin en xa jixin in ngaxin in naa chujni, je o xa tsonchjejin xa ti tituan an xa.

<sup>27</sup> Ko ja anta ndachronta ixi jan an tantsje espíritu tikinixin en Xixron anxrée ixi je e xa chjána xa juachaxin. Siá nduaxin me e, ¿ngisen tajon juachaxin ngajin ni rua anta ixi je e n̄a tantsje n̄a kaxon espíritue Xixron anxrée? Ni rua anta me e tjakoxin n̄a ixi ja anta noa inta nge e nichjanta.

<sup>28</sup> Ko siá jan an ixi espíritue ndo Dio tantsjexin espíritu tikinixin en Xixron anxrée chónnda chujni,

me e xrondachro ixi juachaxien ndo Dio ó kuii ti ste ja anta.

<sup>29</sup> Xranchi xrojan chujni tee tjaun tixin in ndo a naa xi tsango soji ko tjaun tsee nge e jii ndo a xi me e, ¿á je a sa ó xrokonda tsitee xi ndo a ko tjume e tsantsje kain nge e jii ngaxin in ndo a xa?

<sup>30</sup> \*Ngisen titikaon a najan an, sen me e ningakonna sen, ko ngisen tingijna i ixra nta a, sen me e tingakon en sen.

<sup>31</sup> Méxin jan an ntatjunta chao tsomé e kain ti ndako a ko ti nichjangí chujni ngajin ndo Dio. Ko ngisen xronichjangí e Espíritue ndo Dio, sen me e jua i tsomé e ti ndako a nichja sen.

<sup>32</sup> \*Ko siá xrojan ngisen xronichjangí e Chjen en ndo Dio, xjan jongí e xranchi chujni, tsomé e kain ti nichjangí na ko ti ndako a juinche e na. Ko ngisen xronichjangí e Espíritue ndo Dio, nai a tsomé e ti ndako a nichja na.

*Ntaa tajon tu jian ko ntaa tajon tu xro an xrée  
(Lc. 6:43-45)*

<sup>33</sup> \*Naa ntaa jian tajon ntaa itu jian ko naa ntaa xro an xrée kaxon xro an xrée tu tajon ntaa. Méxin, naa ntaa tajon itu, itu tsichuxixinni ntaa.

<sup>34</sup> \*Ja anta tsikachrjenixinnta kunchee, ¿méxin, xranchi xronichjanta ti jian siá ja anta je a jiannta? Ixi chujni jian, nichja ti jian ko chujni ndako a nche e, nichja ti ndako a. Ixi ti nichja ro ani me e ti xin aséenni.

<sup>35</sup> Naa chujni jian nichja nge e ti jian ixi jian aséen. Ko chujni jian i, ti ndako a nichja n̄a, ixi ti ndako a jiá aséen n̄a.

<sup>36</sup> Ko jan an ntatjunta ixi tsji nchakon tsjexin kain nge e, nchakon me e sinchéña ndo Dio ijiē ngajin chujni tsinichja nge e ndako a.

<sup>37</sup> Ndo Dio sinchéña ndo ijiē ngajin ngujngu chujni, ngisen tsinichja jian, sen me e tso mé e ti ndako a juinche e sen ko sen ndako a tsinichja, sen me e tangi tson en sen.

*Ni ndako a nche e, tjaun n̄a ixi ndo Jesús tsjako ndo naa ixr̄a ijié*

*(Mr. 8:12; Lc. 11:29-32)*

<sup>38</sup> \*Tjume e kaxin xi fariseo ko ni tjako chijnie ndo Dio ndache n̄a ndo Jesús:

—Ja anta ti tjakonta, tja onna tsjako naninta naa nge e xrochronga á nduaxin ndo Dio xruan annta.

<sup>39</sup> \*Ko je e ndo Jesús juatingíexin ndo:

—Ja anta chujni ña i, ti chuntia inta ngajin ndo Dio, tjanchianta tsjáko naa nge e xrochronga á nduaxin ndo Dio xruan anna ndo, ko jan an je o xrontatjunta nge e kon en ndo Jonás, ndo kuachronga chijnie ndo Dio ó sa ó.

<sup>40</sup> Ndo Jonás bake e ndo ngaya tse e naa kubalena níi nchakon ko níi tiie, jaña kaxon Chjen en ndo Dio, xjan jongí e xranchi chujni, xrokonda xroxrabaa xjan níi nchakon ko níi tiie.

<sup>41</sup> Nchakon tsjexin kain nge e ko tsoñ̄a ijié, ni tja-jna Nínive tsingatjen n̄a ko tsjangi anta n̄a ko ndo Dio tsjankata anta ndo ijié, ixi ni me e, ni tja-jna

Nínive, tuinxin kuindoxin na ti ndako a kuanche e na nchakon kuin en na chijnie ndo Dio tsichronga ndo Jonás. Ko ja anta tin ennta chijnina ko tindoxin anta ti ndako a nche enta ko jan an ícha tjintena ixi ndo Jonás.

<sup>42</sup> Kaxon nchri reina tsiki xin no Níjin, naa tjanya tsango ikjín, kuii nchra kuin en nchra chijni kuanichja ndo Salomón, nchri me e tsankata anta nchra ijie nchakon tsoña ijie, ixi ja anta titikaon anta ti nichja maski jan an ícha tjintena ixi ndo Salomón.

*Espíritue Xixron anxrée ikjan*

*(Lc. 11:24-26)*

<sup>43</sup> Nchakon tachrxexin naa chujni naa espíritue Xixron anxrée ko ichrji ti jii nunte xema ko titja i inaa chujni no tixin in ixi tsjoké e, me e ndachro:

<sup>44</sup> “Cháña xrokjanna nía ti kuachrxexin ko tsixin in nti a íjngo.” Ko ti ikjan espíritu ña i nchia me e, xro an ngisen jixin in nchia ko tjúa nchia.

<sup>45</sup> Tjume e itji espíritu ña i ko tikao íjngo yaato espíritu nche e ixra ngajin Xixron anxrée ícha ña i. Ko kain espíritu ña i tixin in ngaxin in chujni me e, ko chujni me e ícha chjinga tson en ixi ti nchakon kuachóna naakua espíritu ña i. Jaña tson en kain chujni ndako a nche e jai.

*Janée ndo Jesús ko sen kichuu ndo*

*(Mr. 3:31-35; Lc. 8:19-21)*

<sup>46</sup> Ko ndo Jesús xrajnichja ndo ngajin chujni ste nti a, janée ndo ko sen kichuu ndo kuiji sen ti jii ndo ko stechón en sen nduja ixi tjaun sen xronichje e sen ndo.

<sup>47</sup> Ko naa sen jii nti a ndache sen ndo Jesús:

—Janáanta ko sen kichuunta stechón en sen nduja xixi tjaun sen xronichja anta sen.

<sup>48</sup> Ko je e ndo Jesús ndachro ndo:

—¿Ngisen nduaxin janána ko sen kichian?

<sup>49</sup> Tjume e juakoxin itja ndo ngajin sen teyuu chrikao ndo ko ndachro ndo:

—Sen ji i me e janána ko sen kichian,

<sup>50</sup> xixi sen nche e nge e tjaun Ndotána jii ngajní, sen me e janána ko sen kichian.

## 13

*Ndo Jesús juakoxin ndo chijni tinga ngaya chjaka*

*(Mr. 4:1-9; Lc. 8:4-8)*

<sup>1</sup> Nchakon me e ndo Jesús kuachrjexin ndo nchia jii ndo, tjume e sakjui ndo ngande e ndachaon\* ko nti a bake e ndo nunte xixi sinchekuen en ndo chujni.

<sup>2</sup> \*Ko tsango kueya chujni konchjiñe e xixi tjaun na tsin en na nge e xronichja ndo. Méxin ndo Jesús kuajin in ndo naa ntábarco ko nti a bake e ndo nunte ko chujni kuiji na ti jii nchese ngande e inda.

<sup>3</sup> Ko kueya chijni beki e ndo na xixi jaña tsienxin chujni nge e xronichja ti nichja ndo, Ko kuaxi beki ndo naa chijni ko ndachro ndo:

—Sakjui naa xi bikenga xa,

<sup>4</sup> ko hora jitenga xa, kaxin noatrigo kuintjí noa ngatja cha o ko kuu kuxe juine ba noa.

---

\* **13:1 ndachaon** mar **13:2** Lc. 5:1-3.

<sup>5</sup> Ko kaxin noa kuintjí ngakjen en ixro ti ko a itsjé inche, ko noa me e tuinxin kuachrje no ixi tjín a inche.

<sup>6</sup> Ko hora kuachrje chjiixro, katrigo me e xe nte ka ko xema ka ixi yasoe a jii nue e ka.

<sup>7</sup> Ko kaxin noa kuintjí ngakjen en nt̄acha a ko hora kuangi no, nt̄acha a me e kuintue a nt̄acha kuangi no.

<sup>8</sup> Ko kaxin noa kuintjí noa ti jii inche jian, méxin tsango jian kóña noa. Ko kaxin katrigo kuachóna naa ciento noa, ko kaxin katrigo kuachóna ní ti ikán† noa, ko kaxin katrigo kuachóna ikánte noa.

<sup>9</sup> Sen chao tin en, xrokonda tsin en sen ji i.

*Sonda ndo Jesús nichjaxin ndo chijni*

*(Mr. 4:10-12; Lc. 8:9-10)*

<sup>10</sup> Tjume e sen teyuu chrikao ndo Jesús konchjiñe e sen ngajin ndo ko juanchangi e sen ndo:

—¿Sonda je o chijni tjakoexinnta chujni?

<sup>11</sup> Ko je e ndo Jesús ja in juatingíexin ndo:

—Jan an beki anta kain chijni jimá kondee ti tetuan an ndo Dio, ko ngajin ni kaxin xrontatjan i na.

<sup>12</sup> \*Ngisen no e ícha jian chijni ne e ndo Dio, ndo Dio ícha sinchekuen en ndo sen. Ko ni tjaun a tsienxin chijni ti tetuan an ndo Dio, ndo Dio sinchemé e ndo ti nchion no e na.

<sup>13</sup> Méxin jan an ntakuan ana ixi chijni, ixi ni tikon, jua i tsichuxin na ti tikon na, ko ni tin en, ti tin en na, tsienxin a na.

† **13:8** ikán veinte      **13:12** Mt. 25:29; Mr. 4:25; Lc. 8:18; 19:26.



<sup>14</sup> Jaña tson en ixi nge e tsichronga ndo Isaías, ndo kuanichja chijnie ndo Dio ó sa ó:  
 Chujni ji in maski ícha tsin en na,  
 je e na tsienxin a na,  
 ko maski stetsje e na,  
 je e na tsikon a na.

<sup>15</sup> Ixi aséen chujni ji i tsango tsikoncha ko ndatsjon na jije e ko steje e ikon na ixi jaña jua i tsikon na ko jua i tsin en na, méxin, jua i sintama a ti ndako a nche e na ko jua i syntaxruan an na.

<sup>16</sup> \*Tjume e ndachro ndo Jesús:

—Ja anta ti rua naninta, tsango juaxruxin tin-teenta ixi ndo Dio kuajon ndo juachaxin chao tikonnta ko tienxinnta ti nichja.

<sup>17</sup> Ko nduaxin xrontatjunta ixi itsjé sen kuachronga chijnie ndo Dio ko ikaxin chujni tjúa aséen, xrojueña sen xrobikon sen ti tikon ja anta, ko bikon a sen ko kuien a sen.

*Chronga ndo Jesús xranchi xrondachro ti chijni  
 (Mr. 4:13-20; Lc. 8:11-15)*

<sup>18</sup> 'Jai tin ennta nge e xrondachro ti xi ikjui bikenga hjaka.

<sup>19</sup> Ngisen tin en chijni chronga xranchi tetuan an ndo Dio ko tienxin a sen ti kuin en sen, me e tij Xixron anxrée nchetjáñajin xa sen, méxin tjáñe e sen ti kuin en sen, me e xrondachro ti noa kuintjé ngande e cha o.

<sup>20</sup> Ko noa kuitsinga ti jii ixro me e xrondachro ngisen kuin en chijni chronga xranchi tetuan an

ndo Dio ko sen me e juinche e sen juaxruxin ti kuin en sen.

<sup>21</sup> Ko kuienxin a sen ndako nge e xrondachro ti chijnie ndo Dio, méxin juaxruxin kuachóna sen tuinxin juexin ixi kuij juachjaon kondeexin ti kuitikaon sen ndo Dio, méxin kuachrjendáa sen.

<sup>22</sup> Ko noa kuitsinga ti jii ntacha a me e xrondachro ngisen tin en chijnie ndo Dio ko tindoxin a sen ti ndako a nche e sen ko ícha nche e sen juaxruxin tomi ko kain ti tjintee jii ngata a nunte. Me e nche a sen ti jian.

<sup>23</sup> Ko noa kuitsinga ngata a inche jian me e xrondachro ngisen tin en chijnie ndo Dio ko tienxin sen ko taxi nche e sen ti tetuan an ndo Dio. Sen me e nche e sen xranchi kaxin katrigo tajon ka ngujngu ciento noa ko kaxin ka tajon ka níkán noa ko ikaxin ka tajon ikánte noa.

*Ndo Jesús juakoxin ndo chijnie ka ña i kuangika o ka noa trigo*

<sup>24</sup> Tjume e ndo Jesús juakoxin ndo inaa chijni ndachro ja in:

—Ti tetuan an ndo Dio ton en xranchi naa ngisen kuenga jian nunte e.

<sup>25</sup> Ko hora juexin nchakon, kain sen sakuintejua sen ko naa xi ningakon en sen, ikjui xa bikenga xa ngakjen en trigo naa tsee kaña i ndatin in cizaña, ko sakjui xa.

<sup>26</sup> Ko nchakon kuachrje ka trigo ko kuaxi kuajon ka tién ka, sen nchexra bikon sen ixi kaxon ika ña i tsikangi ka.

<sup>27</sup> Ko kuichronga sen ngajin nchée sen ko ndachro sen: “Nchána siá ja anta kuenganta noa

trigo, noa jian, ¿ti no tsiki x̄in ika ña i tsikangika o noa jian?”

<sup>28</sup> Ko nchéé sen juatingíexin: “Naa xi ningakonna tsijinche e ña.” Tjume e sen nchexr̄a ndachro sen: “¿Á tjaunnta itsjina tsikantsjengina kaña i?”

<sup>29</sup> Ko ndachro nchéé sen: “Na i, ixi hora tsantsjengínta ka ña i, ba tsantsjengínta ka trigo ixi naxraje o tsje e ka.

<sup>30</sup> Nchakon xroxėjo noa, me e tsichuxinni noa trigo ko kaña i. Tintu enta ka tsangika o kichuu ka tsija nchakon xroxėjo tsee. Me e tsetuan an sen nchexr̄a sa ó tsjejo sen kaña i, ko tsjasintja sen kichuu ka ko tsjaaka sen ka ixi xro i, ko tjume e xroxraka noatrigo ko itsji noa ti tsasin inni noa.”

*Ndo Jesús juakoxin ndo chijnie tsee mostaza  
(Mr. 4:30-32; Lc. 13:18-19)*

<sup>31</sup> Ndo Jesús juakoxin ndo naa chijni ndachro ja in:

—Nchijí ti tetuan an ndo Dio ton en xranchi naa tsee ntāa mostaza tsikenga naa xi ngata a nunte e xa.

<sup>32</sup> Ko tsee me e tsango nchíín tsee ko nchakon tsangi ntāa mostaza, ntāa me e ntāa ícha ijié ixi ikaxin ntāa ko kuxe nchéña ba kakée ba ngata a chaan ntāa.

*Ndo Jesús juako ndo chijnie ti nchetja in chu u  
(Lc. 13:20-21)*

<sup>33</sup> Ndo Jesús juakoxin ndo inaa chijni:

—Nchijí ti tetuan an ndo Dio ton en xranchi naa nchri itsé nchra nchíín chu u nchetja in itsjé chue nutja, ko nchion chu u me e nchetsjé chue nutja.

*Ndo Jesús juinche e ndo ti tsindachro naa ndo kuachronga chijnie ndo Dio ó sa ó*

*(Mr. 4:33-34)*

<sup>34</sup> Ndo Jesús juinchekuen en ndo chujni itsjé nge e ixi bakeki e ndo na ixi chijni; ko je o chijni banchekuenxin ndo na.

<sup>35</sup> Jaña ndo Jesús juinche e ndo nge e ndachro naa sen tsichronga chijnie Dio ó sa ó:  
Jan an xronichja a chujni ixi chijni  
ko tseki a na nge e ti jimá kuachónnda ndo Dio, ti tsixrangixixion juinchéña ndo nunte xasintajni.

*Kaña i ko katrigo*

<sup>36</sup> Juexin nichje e ndo Jesús chujni ste nti a, tjume e kuixin in ndo nchia, ko konchjiñe e sen teyuu chrikao ndo ko ndachro sen:

—Ndachijininta nge e xrondachro ti ika ña i bangika o ka trigo.

<sup>37</sup> Ko ndo Jesús ndachro ndo:

—Sen bengá noatrigo me e Chjen en ndo Dio, xjan jongí e xranchi chujni.

<sup>38</sup> Ko chjaka xrondachro chujni ste ngata a nunte xasintajni. Ko noatje xrondachro chujni kuayé e juachaxin tsin in chjen en ndo Dio ko tsitikaon ti tetuan an je e ndo. Ko ika ña i me e chujni nche e xrée Xixron anxrée.

<sup>39</sup> Ko xi toñaó, xi kuenga kaña i me e Xixron anxrée. Ko ti tsandáani me e xrondachro nchakon tsoña kain ijie ko tsjexin kain nge e. Ko sen tsandáa me e sen ángel ne e ndo Dio.

<sup>40</sup> Ko kaxon ti xroxexo kaña i ko tsixintja kichuu ka ko xroche ka, me e xrondachro ti tsoña ijie nchakon tsjexin kain nge e.

<sup>41</sup> Ko Chjen en ndo Dio, xjan jongí e xranchi chujni, tsetuen en xjan sen ángel ne e xjan itsji sen nchijí ti tetuan an ndo Dio, ko tsejo sen chujni ndako a nche e ko ni nchekateya ikaxin chujni sinche e ti ndako a.

<sup>42</sup> Ko sen ángel me e tsjankaya sen chujni ña i ti jii xro i xranchi naa itja; nti a xrotsjanga chujni me e ko tse to neno na.

<sup>43</sup> Ko kain sen juinche e ti jian, sen me e tsongixin sen xranchi chjiixro ti tetuan an ndo Dio. Méxin siá chondanta ndatsjonnta, jian tienxinnta ji in.

### *Tomi jimá*

<sup>44</sup> Ti jii no tetuanxin ndo Dio ton en xranchi tomi tsango tjintee jixrabaa. Ko naa ngisen kuitja tomi me e ko sen me e íjngo juabaa sen tomi. Ko tsango ché e sen, méxin sakjui sen kuinchekji sen kain ti chóna sen ko tomi tsjejo sen me e tse naxin sen nunte ti no jixrabaa tomi kuitja sen.

### *Naa ixro tsango tjintee.*

<sup>45</sup> Kaxon ndo Jesús ndachro ndo:

—Ti jii ti tetuanxin Dio kaxon ton en xranchi naa xi tachríi ixro tsango chaxro.

<sup>46</sup> Ko nchakon kuitja xa naa ixro tsango tjintee, sakjui xa kuinchekji xa kain ti nge e tjintee kuachóna xa ko ikjan xa ko kue na xa ixro me e.

### *Ndo Jesús juakoxin ndo ixi naa nocha a tséxin na kucheé*

<sup>47</sup> Tjume e ndachro ndo Jesús:

—Ti jii ti tetuan an ndo Dio jii xranchi naa nocha a, ko sen itsé kucheé tjanka ngi sen nocha a me e ixi xrotsé sen ngixe i kucheé jingi inda.

48 Ko hora kaon nocha a, tantsjengi sen nocha a ngande e inda ko nti a tsinche e sen kucheę jian ko tenga sen ba ngaya ntaxra. Ko kucheę xro an xrée tjanka sen ba.

49 Jaña tson en nchakon tsjexin kain nge e ngata a nunte xasintajni. Itsji sen ángel tsinche e sen chujni jian ko chujni ndako a nche e.

50 Ko tsjánkaxin in sen ni ndako a nche e ti jii xro i nai a tanga ko nti a xrotsjanga nã ko tse to neno nã ixi tsango ijié juachjaon jii nti a.

*Nge e natjúá ko nge e ó ntaxi*

51 Ndo Jesús juanchangi ndo:

—¿Á tienxinnta kain ti rintakuan annta?

Ko je e sen juatingíexin sen:

—Jaán, Nchána, tianxinna.

52 Ko ndachro ndo:

—Kain sen tjako ley ne e ndo Dio ko taxi tienxin sen nge e xrondachro ti juachaxin tetuan an ndo Dio, sen me e nche e sen xranchi naa xi chónnda itsjé nge e ngaxin in naa nchia ijié, ko nti a tantsjexin xa ti natjúá ko ti ntaxi.

*Ndo Jesús ikjui ndo tjajna Nazaret*

*(Mr. 6:1-6; Lc. 4:16-30)*

53 Ko hora juexin juinçekuen en ndo nã kaxin chijni, ndo Jesús sakjuixin ndo nti a,

54 ko kuiji ndo tjajnée ndo, tjajna Nazaret. Kuaxi ndo juinçekuen en ndo chujni ngaxin in ningue ni Israel. Ko chujni me e xronka nã ko stendachro nã:

—Xi ji i, ¿ti no tsikitjaxin xa kain ti nichja xa ko xranchi nche e xa kain ixrã ijié?

55 Ko ikaxin nã stendachro nã:

—¿Á je a ji i chjen en ndo José, ndo tame e ntaa, ko janée xa jan María ko xi kichuu xa, xi Santiago, José, Simón ko xi Judas?

<sup>56</sup> Ko tjanya nti i ste kaxin nchri kichuu xa. ¿Xranchi no e xa kain ji in ko xranchi nche e xa kain ti ixra ijié?

<sup>57</sup> \*Ko ninaa ni ste nti a kuitikaon a na nge e juako ndo Jesús. Méxin ja in ndachro ndo:

—Kain tjanya chujni tajon na juasie na ngajin naa ndo chronga chijnie ndo Dio. Ko ni tjanée ndo, na i, ko kaxon ni ndo a ndo tjaun a na tajon na juasie na.

<sup>58</sup> Ko ixi titikaon a ni tjanée ndo, méxin tsjé a chujni juinchexruen en ndo nti a.

## 14

### *Xranchi kuen en ndo Juan bikitée chujni* (Mr. 6:14-29; Lc. 9:7-9)

<sup>1</sup> Nchakon me e xi ndatin in Herodes Antipas, xi tituen en nunte Galilea, kuin en xa ti kuanichja chujni nge e jian kuanche e ndo Jesús.

<sup>2</sup> Ko naa nchakon ndache xa ni nchexrée xa:

—Xi Jesús me e xi Juan Bautista ko jai tsixechón xa. Méxin chóna xa ijié juachaxin nchexruen en xa chujni.

<sup>3</sup>\*Xi Herodes tsixraxin in xa ndo Juan, ngaxin in ndo a chjiso ko nti a tsikintee xa ndo ixi chika cadena kondeexin nchri Herodías, nchrinchri e xi Felipe, xi kichuu xi Herodes

<sup>4</sup>ixi tsindache ndo xa:

—Ndako a juinche e ja a ixi kuantsje e xi kichuua, Felipe, nchrinchri e xa, nchri Herodías, ko kuta a nchra.

<sup>5</sup> Xi Herodes tjaun xa naaxrokóñaxón xa ndo Juan, ko jua i ixi kuaxrakon en xa chujni ixi kain ni tjajna me e titikaon na ixi je e ndo Juan me e naa ngisen nduaxin tjako chijnie ndo Dio.

<sup>6</sup> Ko nchakon kuitja xa nano, juinchéña xa kiée xa, ko nchrixajo en xa, nchrichje en nchri Herodías, chaxro ité nchrichan ko bikon kain ni ikjui kiée xa. Ko tsango juinche e xa juaxruxin xranchi ité nchrichan,

<sup>7</sup> méxin ndache xa nchrichan ko nichjaxin xa ngatoxin ndo Dio ixi nduaxin tsajon xa ngajin nchrichan ngixe i nge e xrojuanchia nchrichan.

<sup>8</sup> Ko nchri Herodías juinche kateya nchra nchrichje en nchra, méxin ja in ndachro nchrichan:

—Chjánana ngaya naa laato jaa xi Juan tikitée chujni.

<sup>9</sup> Ko xi rey Herodes tsango koni e aséen xa ixi ti juanchia nchrichan ixi je e xa tsindachro xa ixi nduaxin xrokuajon xa ti xrojuanchia nchrichan ko ixi kain ni ste nti a kuin en na, méxin kuituan an xa tson en xranchi ndachro nchrichan.

<sup>10</sup> Ko kuetuan an xa ixi tsonchrijin na jaa xi Juan ngaxin in ndo achjiso.

<sup>11</sup> Ko tjume e bika o na jaa xi Juan ngaya naa laato ko kuayé e nchrichan, ko je e nchrichan kua-jon nchrichan jaa xa ngajin janée nchrichan.

<sup>12</sup> Ko kuin en sen chrikao ndo Juan ixi jaña tsikon en, me e juirue e sen ndo ko juabaa sen ndo,



ko tjume e kuichronga sen ngajin ndo Jesús nge e kon en.

*Ndo Jesús kuajon ndo juine na ó mil chujni  
(Mr. 6:30-44; Lc. 9:10-17; Jn. 6:1-14)*

<sup>13</sup> Ko hora kuin en ndo Jesús ixi jaña tsikon en ndo Juan, kuixin in ndo ngaxin in naa ntábarco ko sakjui ndo ti xro an chujni jii ixi je o ndo tjaun ndo tsake e ndo. Ko kain chujni kuin en ixi sakjui ndo ko kueya nã kuachrxexin nã tjajnéé nã ko tutée nã ruexin nã ndo.

<sup>14</sup> Ko hora kuachrxexin ndo Jesús ntábarco, bikon ndo ixi tsango itsjé chujni jii nti a, bikonóe e ndo nã ko juinchexruen en ndo kain ni nie tsikika o nã.

<sup>15</sup> Ko ó jitondaya nunte ko sen teyuu chrikao ndo Jesús konchjiñe e sen ngajin ndo, ko ndachro sen:

—Ó jitóndó ko nti i xro an nge e jii sinena. Cháña ndachenta nã satsji nã naa tjajna tsijée nã naa nge e sine nã.

<sup>16</sup> Ko je e ndo Jesús ja in juatingíexin ndo:

—Na i. Xrokonda i satsji nã. Ja anta chje énta nã nge e sine nã.

<sup>17</sup> Ko je e sen juatingíexin sen:

—Xro an nge e chondana, je o na ó nutja ko yuu kucheé.

<sup>18</sup> Ko je e ndo Jesús ndachro ndo:

—Kuaxinta nti i nge e chondanta.

<sup>19</sup> Ko kuetuan an ndo chujni tsjoké e nã ngata a kayua ko itsé ndo ti na ó nutja ko ti yuu kucheé ko tsje e ndo ngajni ko kuajon ndo juasie ndo ngajin ndo Dio. Tjume e konchrinjin ndo nu ko

kuajon ndo nu ngajin sen teyuu chrikao ndo ko kao kucheē tsonchjeye e sen chujni.

<sup>20</sup> Ko kain nā juine nā jian, ko kaon nā. Ko juexin juine kain chujni, sen teyuu chrikao ndo Jesús juejo sen ti xe e, teyuu ntaxra.

<sup>21</sup> Ko ni juine xranchi na ó mil je o chujni xi, ko beki a sen sen nchri ko ichjan.

*Ndo Jesús itji ndo ngataon inda  
(Mr. 6:45-52; Jn. 6:16-21)*

<sup>22</sup> Ko tjume e kuituen en ndo Jesús sen teyuu chrikao ndo ko ndachro ndo:

—Tajiínta ntábarco ko tatsingato enta ndachaon. Jan an tsituna nti i xrontatjan chujni satsji nā ko banchixon xrorua anta.

<sup>23</sup> Ko juexin chjeke e chujni, ndo Jesús sakjui ndo naa ijnā je o ndo ixi nti a xronichje e ndo ndo Dio. Ko nti a je o ndo bake e ndo ko ó tiie.

<sup>24</sup> Ko ntábarco ó kuiji ntāā ngusine ndachaon ko kuaxi binga naa chrinto tsango soji ko inda jijamangitaon nda ko tjaun nda tsonjamangi nda ntábarco, ko ícha jitosoji chrinto.

<sup>25</sup> Ko ndúyo xranaxixe e ndo Jesús konchjiñe e ndo ti jii ntábarco ko jitixin tutée ndo ngata a nda.

<sup>26</sup> Ko sen teyuu chrikao ndo bikon sen naa ngisen jitixin tutée ngata a nda ko juatsuan i sen ndo, méxin tsango xronka sen ko kuyako sen séen:

—¡Naa ntacha an, naa ntacha an!

<sup>27</sup> Ko ndo Jesús tuinxin nichje e ndo sen:

—Xrakon anta ixi jan an jui i.

<sup>28</sup> Ko ndo Pedro juatingíexin ndo ko ndachro ndo:

—Nchána, siá nduaxin ja anta, tituan annta ixi jan an kaxon tsjixin tutéena ngata a inda ko tsjaso ti ritjennta.

<sup>29</sup> Ko ndo Jesús ndachro ndo:

—Xrokuia.

Ko tuinxin ndo Pedro xingajinxin ndo ntábarco ko kuaxi juixin tutée ndo ngata a nda ti no jii ndo Jesús.

<sup>30</sup> Ko chrinto soji juinchexronka ndo Pedro ko jitaxin jitenunte ndo chringi inda ko kuyako ndo:

—Nchána, ¡tingijnaninta!

<sup>31</sup> Ko ndo Jesús tuinxin koka itja ndo ko itsé ndo ndo Pedro ko ndachro ndo:

—Pedro, ¿sonda tsango nchion chuntiana ko sonda xronka?

<sup>32</sup> Ko tjume e yui sen kuajin in sen ntábarco ko tuinxin kuíxin chrinto.

<sup>33</sup> Ko sen stexin in ntábarco bake exin ntatuchi in sen ngajin ndo Jesús ko ndachro sen:

—¡Nduaxin Chjen en ndo Dio ja anta!

*Ndo Jesús juinchexruenen chujni ni e nunte Genesaret  
(Mr. 6:53-56)*

<sup>34</sup> Tjume e juexin kuatsingatu e sen ndachaon ko kuiji sen nunte Genesaret.

<sup>35</sup> Ko chujni tjajna me e kuichúxin nã ndo Jesús, ko juincheno e nã kainxin tjajna ste nunte me e ixi ndo Jesús nti a jii ndo ko chujni me e bika o nã kain ni ni e.

<sup>36</sup> Ko kuinóatée ni ni e ixi maski ngande e mantée ndo xrotsé nã, ko nduaxin kain ni itsé mantée ndo, koxruen en nã.

# 15

## *Ti nchekateya chujni ixi ti ndako a sinche e* (Mr. 7:1-23)

<sup>1</sup> Tjume e konchjiñe e kaxin xi fariseo ko kaxin xi tjako chijnie ndo Dio tsiki x̄in tjajna Jerusalén ko juanchangi e xa ndo:

<sup>2</sup> —¿Sonda sen chrjiku unta nche a sen nge e kuanche e sen tachrí ina ixi xrokonda sa ó sinéma itja sen ko tjume e sine sen?

<sup>3</sup> Ko ndo Jesús juanchangi ndo:

—¿Sonda ja anta rue énta nge e kuanche e n̄a ko jaña ndá a tintu enta nge e tsiketuan an ndo Dio?

<sup>4</sup> Ixi ndo Dio ndachro ndo: “Chonde enta juasaya ndotánta ko janáanta ko tayakon ennta sen”, ko “Ngisen ndako a nichja ngajin ndotée sen ko janée sen, xrokonda tsen en sen.”

<sup>5</sup> Ko ja anta ndachenta chujni ixi chao xron-dache n̄a ndotée n̄a ko janée n̄a: “Jan an jua i tsingijnanta ixi kain nge e chonda, ó ntatjan ndo Dio ixi je e ndo tsayé e ndo.”

<sup>6</sup> Ko ngixe i chujni xrondachro jaña, íxrokonda i tsingijnanda ndotée ko janée. Ko ixi ja anta tjakonta jaña, méxin juinchemé enta nge e kuituan an ndo Dio ko ja anta nche enta nge e tsikituan an sen xranchrjen.

<sup>7</sup> Ja anta ti tjako yuu ikonnta. Nduaxin ti tsindachro ndo Isaías, ndo kuachronga chijnie ndo Dio ó sa ó:

<sup>8</sup> Chujni tjajna ji i ndachro n̄a ixi tajon n̄a juasaya ngajin je o ixi ro a n̄a,  
me e ti nichja n̄a ko je a nduaxin,  
ko ngaya aséen n̄a titikaon a n̄a.

<sup>9</sup> Méxin, xro an tjintee ti chjána n̄a juasaya

ixi je o tjako n̄a nge e tetuan an chujni.

<sup>10</sup> Ko ndo Jesús kuiye e ndo chujni ste nti a ko ndachro ndo:

—Tin ennta ti ntatjunta ko tienxinnta.

<sup>11</sup> Je a ti ine chujni me e sinchekit̄ja aséen. Na i, ti nichja n̄a ko ti nichjangí n̄a me e ti nchekit̄ja aséen n̄a.

<sup>12</sup> Tjume e sen teyuu chrikao ndo Jesús konchjiñe e sen ngajin ndo ko ndachro sen:

—Xi fariseo koñao xa ixi nge e ndachronta.

<sup>13</sup> Ko ndo Jesús juatingíexin ndo:

—Kain ika, ka benga i Ndotána jii ngajní, kain ka me e xrokonda tsachrjengíxin nue e ka.

<sup>14</sup> \*Ta inta juachjaon ixi xi fariseo ña, ntakutsin xa ko ni rué e xa kaxon ntakutsin n̄a. Ko siá naa xi ntakutsin tikao inaa xi ntakutsin, yui xa tsitsingaya xa naa tuye.

<sup>15</sup> Ndo Pedro ndache ndo ndo Jesús:

—Ndachijininta nge e xrondachro chijni ji i.

<sup>16</sup> Ndo Jesús ndachro ndo:

—¿Á kaxon ja anta tienxin anta?

<sup>17</sup> ¿Á tienxin anta ixi kain nge e ti ineni itji ngaya tse eni ko tjume e tachrje?

<sup>18</sup> \*Ko ti ndako a nichja chujni t̄i x̄in ngaya aséen, ko me e nchekit̄ja aséen n̄a.

<sup>19</sup> Ixi aséen chujni tachrjexin ti jian i ko kain ti ndako a xraxaon n̄a, ti naatsóñaxón naa chujni, ko ti tsekao n̄a inaa nchri, nchri je a nchrinchri e n̄a, ko je o xraxaon n̄a xrochóna itsjé nchri, ko ti tjaun n̄a tsee n̄a, ko ti ncheya n̄a ko ti tenge e kichuu n̄a teka.

<sup>20</sup> Kain ji i me e nchekitja aséen chujni, ko maski tsitikaon a nā ixi sinéma itja nā hora sine nā, je a me e tsamaxin nā ijje.

*Naa nchri tjajna Canaán chuntia nchra ndo Jesús  
(Mr. 7:24-30)*

<sup>21</sup> Tjume e ndo Jesús kuachrjexin ndo tjajna Jerusalén ko sakjui ndo tjajna Tiro ko tjajna Sidón.

<sup>22</sup> Ko naa nchri cananea jii ndo a nchra no nunte me e, kuji nchra ngajin ndo Jesús ko séen jitoyako nchra:

—Nchána, Chjen en ndo David, tikonóananinta ixi xjanchrichjan na chóna xjan naa espíritue Xixron anxrée ko tsango tangi jii xjan.

<sup>23</sup> Ndo Jesús juatengíexin a ndo. Ko sen teyuu chrikao ndo konchjiñe e sen ngajin ndo ko ndache sen ndo:

—Nchána, ndachenta nchra satsji nchra ixi tsango tuyako nchra ko jirua ina nchra.

<sup>24</sup> Ko ndo Jesús ndachro ndo:

—Ndo Dio xruan anna ndo tsingijna sen tja-jnána Israel ixi je e sen tsingachrue sen xranchi kutuchjon.

<sup>25</sup> Ko je e nchri cananea konchjiñe e nchra ko bake exin ntatuchi in nchra ngajin ndo Jesús, ko ndachro nchra:

—Nchána, ¡tingijnaninta!

<sup>26</sup> Ko ndo Jesús ndachro ndo:

—Ndako a jii tsantsje eni chjen enni nutja ko xrochjéeni kunia sine ba.

<sup>27</sup> Ko je e nchra ndachro nchra:

—Nchána, nduaxin me e. Ko kaxon kunia ine ba nutja tutu o titsingaxin ti neta a nchée ba.

<sup>28</sup> Tjume e ndachro ndo Jesús:

—Nduaxin ja a tsango chuntiana. Tson en xranchi ja a tjauan.

Ko hora me e chjen en nchra tuinxin koxruen en xjan.

*Ndo Jesús juinchexruen en ndo itsjé chujni ni e*

<sup>29</sup> Ko ndo Jesús sakjuixin ndo nti a ko kuiji ndo ngande e ndachaon ndatin in Galilea. Tjume e kuiji ndo naa ijna ko nti a bake e ndo nunte.

<sup>30</sup> Ko itsjé chujni konchjiñe e na ngajin ndo ko bika o na chujni ntarengo ko ni tikon a ko ni nosin ko chujni ntamango ko ikaxin ni ni e bake e na tjenka tutée ndo Jesús ko je e ndo juinchexruen en ndo ni ni e me e.

<sup>31</sup> Ko kain chujni ste nti a tsango xronka na ixi bikon na ixi ni nosin ó chao nichja na ko ni ntamango chao koxruen en na ko ni ntarengo ó chao itji na ko ni ntakutsin chao tikon na. Ko tjume e kuaxi na kuajon na juasie na ngajin ndo Dio ne e ni tjajna Israel.

*Ndo Jesús kuajon ndo juine noó mil chujni*

*(Mr: 8:1-10)*

<sup>32</sup> Tjume e ndo Jesús kuiye e ndo sen teyuu chrikao ndo ko ndachro ndo:

—Tsango tikonóa a kain chujni jii ixi ó ní nchakon ste na ngajin ko chóna i na nge e sine na. Ko tjaun a xrontatjan na satsji na ndo a na ba tsjejeña o na ixi jinta ngatja cha o.

<sup>33</sup> Ko sen teyuu chrikao ndo juatingíexin sen:

—Nti i ti stena, xro an ngisen jii, ¿ti no tsanchiana nge e sine na ixi tsango kueya na?

<sup>34</sup> Ko ndo Jesús juatingíexin ndo:

—¿Ngijan in nutja chondanta?

Ko je e sen ndachro sen:

—Yaato nutja ko kaxin kuchee nchínchín.

<sup>35</sup> Ko ndo Jesús kuituen en ndo kain chujni tsjoké e na ngata a nunte.

<sup>36</sup> Ko itsé ndo ti yaato nutja ko kuchee ichjan ko kuajon ndo juasie ndo ngajin ndo Dio. Ko kuaxi konchrinjin ndo nutja ko chjée ndo sen teyuu chrikao ndo ko je e sen konchjeya sen nutja ko kuchee ngajin chujni ste nti a.

<sup>37</sup> Kain na juine na jian ko kaon na, ko xra xejo yaato ntaxra nutja tutu o ti tsikonchrijin ndo.

<sup>38</sup> Ko ni juine nchakon me e noó mil chujni xi. Ko beki a sen chujni nchri ko ichjan.

<sup>39</sup> Tjume e ndo Jesús chjée ndo na juajna ko sakjui na ko je e ndo kuajin in ndo ntabarco ko sakjui ndo no nunte Magdala.

## 16

*Xi fariseo ko xi saduceo tjanche e xa ndo Jesús naa ixra ijié*

*(Mr. 8:11-13; Lc. 12:54-56)*

<sup>1</sup> \*Kaxin xi fariseo ko kaxin xi saduceo ikjui xa ngajin ndo Jesús ixi tjaun xa ndako a xronichja je e ndo, méxin ndachro xa ixi ndo Jesús xrojuakoxin ndo naa ixra ijié, me e xrokuitikaon xa ixi nduaxin je e ndo kuixin ndo ixi juachaxien ndo Dio.

<sup>2</sup> Je e ndo Jesús juatingéxin ndo ndachro ndo:

—Ó kóndo ko ja anta tsje enta ngajní ko ndachronta: “Chaxro sinche e nchakon ixi játse ngajní.”



<sup>3</sup> Ko ndúyo tsje enta ngajní ko ndachronta: “Jai chaxro a sinche e nchakon ixi játse ngajní ko tsango jii itjuj tiie.” Ja anta tsango jian tienxinnta ngixranchi sinche e nchakon, ¿sonda tienxin anta nge e ixra nta a jan an ixi ji in ti xin ixi juachaxien ndo Dio?

<sup>4</sup> \*Ja anta ña inta ko tjanchianta naa ixra ijié\* tson en tsikonnta. Ko tsikon anta tson en ixra ijié me e, je o tsikonnta xranchi kon en ndo Jonás, ndo kuanichja chijnie ndo Dio ó sa ó.

Tjume e ndo Jesús sakjui ndo ko kuintu e ndo ni ste nti a.

*Ti tjakoxin ni fariseo*

*(Mr. 8:14-21)*

<sup>5</sup> Ndo Jesús ko sen teyuu chrikao kuatsingatu e sen ndachaon ndatin in Galilea ko sen teyuu chrikao ndo tsitjáñe e sen nutja.

<sup>6</sup> \*Me e ndachro ndo Jesús:

—Jian tsje enta nge e xrondachro ti chu u nchetja in nutjée xi fariseo ko xi saduceo.

<sup>7</sup> Ko sen teyuu chrikao ndo Jesús ndache kichuu sen:

—Ja in ichro ndo ixi tjáñaina nutja.

<sup>8</sup> Ko ndo Jesús kono e ndo nge e stendachro sen, méxin ndachro ndo:

—¿Sonda ndachronta ixi chonda inta nutja? Ja anta chuntia ininta, méxin nichjanta jaña.

<sup>9</sup> \*¿Á xraxaon anta o tienxin anta ti na ó nutja chjeye e na ó mil chujni juine na ko ngijan in ntaxra nutja xejo ti tsixe e?

---

**16:4** Mt. 12:39; Lc. 11:29. \* **16:4 naa ixra ijié** milagro **16:6** Lc. 12:1. **16:9** Mt. 14:17-21.

<sup>10</sup> \*Ko, ¿á sintaxi añaonta ixi yaato nutja koncheye enta noó mil chujni juine ko ngijan in ntaxra juejonta ti nutja tsixe e?

<sup>11</sup> ¿Á kuienxin anta ixi jan an je a nutja rindachrjan hora ntatjunta ixi jian tsje enta nge e tjako xi fariseo ko xi saduceo?

<sup>12</sup> Tjume e kuienxin sen teyuu chrikao ndo Jesús ixi je a kondee chu u nchetja in nutja jinichja ndo. Na i. Je e ndo jindachro ndo ixi ti nge e tjako xi fariseo ko xi saduceo me e jian xrotsje e sen ixi ti nichja xa ndako a jii.

*Chronga ndo Pedro ixi ndo Jesús me e ndo Cristo  
(Mr. 8:27-30; Lc. 9:18-21)*

<sup>13</sup> Hora kuiji ndo Jesús nunte tjajna Cesarea de Filipo me e ndache ndo sen teyuu chrikao ndo:

—¿Nge e ndachro ni tjajna ixi Chjen en ndo Dio, xjan jongí e xranchi chujni?

<sup>14</sup> \*Ko je e sen ndachro sen:

—Kaxin na ndachro na ixi ja anta ndo Juan batikitée chujni ko ikaxin na ndachro na ixi ja anta ndo Elías ko ste ikaxin na ndachro na ixi ja anta ndo Jeremías o ngixe i inaa sen kuachronga chijnie ndo Dio ó sa ó.

<sup>15</sup> Tjume e juanchangi ndo Jesús:

—¿Ko ja anta nge e chronta, ngisen jan an?

<sup>16</sup> \*Ko ndo Simón Pedro juatingíexin ndo ko ndachro ndo:

—Ja anta ndo Cristo, Chjen en ndo Dio, ndo jichón.

<sup>17</sup> Ko ndo Jesús ndachro ndo:

—Juaxruxin take é ja a Simón, chjen en ndo Jonás, ixi xro an chujni juntano a ji in. Je e Ndotána jii ngajní juntano a.

<sup>18</sup> Ko jan an sintaki ian ixro me e xrondachro Pedro, ko ngata a ixro ijié ji in tsakée ningona ko maski tsii juachjaon tsenxin chujni jua i tsitjáña ningona.

<sup>19</sup> \*Ko xrotjá a chika xitjeexin ntachja ti tetuan an ndo Dio ko ja a tsayé e juachaxin chao kain tsintee nti i ngata a nunte xasintajni ko ti jii ngajní kaxon jua i xroxindanga; ko kain nge e xroxindanga nti i ngata a nunte xasintajni, jii juachaxin ixi ngajní chao xroxindanga.

<sup>20</sup> Tjume e ndo Jesús kuetuen en ndo sen teyuu chrikao ndo ixi tseki a sen ixi je e ndo, ndo Cristo.

*Ndo Jesús chronga ndo ixi xrokonda tsen en ndo (Mr. 8:31–9:1; Lc. 9:22-27)*

<sup>21</sup> Nchakon me e kuaxi ndo Jesús ndache ndo sen teyuu chrikao ndo ixi xrokonda satsji ndo tjajna Jerusalén ko nti a xi tetuan an ni ngo ko xitaana ko xi tjako ley ne e ndo Dio tsango sincheni e xa ndo ko naatsónaxón xa ndo, ko nchakon nínxin xroxechón ndo.

<sup>22</sup> Ko ndo Pedro kuantsjendáa ndo ndo Jesús ko kuaxi kuyakutee ndo ndo ko ndachro ndo:

—Nchána ndo Dio tsajon a juachaxin tson en me e, ko ja anta xro an nge e tson annta.

<sup>23</sup> Tjume e ndo Jesús ngatjia ndo ko ndache ndo ndo Pedro:

—Ndá a satjia ja a, Xixron anxrée. Tingakonna ia ti nge e tsónna ixi ja a tienxin a xranchi

xraxaon ndo Dio. Ja a xraxaon xranchi xraxaon chujni.

<sup>24</sup> \*Tjume e ndo Jesús nichje e ndo sen teyuu chrikao ndo, ko ndachro ndo:

—Siá xrojan ja anta tjaunnta xorua naninta, xrokonda tsintu enta kain nge e tjakuenxin asáanta, ko tamanta ntacru ko rua naninta.

<sup>25</sup> \*Ixi ngisen tjaun a tsen en, sen me e tsen en sen. Ko ngisen tsen en ixi kondanaxin jan an, sen me e tsitjáña i sen ko xrochóna sen juachaxin tsechón sen kain nchakon.

<sup>26</sup> Ixi, ¿nge e tsjacha naa sen siá tsetuen en sen nchijí nunte xasintajni ko xrochóna sen itsjé tomi, ko sinchetjáña aséen sen? Ixi tomi me e jua i tsjengaxin sen na ixi tsechón aséen sen.

<sup>27</sup> \*Ko Chjen en Dio, xjan jongí e xranchi chujni, tsika o xjan ijié juachaxin ko ijié chjiixro ne e Ndotée xjan, ndo Dio, ko kaxon tsika o xjan sen ángel ne e ndo ko tjume e tsjenge e xjan na ngu-jngu chujni ixra juinche e ngata a nunte nti i.

<sup>28</sup> Ko nduaxin ntatjunta ixi kaxinnta ti stenta nti i xratsen anta ko tsikonnta xranchi tsij Chjen en ndo Dio, xjan jongí e xranchi chujni, tsika o xjan ijié juachaxin ko tsituan an xjan nti i.

## 17

*Kuindoxin xranchi tsje eni ndo Jesús  
(Mr. 9:2-13; Lc. 9:28-36)*

<sup>1</sup> Kuatsingaja ikjaon nchakon ndo Jesús sabikao ndo ndo Pedro ko ndo Jacobo ko ndo Juan, ndo

**16:24** Mt. 10:38; Lc. 14:27.

**16:25** Mt. 10:39; Lc. 17:33; Jn. 12:25.

**16:27** Mt. 25:31; Ro. 2:6.

kichuu ndo Jacobo; je o sen ikjui sen naa ijna tsango noi.

<sup>2</sup> Nti a ste sen ko tuinxin bikon sen ixi kuindoxin ndo Jesús. Ikon ndo jitóngíxin xranchi chjiixro ko manta jitsáa ndo tjúá manta xranchi naa xro i tóngíxin.

<sup>3</sup> Ko kaxon bikon sen nti a jii ndo Moisés ko ndo Elías stetjao sen ndo Jesús.

<sup>4</sup> Tjume e ndo Pedro ndache ndo ndo Jesús:

—Nchána, chao ndatsojuna nti i. Ko siá tjaunnta sintáñana ní nchia, naa nchia ja anta ko naa nchia ndo Moisés ko naa nchia ndo Elías.

<sup>5</sup> \*Ko xrajnichja ndo Pedro, naa itjuj tsango jitóngíxin kuitsía sen ko ngakjen en itjuj me e kuin en sen naa téé inaa sen nichja ko ndachro sen ja in:

—Ji in chjan na tsango tjua a\* ko tsango juaxruxin ritjén ixi ixra jinche e je e xjan. Titikaonnta nge e nichja xjan.

<sup>6</sup> Hora kuin en sen chrikao ndo Jesús, tuinxin bake exin ntatuchi in sen ko bake e ikon sen ngata a inche ixi tsango xronka sen.

<sup>7</sup> Tjume e ndo Jesús konchjiñe e ndo ngajin sen, bake e itja ndo ngata a sen ko ndachro ndo:

—Tingatjennta ko xrakon anta.

<sup>8</sup> Ko tuinxin ikjan tsje e sen ti no jii ndo Jesús ko xro an ngisen bikon sen jikao ndo.

<sup>9</sup> Ko hora xingajinxin sen ijna, ndo Jesús kuetuen en ndo sen:

---

**17:5** Mt. 3:17; 12:18; Mr. 1:11; Lc. 3:22. **17:5** 2Pe. 1:17, 18.

\* **17:5** *tjua a* yo te amo

—Xro an ngisen teki énta nge e bikonta jai, hasta ti xroxechónjan Chjen en ndo Dio, xjan jongí e xranchi chujni.

<sup>10</sup> Ko sen teyuu chrikao ndo Jesús juanchangi e sen ndo:

—¿Sonda ndachro sen tjako ley kuituan an ndo Dio, ixi sa ó tsij ndo Elías ko tjume e tsij ngisen tsajon juachaxin tsechón chujni kain nchakon?

<sup>11</sup> Ko ndo Jesús juatingéxin ndo:

—Nduaxin me e, sa ó tsij ndo Elías ixi je e ndo sinchekonchjian ndo kain nge e.

<sup>12</sup> \*Ko jan an nduaxin xrontatjunta ixi ndo Elías ó kuij ndo, ko chujni kuichúxin a na ndo, méxin chinga juinchekaon na ndo. Ko jan an Chjen en ndo Dio, xjan jongí e xranchi chujni, jaña sinchenana kaxon ko tsango sinchenína na.

<sup>13</sup> Me e sen teyuu chrikao ndo Jesús kuienxin sen ixi je e ndo jinichja ndo ixi ndo Juan bikitée chujni.

*Ndo Jesús juinchexruen en ndo naa chjan chónnda naa espíritu ña i*

*(Mr. 9:14-29; Lc. 9:37-43)*

<sup>14</sup> Ko naa nchakon kuiji sen ti jii tsango itsjé chujni, me e konchjiñe e naa xi, xi me e bake exin ntatuchi in xa ngajin ndo Jesús ko ndachro xa:

<sup>15</sup> —Nchána, tikonóe énta chjan na ixi je e xjan chonda xjan ichin tendaa ko tsango tangi ton en xjan. Nanaunka titsinga xjan ngata a xro i ko ngangí inda.

<sup>16</sup> Bikian xjan nti i ko sen chrjiku unta jua i juinchexruen en sen xjan.

17 Ko ndo Jesús ndache ndo sen teyuu chrikao ndo:

—Ja anta chujni ndako a xraxaon ko titikaon aninta jan an. ¿Ti ngisa xrokonda tsake e ngajinnta?, ko, ¿ti ngisa tsokuaxinna nge e nche enta? Kuaxinta xjan nda i.

18 Ko tjume e ndo Jesús kuyakutee ndo espíritue xi ña i ko tuinxin espíritu me e kuachrxexin xjan ko ndakoxruen en xjan.

19 Tjume e sen teyuu chrikao ndo Jesús ndá a kuiye e sen ndo ko juanchangi e sen ndo:

—¿Sonda jan anna jua i kuantsjena espíritu ña i?

20 \*Me e ndo Jesús juatingéxexin ndo:

—Ja anta chuntia ininta. Ko jan an nduaxin ntatjunta siá ja anta je o xrochuntianinta naanchion xranchi naa tsee ntamostaza tsango nchíin tsee, me e chao xrondachenta jna ji in: “Ndá a tjia”; ko jaña xrokon en xixi ijna xrokuitikaon jna. Ko siá nduaxin xrochuntianinta, chao sinche enta kain ixra tsetuan annta.

21 Ixi kain espíritu kichuu ña je o tachrxexin siá nduaxin xronichja naninta kain nchakon ko sinchekatse ñaonta jinta.

*Íjngo chronga ndo Jesús xixi tsen en ndo  
(Mr. 9:30-32; Lc. 9:43-45)*

22 Xrasteyáa sen cha o nunte Galilea, ndo Jesús ndachro ndo xixi je e ndo Chjen en ndo Dio, xjan jongí e xranchi chujni, xrotsé na ndo ko tsikao na ndo ngajin ni tetuan an,

<sup>23</sup> ko naatsóñaxón n̄a ndo. Ko nchakon nínxin xrokonda xroxechón ndo. Ko ti ndachro je e ndo tsango juincheni e aséen sen teyuu chrikao ndo.

*Ndo Jesús juenga ndo n̄a ti juanchia n̄a kondee ni ngo*

<sup>24</sup> Nchakon ndo Jesús ko sen teyuu chrikao ndo kuiji sen tjajna Capernaum, ni xenge e n̄a ne e ni ngo kuitsje e n̄a ndo Pedro ko juanchangi e n̄a ndo:

—Ndo ntakuan annta, ¿á tjenga ndo n̄a tomi ne e ni ngo?

<sup>25</sup> Ko ndo Pedro juatingíexin ndo:

—Jaán, tjenga ndo n̄a.

Ko hora ndo Pedro kuixin in ndo nchia ti ste kain sen, ndo Jesús sa ó nichja ndo ko ndachro ndo:

—Ndachijiana, Pedro, xi tetuan an ngata a nunte nti i, ¿ngisen tjanche e xa ixi xrokonda tsjenga n̄a n̄a? ¿Á ni tjajnée xa o ni tsiki x̄in inaa tjajna?

<sup>26</sup> Ko ja in juatingíexin ndo Pedro:

—Ni tsiki x̄in inaa tjajna.

Ko ndachro ndo Jesús:

—Sen tjajnée xrokonda i tsjenga sen n̄a.

<sup>27</sup> Ko ixi tjaun a tsoñao n̄a, itjia ti jii ndachaon ko tjanka ngia chika tséxinni kucheē ko kucheē sa ó xrotsé, tantje e ro a ba, ko tsinchia naa tomi ko tomi me e tjenga n̄a ti tikinixin jan an ko ja a.

## 18

*¿Ngisen ícha tjintee ti jii ngajní?  
(Mr. 9:33-37; Lc. 9:46-48)*



<sup>1</sup> \*Nchakon me e sen teyuu chrikao ndo Jesús konchjiñe e sen ngajin ndo ko juanchangi e sen ndo:

—¿Ngisen ícha tsitee ngajní ti tetuan an ndo Dio?

<sup>2</sup> Tjume e ndo Jesús kuiye e ndo naa chjan, ko bake e ndo xjan ngusine ti ste sen,

<sup>3</sup> \*ko ndachro ndo:

—Nduaxin ntatjunta ixi siá tjaunnta tsixin innta ti tetuan an ndo Dio, xrokonda tsindoxinnta ko tsaxi sinche enta xranchi nche e naa xjan nchíín.

<sup>4</sup> Ixi ti tetuan an ndo Dio, sen ícha tjintee, nchejié a aséen sen xranchi naa chjan ji i.

<sup>5</sup> Ko ngisen xrotjue e ko tsayé e sen naa chjan nchíín xranchi xjan ji i, me e nduaxin titikaonna sen, ko xrokjui xranchi xrokuaye ena sen jan an.

*Chujni nchekateya ixi sinche e na ndako a  
(Mr. 9:42-48; Lc. 17:1-2)*

<sup>6</sup> 'Siá xrojan naa xjan nchíín titikaonna jan an, ko kondeexin xrojan chujni, xjan me e xrojuinche e xjan ti ndako a, ni me e cháña xrotsé na naa ixro ijié ti tontsingaxin ko xrokuintee na ixro tusin na, ko xrokuitsingangi na ndachaon ti yaso e.

<sup>7</sup> Lastu nunte xasintajni ixi jii nge e sinchen-gachrue chujni ixi tsitikaon a na chijnie ndo Dio, ko lastu ni sinchekateya chujni ixi sinche e na ti ndako a.

<sup>8</sup> \*'Méxin siá kondeexin tjáanta o tutáanta, ja anta sinche enta ti ndako a, cháña tonchrijinnta ko ndá a tjankanta, ixi maski xrochonda inta naa tjáanta o naa tutáanta tsarichonnta kain nchakon,

ko xrochondanta yui tjáanta ko yui tutáanta ko jaña nchijínta itsjinta ti jiche xro i kain nchakon.

<sup>9</sup> \*Ko siá ti tsikon ikonnta, kondeexin me e nche enta ti ndako a, cháña tantsjengi ikonnta ko ndá a tjankanta, ixi maski ntakutsinnta, ja anta tsarichonnta kain nchakon. Ko yuxin ikonnta xrochondanta, jaña satsjinta ngangí xro i ko nti a tsake enta kain nchakon.

*Chijnie naa kutuchjon*

*(Lc. 15:3-7)*

<sup>10</sup> \*'Ndachro anta ixi tjinte a kaxin xjanchínchín ji in, ixi xjan ji in, sen ángel ne e xjan, sen ste ngajní ti jii Ndotána, je e sen tjanchia sen ixi je e xjan.

<sup>11</sup> Ixi Chjen en ndo Dio, xjan jongí e xranchi chujni, kuu xjan bijée xjan chujni kuitjáña ko sinchemé e xjan jíe sen.

<sup>12</sup> '¿Nge e chronta? Siá naa xi chóna naa ciento kutuchjon ko siá kuitjáña naa ba, ¿á tsintue a xa nti a ti noventa y nueve ba ti jii ijna ko tjume e tsijée xa iko kuitjáña?

<sup>13</sup> Ko siá tsitja xa kutuchjon me e, á je a ícha tsake e xa juaxruxin ixi kuitja xa iko kuitjáña ixi kain iko kuitjáña i.

<sup>14</sup> Jaña kaxon Ndotána jii ngajní tjaun a ndo tsitjáña ninna xjanchín ji i.

*Xranchi xrotjaña ananta ti ndako a junta anta naa sen kichuunta*

*(Lc. 17:3)*

<sup>15</sup> \*'Siá naa sen kichuunta xrojan ti ndako a junta anta sen, ja anta ko sen me e nichje e kichuunta ti ja onta stenta, ixi ti ndako a junta anta

sen. Siá kuitikaon sen nge e ndachronta, ja anta juachanta naa sen kichuunta.

<sup>16</sup> Ko siá sen me e kuitikaon a sen, tiye enta naa o yuu sen kichuunta ixi sen me e tsin en sen nge e tsjaonta ko nge e sinchekonchjiannta.

<sup>17</sup> Ko sen ningakon annta, siá tsitikaon a sen sen kuiye enta, tjume e ndachenta sen ni ngo, ko siá tsitikaon a sen kaxon, tjume e índachro anta ixi sen me e kichuunta sen, sen me e ó ikjan sen xranchi naa chujni tjáka tomie xi Roma ko chúxin a na ndo Dio.

<sup>18</sup> \*'Ko nduaxin ndachrjan ixi siá tsajon anta juachaxin xroxindanga ijie yama naa chujni nti i ngata a nunte xasintajni, kaxon ngajni ti jii ndo Dio, je e ndo tsajon a ndo juachaxin tsumé e ijie me e, ko kain ti tsajonnta juachaxin ixi tsumé e ti ndako a juinta anta na nti i ngata a nunte xasintajni, kaxon ndo Dio sinchemé e ndo ijie chóna na.

<sup>19</sup> 'Kaxon ntatjunta ixi siá yuu ja anta ngata a nunte nti i ndako xronichje e kichuunta ixi xrojan nge e tsjanche enta Ndotána jii ngajni, Ndotána jii ngajni, je e ndo tsajon ndo nge e tsjanchianta.

<sup>20</sup> Ixi ti no ste yuu o ní sen titikaonna, nti a tsake e jan an ngusine ti ste sen.

<sup>21</sup> \*Tjume e konchjiñe e ndo Pedro ko juanchangi e ndo ndo Jesús:

—Nchána, ¿ngijan in sintama a ngaya aséenna nge e ti ndako a juinchena sen kichian? ¿Á je o jaña yaato vez?

<sup>22</sup> Me e juatingíexin ndo Jesús ko ndachro ndo:

—Na i, je a je o yaato. Jan an ndachrjan ní ti kán ko naa ti te tsomé e ngaya asáan ti juinta a sen.

### *Chijnie yuu ni sínká*

<sup>23</sup> 'Ti no tituan an ndo Dio me e xranchi naa nunte ijié tetuan an naa xi rey ko tjaun xa sinchéñaka o xa xinhexrée xa cuenta.

<sup>24</sup> Ko kuaxi xa nchéña xa cuenta ko hora me e bika o na naa xi tsango itsjé sínká.

<sup>25</sup> Ko xi sínká me e chóna i xa tomi tsjengaxin xa na ti sínká xa, méxin xi rey kuetuan an xa ixi tsochji xi sínká ko janchri e xa ko chjen en xa ngajin ni te na chujni ko ti tjintee chóna xa tsochji kaxon xroxengaxin na ti sínká xa.

<sup>26</sup> Ko xi sínká bake exin ntatuchi in xa ngajin xi rey, ko kuinóatée xa ko ndachro xa: “Chonanjinta ko jan an tsjenga anta na kain ti tasinka anta.”

<sup>27</sup> Ko xi rey bikonóe e xa xi sínká ko juinchemé e xa kain ti sínká xi me e, ko kuituan an xa tsajanda na xa ixi ó komé e ti sínká xa.

<sup>28</sup> Ko sakjui xa ko hora me e kuetan xa inaa xi nchekao xa ixra, ko xi me e tsjé a sínká xa ngajin xi komé e ti kuasínká xa ngajin xi rey. Ko xi komé e ti sínká, soji itsé xa tusin xi sinke e xa ko ndachro xa: “¡Tjénganana na ti tasinkanana!”

<sup>29</sup> Ko xi nchekao xa xra bake exin ntatuchi in xa ngajin xi komé e ti sínká ko kuinóatée xa: “Tikonóanana ko jan an tsjenga a na kain ti tjasínká a.”

<sup>30</sup> Ko xi komé e ti sínká chro a xa ko kuetuan an xa ixi tsije e xi sinke e xa ngaxin in ndo achjiso ko tsachrxjin a xa nti a hasta ti tsjengaja xa na kain ti sínká xa.

<sup>31</sup> Ko ikaxin xi nchekao xa ixra bikon xa nge e juinche e xi komé e ti sínká, me e tsango juincheni e aséen xa, méxin kuintekji xa ngajin xi rey ko chronga xa nge e juinche e xi komé e ti sínká.

<sup>32</sup> Tjume e xi rey kuetuan an xa tsixrakua xi komé e ti sínká ko ja in ndachro xa: “Ja a ti kuanche e xrana, tsango ña ia ja a, ixi jan an juin-tamá a kain ti kuasínká nana ixi ja a kuinóatáa ngajin.

<sup>33</sup> Kaxon ja a xrobikonué é xi kuanhekua ixra xranchi jan an bikonóa a ja a.”

<sup>34</sup> Tjume e xi rey kuetuan an xa tsikaon xi ña i ko tsjengaja xa na kain ti sínká xa. Jaña ichro xi rey ixi tsango koñao xa.

<sup>35</sup> Ndo Jesús juexin kueki ndo chijni ji i, me e ndachro ndo:

—Jaña kaxon Ndotána jii ngajní sinta anta ndo ngujngu ja anta siá je a nduaxin sinchemé enta ngaya asáanta ti ndako a junta anta sen kichu-unta.

## 19

*Ndo Jesús nichja ndo kondee ni tsikute e ko tintu e kichuu na*

*(Mr. 10:1-12; Lc. 16:18)*

<sup>1</sup> Juexin nichja ndo Jesús kain ji i, tjume e sakjui ndo nunte Galilea ko kuiji ndo tjajna Judea, nunte jii chjuya ti jii indajitinga ndatin in Jordán.

<sup>2</sup> Nti a kueya chujni rué e ndo ko itsjé ni ni e juinchexruen en ndo.

<sup>3</sup> Ko tjume e kaxin xi fariseo konchjiñe e xa ngajin ndo Jesús ko juanchangi e xa ndo ixi tjaun xa ndako a xrojuatingíexin ndo, ko ja in ndachro xa:

—¿Á chao jañao naa xi tsintu e xa nchrinchri e xa maski nchrinchri e xa xro an nge e ti ndako a juinche e nchra?

<sup>4</sup> Ko ndo Jesús ja in juatingíexin ndo:

—¿Á kuangi anta nge e ndachro xroon chijnie ndo Dio?, ixi “je e ndo juinchéña ndo kain chujni, xi ko nchri juinchéña ndo.”

<sup>5</sup> Ko kaxon ndachro ndo: “Méxin chujni xi tsintu e xa ndotée xa ko janée xa ko tsute e xa nchrinchri e xa ko yui je e na í je a yuu na, ixi ó xranchi xrokjui naakua naa chujni.”

<sup>6</sup> Méxin í je a yuu na. Na i. Jai ó xranchi naakua naa chujni, méxin xro an chujni tsonchjeya ni kute e, ni chjée ndo Dio juachaxin tsekao kichuu na.

<sup>7</sup> \*Ko xi fariseo juanchangi e xa ndo:

—¿Sonda tjume e ndo Moisés kuajon ndo juachaxin tsoña naa xroon ko xroon me e xronichja ixi chao tsintu e kichuu na?

<sup>8</sup> Ko ndo Jesús ndachro ndo:

—Ndo Moisés kuajon ndo juachaxin tsonchjian xroon xrochjeyaxin xi ko nchri, ni stekao kichuu, ixi chujni tsango icha aséen nako tjaun a na tsitikaon na chijnie ndo Dio. Ko ti nchakon xrangíxixión kain nge e, kuanche a na jaña.

<sup>9</sup> \*Méxin, jan an ndachrjan siá xrojan ja anta tjaunnta tsintu enta janchri anta ko siá janchri anta juitéxin a jan inaa xi, ja anta jua i

tsintu enta jan ko chonda inta juachaxin ixi tsuta anta inaa nchri. Ko siá sinche enta jaña, ja anta tsamanta ijje. Kaxon ngixe i naa xi tsute e naa nchri, nchri kuayé e xroon chjeyaxin chujni, xi me e tsama xa ijje kaxon.

<sup>10</sup> Tjume e sen teyuu chrikao ndo Jesús ndachro sen:

—Siá ni tintekute e jaña nche e na, cháña tsute ani.

<sup>11</sup> Méxin ndo Jesús ndachro ndo:

—Chijni ji i kain a sen tienxin sen chijni. Je o tienxin sen chjee ndo Dio juachaxin ixi tsute a sen.

<sup>12</sup> Nduaxin ji i, kaxin xi jua i tsute e xa, ixi ti xratsijongíexión xa jua i tsute e xa. Ikaxin xa juincheni e na xa, méxin jua i tsute e xa, ko jii ikaxin sen tjaun a sen tsute e sen ixi tjaun sen sinche e sen ixra ngajin ndo Dio, méxin ti rintakuan annta jai je o tsienxin sen tjaun sinche e jaña.

*Ndo Jesús juinchenchaon ndo kaxin chjan  
(Mr. 10:13-16; Lc. 18:15-17)*

<sup>13</sup> Tjume e bika o na kaxin ichjan ixi tjaun na tsake e itja ndo Jesús ngata a xjan ko xronichje e ndo ndo Dio ixi je e xjan. Ko sen teyuu chrikao ndo Jesús kuyakutee sen ni bika o xjan.

<sup>14</sup> Ko je e ndo Jesús ndachro ndo:

—Tintu enta ichjan tsii xjan ngajin ko tingakuen anta xjan ixi sen sinche e xranchi nche e naa ichjan, sen me e tikinixin en sen tixin in sen ngajni ti tetuan an ndo Dio.

<sup>15</sup> Juexin bake e itja ndo ngata a xjan, sakjuixin ndo nti a.

*Naa chán chónnda itsjé tomi nichje e chán ndo Jesús*

*(Mr. 10:17-31; Lc. 18:18-30)*

<sup>16</sup> Naa chajan kuij chán kuitsje e chán ndo Jesús ko juanchangi e chán ndo:

—Ja anta ti nchekuen ennta chujni tsango jiannta, ¿nge e xrokonda sinta a ixi tsayá a juachaxin tsarichón kain nchakon?

<sup>17</sup> Ko je e ndo ja in juatingíexin ndo:

—¿Sonda ndachrua ixi jan an jianna? Je o ndo Dio, je e ndo jian ndo. Ko siá tjauan nduaxin tsarichuan, xrokonda tsitikaoan chijnie ndo Dio.

<sup>18</sup> Ko je e chán ndachro chán:

—¿Ngixe e chijni me e?

Ko ndo Jesús ndachro ndo:

—Ko a juachaxin naatsóñaxuan naa chujni, ko a juachaxin tsixintexian naa nchri chónnda xixi e, ko a juachaxin ixi tse e, jua i sincheya ixi sincheni e inaa chujni.

<sup>19</sup> Chónde e juasaya ndotáa ko janáa, kaxon tjue é chujni xranchi tjue e asáan.

<sup>20</sup> Ko je e chán ndachro chán:

—Kain chijni ji in kuitika on xrachiona. ¿Nge e ícha titjáña sinta a?

<sup>21</sup> Ko ndo Jesús juatingíexin ndo:

—Siá nduaxin tjauan sinchetjúá asáan, nchekjia kain nge e tjintee chonda, ko tonchjiye e sen nóa kain tomia. Ko me e xrochónnda ti tjintee jii ngajní. Tjume e tsji ia ko xrokjan ja a naa sen rua na.

<sup>22</sup> Ko kuin en chán jaña, tsango koni e aséen chán, sakjui chán ixi tsango itsjé nge e ti tjintee chónnda chán.



23 Tjume e ndo Jesús ndache ndo sen teyuu chrikao ndo:

—Nduaxin xrontatjunta ixi tsango tangi tsixin in ngajni ti tetuan an ndo Dio, naa chujni chóna itsjé tomi.

24 Ko nduaxin ntatjunta ixi ícha tangi a tsixin in naa kucamello ikon naa ntachika, ixi naa chujni chóna itsjé tomi tixin in ti tetuan an ndo Dio.

25 Ko sen teyuu chrikao ndo kuin en sen nge e nichja ndo, tsango kuiye e ñao sen, ko juanchangi e kichuu sen:

—¿Ngisen tsjacha tsechón kain nchakon tjume e?

26 Ko ndo Jesús jitsje e ndo sen, me e ndachro ndo:

—Chujni jua i tsechón na kain nchakon. Je o ndo Dio tajon ndo juachaxin tsechón chujni.

27 Tjume e ndo Pedro ndachro ndo:

—Nchána, jan anna kuintu ana kain ti kuachondana ko rua ananta. ¿Jan anna nge e tsjachana?

28 \*Ko ndo Jesús juatingíexin ndo:

—Nduaxin ntatjunta nchakon tsij tsoña natjúá kain nge e, nchakon Chjen en ndo Dio, xjan tsijongí e xranchi chujni, tsake e xjan nunte ngata a ntaxitaon ti tsetuanxin xjan ko tsjako xjan ti ijié juachaxin chonda xjan, tjume e kaxon ja anta ti rue énta xjan xrochondanta teyuu ntaxitaon tsituanxinnta ko sinchéñaxinnta ijié ngajin ti teyuu tjajna ne e Israel.

29 Ko kain sen kuintu e ndo a, ko sen kuintu e ndo kichuu ko jan kichuu, ndotée o janée, janchri e o chjen en o nunte e ixi kuitikaonna sen ko rua na

sen jan an, sen me e tsango itsjé nge e tsayé e sen ko kaxon tsechón sen kain nchakon.

<sup>30</sup> \*Ko kueya sen jai tsango tetuan an sen, nchakon me e ítsetuan i sen. Ko kueya sen tjinte a jai, nchakon me e je e sen ícha tsetuan an sen.

## 20

*Ndo Jesús juakoxin ndo kondee sen nche e ixra ngataon ijngi*

<sup>1</sup> 'Ngajní tetuanxin ndo Dio me e tonoxin xranchi naa xi chóna naa ijngi tsango ijié ko ndúyo kuachrje xa bijée xa kaxin xinhexra ixi tsikonchrijin xa tu uva.

<sup>2</sup> Ko kuitja xa xinhexra ko konchjiansa o kichuu xa ko xroxenge e xa na naa tomi ndatin in denario ngujngu nchakon ko tjume e xruan an xa xinhexra ngataon ijngi.

<sup>3</sup> Ko kuachrje xa hora naa ne e nchakon ko bikon xa ikaxin chujni jii ngusine tjajna ko chóna i na ixra.

<sup>4</sup> Ko ndache xa na: “Itjinta tikonchrijinnta tu uva ko jian tsjenga anta na.” Ko je e na ikjui na.

<sup>5</sup> Tjume e ngusine nchakon bijée xa ikaxin xinhexra, ko kaxon ti hora nínxin ne e nchakon kuachrje xa juée xa xinhexra.

<sup>6</sup> Ko kóno kaxon kuachrje xa hora na ó, ikjui xa ngusine tjajna ko kuitja xa ikaxin ninhexra, ni xro an stenche e ko ndachro xa: “¿Sonda stenta nti i nguixin nchakon ko xro an ixra stenche enta?”

<sup>7</sup> 'Ko je e na ndachro na: “Ixi xro an ngisen chjánana ixra, méxin nti i stena.” Ko je e xa

ndachro xa: “Itjinta nche enta xra<sub>n</sub>a ko jian tsjenga anta na.”

<sup>8</sup> Ko ó kontie ko xi chjakée ndache xa xi tetuen en xinchexra: “Tiye é xinchexra ko tjenge é xa na, tjangíinxian tjenge é na xi kjui ó kóndo ko tsjexixin xi kjui ndúyo.”

<sup>9</sup> Ko sa ó konchjiñe e xi kuixin in xra<sub>n</sub>a hora na ó ko ngujngu xa kuayé e xa naa tomi denario.

<sup>10</sup> Tjume e konchjiñe e xi kuaxi xra<sub>n</sub>a ndúyo ko xraxaon xa ixi je e xa xrojuacha xa ícha itsjé tomi, ko xraje o kuayé e xa naakua tomi denario.

<sup>11</sup> Ko hora kuayé e xa tomi, bake a xa juaxruxin ti juacha xa.

<sup>12</sup> Ko ndachro xa: “Ni kuij ó kóndo naakua hora juinche e na xra<sub>n</sub>a ko kaxon xenge e na na xraje o xranchi juacha jan anna ti juinta ana ixra<sub>n</sub>a nchijí nchakon ngataon súa.”

<sup>13</sup> Ko xi xrée ja in juatingíexin xa: “Jan an ndako rinta a, joina ixi xrojuenga anta na naa denario ko jaña kuaye enta.

<sup>14</sup> Itsenta tomianta ko satjinta. Jan an tja on xrotjá a xi kuij ó kóndo xraje o xranchi ja anta.

<sup>15</sup> Jan an, ¿á chonda i juachaxin ixi xrotjá a ngisen tja on tomina? O, ¿jitochjuya anta ixi ti jian rinta a jan an?”

<sup>16</sup> \*Méxin, ja in xrondachro chijni ji in: ni kuij ícha tjume e, ni me e ícha sa ó tsayé e na ti jian, ko ni kuij ícha sa ó, ni me e ícha tjume e tsayé e na ti jian tsajon ndo Dio ixi itsjé ni tsonchjiñe e ko kaxion ni tsinche e ndo.

*Íjngo chronga ndo Jesús tsen en ndo  
(Mr. 10:32-34; Lc. 18:31-34)*

<sup>17</sup> Hora sakjui ndo Jesús tjanya Jerusalén, kuachrjendaxin ndo ti ste chujni, je e ndo ko sen teyuu chrikao ndo ko ndache ndo sen:

<sup>18</sup> —Jai stetajin ina tjanya Jerusalén ko nti a xrotsé nā Chjen en ndo Dio, xjan jongí e xranchi chujni, ko tsajon nā xjan ngajin xitaana tetuan an ko xi tjako ley ne e ndo Dio, ko tsjankata a nā xjan ijie ko xrondachro nā tsen en xjan.

<sup>19</sup> Ko tsajon nā xjan ngajin xi kuixin inaa tjanya ko ni me e tsjanoa nā xjan ko tsikaon xjan ko tsasintjian nā xjan ko nti a tsen en xjan ko nchakon nínxin xroxechón xjan.

*Ti juanchia janée ndo Jacobo ko ndo Juan  
(Mr. 10:35-45)*

<sup>20</sup> Tjume e janée ndo Jacob ko ndo Juan, chjen en ndo Zebedeo, je e jan ko yui chjen en jan konchjiñe e sen ngajin ndo Jesús ko bake exin jan ntatuchi in jan ngajin ndo Jesús ko kuinóatée jan ngajin ndo.

<sup>21</sup> Ko ndo Jesús juanchangi ndo:

—¿Nge e tjauan?

Je e jan ndachro jan:

—Tja on ixi nchakon tsake enta nunte ngata a ntaxitaunnta ko tsjakonta ijié juachaxin, tájonnta juachaxin ixi yui chjan na tsake e xjan ti tsake e ja anta, naa xjan ndatsjonxin jian ko naa xjan ndatsjonxin ikjon.

<sup>22</sup> Tjume e ndo Jesús ndachro ndo:

—Ja anta noa inta nge e tjanchianta. ¿Á chao ja anta tsi inta ti tsango itsjá tsi i jan an ko ti itsjá

me e xrondachro ti chinga sinchenana ko tsintji jnina ko tsen enna?

Tjume e sen teyuu chrikao ndo ndachro sen:

—Jaán, chao.

<sup>23</sup> Tjume e ndachro ndo Jesús:

—Jaán, nduaxin ja anta tsango chinga sinta anta na xranchi sinchenana jan an, ko ti tsake enta ndatsjonxin jian o ndatsjonxin ikjon, je o Ndotána tikinixin en ndo xrondachro ndo ngisen tsayé e juachaxin me e.

<sup>24</sup> Ko hora kuin en sen ite chrjikao ndo Jesús, koñaao sen ngajin ndo Jacobo ko ndo Juan.

<sup>25</sup> \*Tjume e ndo Jesús kuiye e ndo kain sen chrikao ndo ko ndachro ndo:

—Ja anta no anta ixi xi tetuan an tjajna, je e xa tituen en xa chujni ko xro an nge e nche e chujni siá xi tituan an tsajon a xa juachaxin ko xi tsango tituan an chujni xrokonda tsitikaon na nge e tituan an xa.

<sup>26</sup> \*Ko ja anta jua i sinche enta jaña xranchi nche e je e na. Na i. Siá xrojan ja anta tjaunnta tsetuan annta ícha, sa ó xrokonda tsitikaonnta nge e tsetuan annta sen kichuunta.

<sup>27</sup> Ko ngixe i ja anta ti tjaunnta ícha tsetuan annta, xrokonda tayakon ennta sen kichuunta ko xro an nge e tsjachanta.

<sup>28</sup> Jaña kaxon Chjen en Dio, xjan jongí e xranchi chujni, kui a xjan ixi chujni sinche e ixra ngajin xjan. Na i. Je e xjan kuij xjan ixi tayakon en xjan chujni ko tsen en xjan ixi jaña tsantsjengí e xjan ijié chóna chujni.

*Ndo Jesús juinchexruen en ndo yuu ni tikon a  
(Mr. 10:46-52; Lc. 18:35-43)*

<sup>29</sup> Ko kuachrjexin sen tjajna Jericó, itsjé chujni rué e ndo Jesús.

<sup>30</sup> Ko yuu ni tikon a ste n̄a nunte ngande e cha o ko kuin en n̄a ixi jitatsinga ndo Jesús, me e kuaxi kuyako n̄a:

—Nchána, xjan kuachrjenixin ndo David, tikonóa naninta.

<sup>31</sup> Ko chujni kuyakutee n̄a ni tikon a ixi xrotenko n̄a ko je e n̄a ícha séen kuyako n̄a:

—Nchána, xjan kuachrjenixin ndo David, tikonóa naninta.

<sup>32</sup> Tjume e ndo Jesús kuíxin ndo, ko kuiye e ndo ni tikon a ko juanchangi e ndo n̄a:

—¿Nge e tjaunnta sinta a?

<sup>33</sup> Ko je e n̄a juate e n̄a:

—Nchána, tja onna tsikonna.

<sup>34</sup> Ko ndo Jesús bikonóe e ndo n̄a ko bake e itja ndo ngata a ikon n̄a. Ko tuinxin bikon n̄a ko kaxon je e n̄a rué e n̄a ndo.

## 21

*Ndo Jesús kuixin in ndo tjajna Jerusalén  
(Mr. 11:1-11; Lc. 19:28-40; Jn. 12:12-19)*

<sup>1</sup> Ndo Jesús ko sen teyuu chrikao ndo kuiji sen ó tjenka tjajna Jerusalén, naa tjajna Betfagé, nti a jii ijn̄a ndatin in Olivo, ko ndo Jesús kuetuen en ndo yuu sen chrikao ndo,

<sup>2</sup> ko ndachro ndo:

—Itjinta tjajna ji a, nti a tsinchíinta naa kuntajno, kunchri, jichroá ba ko naa kuntajnochjan

jikao ba. Tonxindange enta ba ko tsikuunta yui ba.

<sup>3</sup> Ko siá xrojan ngisen tsjanchangi anta sonda satiku unta ba, ja anta ndachronta: “Ncháina xrokonde e ba ko tsjexin tsonde e ndo ba, je e ndo tsituan an ndo tsikianna ba.”

<sup>4</sup> Jaña kon en ixi jaña ó tsikjin naa ndo kuachronga chijnie ndo Dio ó sa ó, ko ja in tsindachro ndo:

<sup>5</sup> Ndachenta chujni tjajna Sión:

“Tsje enta ndo rey na anta ó kuji ndo ngajinnta, ko je e ndo nchejié a aséen ndo, naa kuntajno jita a ndo, naa kuntajnochjan, chjen en naa kuntajno, ko tama.”

Jaña jitaxin xroon chijnie ndo Dio ó sa ó.

<sup>6</sup> Ko sen chrikao ndo, ikjui sen, juinche e sen ti kuetuan an ndo Jesús.

<sup>7</sup> Ko bika o sen kuntajno ko chjen en ba, ko bake e sen manta jitsáa sen ngata a ba, tjume e je e ndo kueta a ndo ba.

<sup>8</sup> Ko tsango itsjé chujni ste nti a ko kuingo nã manta stetsáa nã ngata a cha o ko ikaxin nã konchrinjin nã chaan ntãã yua ko bingó nã ngatja cha o kaxon.

<sup>9</sup> Ko kaxin chujni stetaon ko chujni sterué e nã ndo Jesús ko ja in stetoyako nã:

—Ijié juachaxin tikinixin en xjan kuachrjenixin ndo David. Tsango jian ndo kuixin ixi juachaxien Ndotáina jii ngajní. Ijié juachaxin tsayé e ndo.

<sup>10</sup> Hora kuixin in ndo Jesús tjajna Jerusalén, kain chujni ste nti a xronka nã ko ndachro nã:

—¿Ngisen ji in?

<sup>11</sup> Ko itsjé nã ndachro nã:

—Ji i ndo Jesús chronga chijnie ndo Dio, ndo tjajna Nazaret tikinixin en nunte Galilea.

*Ndo Jesús juinchetjúá ndo ni ngo*

*(Mr. 11:15-19; Lc. 19:45-48; Jn. 2:13-22)*

<sup>12</sup> Ko ndo Jesús kuixin in ndo ningue ndo Dio ko kuantsje ndo kain ni stenchekji ko ni te na ngaxin in ni ngo. Ko konjamangi ndo nta̱a jita a nge e nchekji na ko ti tasingixin na tomi ko ntax-itaunen ni nchekji kuntúá.

<sup>13</sup> Ko ndo Jesús ndachro ndo:

—Ja in ndachro xroon chijnie ndo Dio tsikjin sen kuachronga ó sa ó: “Nchanía, nchia nichjaxin chujni ngajin ndo Dio.” Jaña ndatin in nchia, ko ja anta juinchéñanta nchia tjau e xiche e.

<sup>14</sup> Ko ngaxin in ni ngo konchjiñe e ni ntakutsin, ni ntarengo ngajin ndo Jesús ko je e ndo juinchexruen en ndo na.

<sup>15</sup> Ko kaxin xitaana tetuan an ko xi tjako chijnie ndo Dio bikon xa kain ni juinchexruen en ndo ko nge e juinche e ndo ko kuin en xa kaxin ichjan stetsje xjan ngaxin in ni ngo, ko ja in ichro ti stetsje xjan: “Ijié juachaxin tikinixin en ndo kuachrjenixin ndo rey David.” Ko xi stetin en tsango koñao xa

<sup>16</sup> ko ja in ndache xa ndo:

—¿Á ritin én nge e stetsje xjan ji in?

Ko je e ndo ndachro ndo:

—Jaán, ¿ja anta á noa inta nge e ndachro xroon chijnie ndo Dio? Ko ja in ndachro xroon:

Ro a xjan nchínchín ko xjan stetaki bakéenta ti juasaya jian xrotsje xjan.



17 Tjume e je e ndo kuachrjexin ndo tjajna Jerusalén sakjui ndo tjajna Betania ko nti a joke e ndo tiie me e.

*Ndo Jesús ko ntaq tajon tu higo  
(Mr. 11:12-14, 20-26)*

18 Ndúyo kua sen cha o ko ikjan sen tjajna Jerusalén ko ndo Jesús kuen en ndo jinta.

19 Ko bikon ndo naa ntaq tu higo ngande e cha o ko konchjiñe e ndo ti jii ntaq, ko xro an itu kuitja ndo, je o ika chónnda ntaq. Méxin ndache ndo ntaq:

—Kainko nchakon xro an itu xrochónnda.

Ko ntaq tu higo tuinxin xema ntaq.

20 Ko sen teyuu chrikao ndo Jesús bikon sen nge e kon en ntaq, me e xronka sen ko juanchangi e sen ndo:

—¿Sonda tuinxin xema ntaq tu higo?

21 \*Ko ndo Jesús ndachro ndo:

—Nduaxin ntatjunta siá nduaxin xrochuntianta ko xro an nge e sinchengachrue asáanta, je a je o xranchi kon en ntaq tu higo, chao sinche enta. Ja anta chao xronichje enta ijna ji in ko ja in xrondachenta jna: “Satjixian nti i ko taritsinga ngia ndachaon”, ko jaña tson en.

22 Ko kain nge e tjaunnta, siá xronichje enta ndo Dio ko nduaxin xrochuntianta ngajin ndo, nduaxin tsaye enta nge e tsjanchianta.

*Ijié juachaxin chónnda ndo Jesús  
(Mr. 11:27-33; Lc. 20:1-8)*

23 Tjume e ndo Jesús kuixin in ndo ni ngo, ko juinhekuen en ndo chujni, me e konchjiñe e

kaxin xitaana tetuan an ko kaxon kaxin xi judío, xi ícha tetuan an, ko juanchangi e xa ndo:

—¿Nge e juachaxin chonda ja a ixi ja in nche e ko ngisen tjáa juachaxin?

<sup>24</sup> Ko ja in juate e ndo Jesús:

—Kaxon jan an tsjanchangi anta naa nge e ko siá tsjatingíexinnta nge e tsjanchangi anta, jan an kaxon xrontatjunta ngisen chjána juachaxin.

<sup>25</sup> Ndo Juan ti kuikitée chujni, ¿no kuixin juachaxin me e? ¿Á ngajní o chujni kuituan an?

Tjume e jitjakaxin kichuu xa ko stendachro xa:

—Siá xrondachrona ixi ndo Dio tsiketuen en xi Juan, xrondachro xi ji i: “¿Sonda kuitikaon anta ti ndachro xi Juan?”

<sup>26</sup> Ko siá xrondachrona ixi chujni, kain ni tjajna tsoñao nã ixi xi Juan ndachro nã nichja xa chijnie ndo Dio.

<sup>27</sup> Tjume e juatingíexin xa:

—Nóna ina ngisen.

Ko ndo Jesús ndachro ndo:

—Jan an kaxon xrontatju inta ngisen chjána juachaxin rinta a ji i.

*Ndo Jesús juakoxin ndo chijnie yuu xichájan*

<sup>28</sup> Tjume e ndachro ndo Jesús:

—¿Nge e ndachronta ixi ti tseki anta? Bake e naa xi ko xi me e chóna xa yuu cháje en xa, ko sa ó konchjiñe e xa ngajin naa cháje en xa ko ndachro xa: “Itjia nche é ixrã chjaka ti jii ntãa tu uva.”

<sup>29</sup> Ko juate e chán: “Na i, tjaun a itsji”, ichro chán. Ko tjume e kuindoxin chán ti jixraxaon chán ko kuitikaon chán ti ndachro ndotée chán.

<sup>30</sup> Ko tjume e kuitsje e xa inaa cháje en xa ko xraje o kuetuen en xa chán itsji chán ngataon ijngi ti jii ntaa tu uva ko juate e chán: “Jan an chao itsji”, ichro chán. Ko jui a chán.

<sup>31</sup> Tjume e juanchangi ndo Jesús:

—¿Ngixe e ti yuu chajan kuitikaon chán nge e kuetuan an ndotée chán?

Ko je e sen ndachro sen:

—Chán sa ó kuituen en.

Ko ndo Jesús ndache ndo sen:

—Ko nduaxin xrontatjunta ixi chujni tjanchia tomi xroxrajon ngajin xi tetuan an ko nchri chónnda kueya xi, ni me e ícha sa ó tsixin in na ti tetuan an ndo Dio ko tjume e ja anta.

<sup>32</sup> \*Ixi ndo Juan tikitée chujni, kujj ndo ko ja anta kuitikaon anta ti chronga ndo, ko ni xenge e na ko nchri chónnda kueya xi, ni me e kuitikaon na ti ndachro ndo. Ko ja anta maski bikonta jaña, kuindoxin anta ko kuitikaon anta.

*Xi nche e xra ña i*

*(Mr. 12:1-12; Lc. 20:9-19)*

<sup>33</sup> Ndo Jesús ndachro ndo:

—Tseki anta inaa chijni. Xranchi naa xi kuenga itsjé ntaa tu uva ngaya chjakée xa. Ko juinchéñe e xa ntaa tu uva naa korra, ko inge xa ti no tsáñaxin ndée tu uva. Kaxon juinchekonchjian xa naa ntaa ijié ti no xrotsjéxin xa nchijí jngi e xa.

’Ko tjume e juatoya xa nunte me e ngajin kaxin ni nche e ixra ko nchakon xroxejo tu uva je e na tsajon na ti tikinixin en xa ko tjume e sakjui xa ikjín.

34 Ko nchakon kuaxi xejo tu uva, xi nunte e xruan an xa kaxin ni nchexrée xa tsjirué e na tu uva ti tikinixin en xa.

35 Ko ni kuitu e ijngi chonda ntaá tu uva, ndako a juinche e na ixi itsé na xi nchexrée xi nunte e, naa xa bikaon xa, inaa xa naakóñaxón na xa, ko inaa xa kuaxi na xa ixro ko xro an nge e kuajon na.

36 Tjume e xi nunte e xruan an xa ikaxin xi nchexrée xa ko xraje o juinчекao na ni me e.

37 'Ko tjume e xruan an xa cháje en xa ixi xraxaon xa xrochónde e na chán juasaya.

38 Ko hora bikon na cháchjen en xi nunte e, ja in kuintejao na: “Chán ña tsitue e chán kain nge e chónda ndotée chán. Cháña naatsóñaxónna chán ixi jaña tsitueina kain nge e tikinixin en chán.”

39 Tjume e itsé na cháchjen en xi nunte e ko kuantsjexin na chán chjaka ko naakóñaxón na chán.

40 Tjume e ndo Jesús juanchangi e ndo sen ste nti a:

—Nchakon tsji Nchée chjaka, ¿nge e sinчекao xa ni nchexra ña i?

41 Ko je e sen juatingíexin sen:

—Nchakon tsji nchée ijngi me e tsikonóe a xa ni ña i ko naatsóñaxón xa na, ko tsjée xa ikaxin xinчекra tsitue e chjaka ko ni me e tsajon na itu tikinixin en xa.

42 Ko ndachro ndo Jesús:

—¿Á juinчекuanxin anta xroon chijnie ndo Dio tsikjin sen kuachronga ó sa ó?

Ixro chaxro jueña a ni ti te nchia,  
ko jai ixro me e, ixro ícha tjintee tsiki texin nchia.  
Ko ndo Dio jaña juinchéña ndo,

me e ti chaxro stetikonna jai.  
Jaña ichro chijnie ndo Dio.

<sup>43</sup> 'Méxin xrontatjunta juachaxien ndo Dio tsachrja a ja anta ko tsayé e ikaxin chujni juachaxin me e ko je e ni me e jian tsitikaon nā ixi tsajon nā nge e tikinixin en Ndo Dio.

<sup>44</sup> Ko ngisen tsitsingata a ixro me e naatsenxón sen, ko siá ixro me e tsitsingata a ixro naa chujni, naa tsontsingaxon chujni.

<sup>45</sup> Ko xitaana tetuan an ko xi fariseo kuin en xa chijni juakoxin ndo Jesús, me e kuienxin xa ixi kondeexin je e xa ti ndachro ndo.

<sup>46</sup> Me e tjaun xa xrotsé xa ndo Jesús ixi tsije e xa ndo, ko jua i juinche e xa ixi ni tjajna ndachro nā ixi je e ndo Jesús nichja ndo chijnie ndo Dio.

## 22

### *Kia kute e sen*

<sup>1</sup> Íjngo ndo Jesús kuaxi juako ndo ixi chijni ko ndachro ndo:

<sup>2</sup> —Ti no tetuan an ndo Dio me e xranchi naa chijni nichja ixi naa ndo rey juinchéña ndo naa kia ixi tsute e chjen en ndo.

<sup>3</sup> Ko xruan an ndo xi nchexrée ndo tsikiye e xa chujni tsii nā kia; ko ni me e chro a nā kuii nā.

<sup>4</sup> Ko íjngo kuetuen en ndo xi nchexrée ndo ko ndachro ndo: “Ndachenta nā ixi ó konchjian ti sine nā, kain iko juntao ó kuen en ba ko kain nge e ó chao jii tsintekii nā kia”, jaña kuetuan an ndo rey.

<sup>5</sup> Ko ni kuiye e ndo kia kuitikaon a nā. Naa xi kuiye e ndo sakjui xa chjakée xa ko inaa xa sakjui xa kuitsje e xa ixrā chóna xa.

<sup>6</sup> Ko ikaxin n̄a itsé n̄a xi bikao juajnéé ndo rey ko bikaon xa ko naakóñaxón n̄a xa.

<sup>7</sup> Tjume e ndo rey kuin en ndo nge e juinchekao n̄a xi xruan an ndo, me e tsango koñao ndo ko kuetuen en ndo xi soldadoe ndo ko naakóñaxón xi soldado ni ña i me e ko juaaka xa tjajnéé n̄a.

<sup>8</sup> Tjume e ndache ndo ni nchexrée ndo: “Kain nge e ó konchjian ixi sen tsute e ko ni kuiya a tsi a n̄a ixi tikinixien a n̄a tsii n̄a kia.

<sup>9</sup> Méxin, itjinta cha o tachrxexin chujni tjajna ko ndachenta ngixe i chujni tsii n̄a kia.”

<sup>10</sup> Ko ni nchexra sakjui n̄a ko juejo n̄a itsjé chujni, ni jian ko ni ña i, ko kia me e tsango itsjé chujni xejo.

<sup>11</sup> Hora kuixin in ndo rey ti ste ni kuji kia, bikon ndo naa xi jitsá i manta take e ni itji kia.

<sup>12</sup> Me e ndachro ndo: “Ja a, ¿sonda kuixi ian nti i ko tsikake a manta tetsáa ni itji kia ngajin sen tsute e?” Ko xi me e xro an nge e juatingíexin xa.

<sup>13</sup> \*Tjume e ndo rey kuiye e ndo ni stetaya ti sine chujni ko ndachro ndo: “Itsenta xi ña ko tinteenta tutée xa ko itja xa ko tjankanta xa nduja ti naxixe e; nti a xrotsjanga xa ko tsé tō neno xa.”

<sup>14</sup> Tjume e ndachro ndo Jesús:

—Ja in ton en ixi kueya ni tjaun tixin in ti tetuan an ndo Dio ko je e ndo tsjé a sen tsinche e ndo.

*Ti tsjengani n̄a ngajin xi tetuan an*

*(Mr. 12:13-17; Lc. 20:20-26)*

<sup>15</sup> Tjume e xi fariseo sakuntekji xa ko juao kichuu xa xranchi sinche e xa ixi ndo Jesús

ndako a xronichja ndo naa nge e ixi jaña chao tsjankata a xa ndo ijie.

<sup>16</sup> Méxin xruan an xa kaxin xi nchekuen en xa ko kaxin xi nchexrée xi Herodes ixi tsjanchangí e xa ndo Jesús ja in:

—Maestro, konónana ixi ja anta je o ti nduaxin nichjanta, ko ndako tjakonta chijnie ndo Dio, ko ja anta ta inta juachjaon nge e nichja chujni, ixi ja anta tsje enta aséen chujni.

<sup>17</sup> Méxin nge e chronta, ¿á chao tsjenge eni nã xi tetuan an kuí xín tjajna Roma?

<sup>18</sup> Ko ndo Jesús no e ndo ixi ndako a stexraxaon xa, me e ndachro ndo:

—Ja anta ndako a xraxaonnta. ¿Sonda tjaunnta ixi jan an ndako a xronichja?

<sup>19</sup> Chjánanta naa tomi xengaxin nã.

Ko je e nã kuajon nã naa tomi ndatin in denario.

<sup>20</sup> Tjume e ndo Jesús juanchangi e ndo xa:

—¿Xranchi ndatin in ko ngisen ikon jinito tomi ji i?

<sup>21</sup> Ko je e nã juatingíexin nã:

—Xi César tetuan an Roma, me e xi ikon.

Ko je e ndo ndachro ndo:

—Chje énta xi César nge e tjanchia xa ko chje énta ndo Dio nge e tikinixin en ndo.

<sup>22</sup> Ko kuin en nã ja in, me e xraxaon nã:

—Xi ji in tsango no e xa.

Tjume e sakuintekji nã.

*¿Á nduaxin xroxechónni?*

*(Mr. 12:18-27; Lc. 20:27-40)*

23 \*Ko xraje o nchakon me e, kuntekii kaxin xi ndatin in saduceo, xi titikaon a ixi xroxechón chujni, ko juanchangi e xa ndo Jesús:

24 —Ja anta ti nchekuen ennta chujni, nge e chronta ti tsindachro ndo Moisés ixi siá naa xi tsen en xa ko tsintue a xa chjan ngajin janchri e xa, xi kichuu xa xrokonda tsute e xa nchrinchri e xi kuen en, ko siá xrochón<sub>da</sub> na ichjan, ichjan me e xrokjui xranchi chjen en xi kuen en.

25 Bake e ngakjen en jan anna yaato xi, ko xi me e kichuu xa. Ko xi sa ó kute e xa ko kuen en xa ko kuichón<sub>da</sub> i janchri e xa ichjan, me e xi kichuu xa kute e xa nchrinchri e xi kuen en.

26 Ko jaña kon en xi yuxin, kaxon xi nínxin, ko kain yaato xa.

27 Ko kain xa kuen en xa ko kaxon je e nchra kuen en nchra.

28 Nchakon xroxechón kain chujni tsiken en, ¿ngixe e ti yaato xa tsoña ndoxi e nchra ixi kain xa kute e xa nchra?

29 Tjume e ndo Jesús juatingíexin ndo:

—Ja anta, ¿á tsango noa inta nge e ichro xroon chijnie ndo Dio ko á chuxin anta juachaxien ndo?

30 Ixi nchakon xroxechón kain chujni, xro an ngisen tsute e nti a, ko xro an sen xroxrajon ixi tsute e sen, ixi sen xroxechón tsintee sen xranchi sen ángel ne e ndo Dio ste ngajní.

31 Chijni nichja ixi xroxechón ni tsiken en, ja anta, ¿á juinchequanxin anta nge e ndachro chijnie ndo Dio? Ixi je e ndo ja in ndachro ndo:

32 “Jan an ndo Dio, ndo titikaon ndo Abraham ko ndo Isaac ko ndo Jacob.” Ndo Dio je a ne e ni tsiken en. Na i. Je e ndo ndo Dio ne e ni stechón.



<sup>33</sup> Ko ni kuin en nge e nichja ndo xraxaon na ixi je e ndo tsango no e ndo ko jian nichja ndo.

*Chijnie ndo Dio, chijni ícha tetuan an*

*(Mr. 12:28-34)*

<sup>34</sup> Kain xi fariseo kono e xa ixi ndo Jesús jian juatingíexin ndo ngajin xi saduceo ko juinchekita ndo xa, méxin juejo kichuu xi fariseo

<sup>35</sup> ko naa xi fariseo, naa xi ícha no e ko tjako xa chijnie ndo Dio, juanchangi e xa ndo Jesús ixi tjaun xa ndako a xrojuatingíexin ndo:

<sup>36</sup> —Maestro, ¿ngixe e chijnie ndo Dio ti ícha tetuan an?

<sup>37</sup> Ndo Jesús ndachro ndo:

—“Ja anta xrotjue enta ndo Dio ixi nchijíi asáanta ko ti xraxaonxinnta.”

<sup>38</sup> Ji in chijni sa ó ko ícha tjintee kuetuan an ndo Dio.

<sup>39</sup> Ko chijni yuxin xraje o ndachro chijni: “Xrotjue enta ni kichuunta xranchi tjue enta asáanta.”

<sup>40</sup> \*Yui chijni ji in ti kuetuan an ndo Dio kuachrjenixin kain ti kuetuan an ndo, ti juako ndo Moisés, ko kain ti juako sen kuachronga chijnie ndo Dio ó sa ó.

*¿Ngisen kuachrjenixin ndo Cristo?*

*(Mr. 12:35-37; Lc. 20:41-44)*

<sup>41</sup> Ko xra ste kain xi fariseo, ndo Jesús juanchangi e ndo xa

<sup>42</sup> ko ja in juanchangi ndo:

—¿Nge e xraxaonnta ixi ndo Cristo? ¿Ngisen kuachrjenixin ndo?

Ko je e xa ndachro xa:

—Ndo Cristo tsikachrjenixin ndo ndo David.

<sup>43</sup> Tjume e ndo Jesús ndachro ndo:

—Ndo David nichjaxin ndo ixi Espíritue ndo Dio ko ndachro ndo: “Nchána”,

<sup>44</sup> Me e ja in nichja Nchána Dio ngajin Nchána:

“Take énta ndatsjonxin jian ti ritjén jan an, ko chon énta ti tsakeja kain ni ningakon annta ngangí tutáanta.”

<sup>45</sup> ¿Xranchi ndo Cristo xrokuachrjenixin ndo ndo David ko je e ndo David ndachro ndo ixi Nchéé ndo ndo Cristo?

<sup>46</sup> Ko jua i juate e ninaa xi ste nti a ti juanchangi ndo Jesús ko ti hora me e kuaxi í xro an nge e juanchangi e xa ndo.

## 23

*Ndo Jesús juangí e ndo xi tjako ley ko xi fariseo  
(Mr. 12:38-40; Lc. 11:37-54; 20:45-47)*

<sup>1</sup> Ko kuaxi ndo Jesús nichje e ndo chujni kao sen teyuu chrikao ndo, ko ja in ndachro ndo:

<sup>2</sup> —Xi tjako ley chijnie ndo Dio ko xi fariseo xraxaon xa ixi je e xa ícha jian no e xa chijni juako ndo Moisés.

<sup>3</sup> Méxin, kain nge e tsituan an xa titikaonnta ko nche enta me e, ko nche anta xranchi nche e je e xa ixi je e xa ndachro xa naa nge e ko je e xa nche a xa ti ndachro xa.

<sup>4</sup> Ixi je e xa tetuan an xa ti tsango tangi sinche e chujni, ko je e xa titikaon a xa naa nchichjaon ko tingijna i xa chujni ixi tsitikaon na kaxon.

<sup>5</sup>\*Ko kain ti jian nche e xa tjaun xa tsikon chujni ko nche e xa juaxruxin take e xa nganito ntatjen xa ko ntachaan xa kaxin chajua iton, nti a tsikjin xa chijnie ndo Dio ko manta tetsáa xa tsikake e xa kueya chajua ícha jíé ixi ti tetsáa ikaxin chujni.

<sup>6</sup>Ko nchakon itji xa ni ngo o xrojān kia tjaun xa ixi chujni jian sinchesaye e nā xa.

<sup>7</sup>Ko ngataon ndasin ko ngaya cha o tjaun xa ixi chujni tsajon nā juajna ko xrochónde e nā xa juasaya\* ko sinchekin in nā xa xi tjako chijnie ndo Dio.

<sup>8</sup>'Ko ja anta tjanča inta ixi chujni xrontatjunta nā sen nchekuen en chujni ja anta, ixi ja anta naakua naa ndo nchekuan annta me e ndo Cristo ko kain ja anta kichuunta.

<sup>9</sup>Ko xro an ngisen ndachenta ndotánta ngata a nunte nti i ixi naakua naa Ndotánta chondanta, ndo jii ngajní.

<sup>10</sup>Ko ndachro anta ixi ja anta ritaun enta chujni ixi je o ndo Cristo me e ndo jitaon en chujni.

<sup>11</sup>\*Ngisen ícha tjaun tsituan an, sen me e xrokonda xrokjan sen chujni nche e xráanta.

<sup>12</sup>\*Ixi ngisen ícha sinchejíé aséen, sen me e ícha nunte tsintee sen, ko sen nchejíé a aséen, sen me e ícha tsetuan an sen.

<sup>13</sup>'Ko lastu ja anta ti nchekuen ennta chujni ko ja anta fariseo, ti tjako yuu ikonnta, ti tije enta ntāchja ti tetuan an ndo Dio ixi tsixin a chujni ko ja anta tixin anta ko tintue anta tixin in ikaxin chujni tjaun tixin in.

---

**23:5** Mt. 6:1. \* **23:7 juasaya** respeto, honor **23:11** Mt. 20:26, 27; Mr. 9:35; 10:43, 44; Lc. 22:26. **23:12** Lc. 14:11; 18:14.

14 'Ko lastu ja anta ti nchekuen ennta chujni ko ja anta chujni fariseo, ti tjako yuu ikonnta, ko tantsje enta nchri ka an ndo a nchra, ko tjaunnta tsikon chujni ixi tsango nichje enta ndo Dio. Méxin ja anta ícha tangi tson annta.

15 'Lastu ja anta ti nchekuen ennta chujni ko ja anta chujni fariseo, ti tjako yuu ikonnta, ko tatsinganta ndachaon ko tsango ichrjinta ixi ts-jachanta naa chujni tsitikaon ti tjakonta, ko nchakon juachanta chujni me e, tsango chinga nchekuen ennta na, ko chujni me e ícha ndako a nche e chujni ko chujni me e ícha tikinixin en chujni xrochexin xro i ixi ja anta.

16 'Lastu ja anta ixi tjakonta ko ja anta ndakútsínnta. Ndachro ja anta nchakon xrojan chujni xrondachro ixi sinche e xrojan nge e ko ni ngo xronichjaxin sen ko ndachro ja anta ixi tjinte a me e. Ko siá chika oro jii ngaxin in ni ngo xronichjaxin sen, ja anta ndachronta ixi chijni me e tjintee ko nduaxin xroxenga na.

17 Tsango ninta ja anta ko ntakutsinnta. ¿Á tsango tjintee chika oro o á tsango tjintee ni ngo juinchetjúáxin chika oro?

18 Kaxon ndachro ja anta: “Xrojan chujni xrondachro ixi sinche e xrojan nge e ko xronichjaxin sen altar ko ja anta ndachronta ixi tjinte a me e. Ko siá xrondachro sen ixi sinche e sen xrojan nge e ko xronichjaxin sen nge e chjée sen ndo Dio ngata a altar me e ti tjintee ichro ja anta ko me e xrondachro ixi nduaxin xroxenga na.”

19 Tsango ninta ja anta ko ntakutsinnta. ¿Á tsango tjintee nge e xrochje énta ndo Dio?, o, ¿á

ícha tsango tjintee altar ti tontjúáxin nge e tsajonnta?

<sup>20</sup> Ixi ngisen xrondachro ixi sinche e xrojan nge e ko xronichjaxin sen altar, je a nichjaxin sen je o altar. Na i. Kaxon nichjaxin sen kain nge e jii ngata a nti a.

<sup>21</sup> Me e ngisen xrondachro ixi sinche e sen xrojan nge e ko xronichjaxin sen ni ngo, je a nichjaxin sen je o ni ngo. Na i. Kaxon nichjaxin sen ndo Dio jii nti a.

<sup>22</sup> \*Méxin, ngisen xronichjaxin sen ngajní, me e kaxon nichjaxin sen trono ne e ndo Dio ko ngisen jitetuan an nti a.

<sup>23</sup> 'Lastu ja anta ti tjakonta ley ko ja anta chujni fariseo. Ja anta ndako a xraxaonnta. Ja anta chje énta ndo Dio ti ite nge e tikinixin tsajonnta ne e kamenta ko anís ko comino. Ko titikaon anta ti nge e tjako ley: ti jian xrokonda sinche enta ko ti xrokonda tsikonóe enta sen kichuunta ko ti xrochuntianta ndo Dio. Kain ji i xrokonda sinche enta ko kaxon ti nge e tikinixin en ndo Dio tsajonnta.

<sup>24</sup> Ja anta ntakutsinnta, ti nchekangi enta kuchjisen nchíín ixi tsingainta ba, ko ja anta tinganta naa kucamello tsango ijié.

<sup>25</sup> 'Lastu ja anta ti tjakonta ley ko ja anta chujni fariseo. Ja anta ndako a xraxaonnta. Ja anta tsango nchetjúánta tuenxin vaso ko laato, ko ngaxin in tsango kitja ixi xraxaonnta xrotsénta nge e je a tikinixin anta.

<sup>26</sup> Ja anta chujni fariseo tsango ntakutsinnta. Sa ó xronchetjúánta ngaxin in vaso ko laato ko

me e tsontjúá tuenxin.

<sup>27</sup> \*Lastu ja anta ti tjakonta ley ko ja anta fariseo. Ndako a xraxaonnta. Ja anta stenta xranchi naa tuye tsixrabaa chujni, tsango chaxro tsje e nduja, ko ngaxin in jikaon nte e chujni tsiken en ko kain nge e tjúá i.

<sup>28</sup> Jaña ja anta tjaunnta chujni tsikon na ixi ja anta tsango jiannta, ko ngaxin in asáanta ndako a xraxaonnta ko ña inta.

<sup>29</sup> Lastunta ti tjakonta ley ko ja anta fariseo. Ja anta ndako a xraxaonnta. Ja anta ti juincheñanta lápida ti tsixrabaa sen kuanichja chijnie ndo Dio ó sa ó ko chaxro nchetsojinnta ixro jita a tuye ne e sen tjúá aséen.

<sup>30</sup> Ko ja anta ndachronta siá xrobake enta nchakon bake e sen tachrí anta xrobingijna inta sen kóña sen juako chijnie ndo Dio.

<sup>31</sup> Ko jaña ja onta ndachronta ixi nduaxin ja anta tsikachrxjinnta sen kóña sen kuanichja chijnie ndo Dio ó sa ó.

<sup>32</sup> Méxin, jai ja anta tjaunnta sinchejxinnta ti kuanche e sen tachrí anta.

<sup>33</sup> \*Ja anta ti tsikachrxjinnta kunchee! ¿Xranchi satsinge enta nchakon xrochexinnta xro i?

<sup>34</sup> Méxin, jan an xroxruan an chujni xrochronga chijnie ndo Dio ko chujni tsango no e ko chujni nduaxin tjako chijnie ndo. Ko ja anta naatsóñaxónnta sen ko tankanitonta sen ntacru ko ikaxin sen tson inta sen ngaxin in ni ngo ko tsenginta sen tjajna ko tjajna.

<sup>35</sup> Ko méxin, ja anta tsamanta ijje ti ne e sen jian kuenxin ngata a nunte ó sa ó. Ko tsamanta ijje ixi ti kuaxi kuen en sen jian xrangíxixín ndo Abel, ndo jian, ko kain sen hasta ti ndo Zacarías, chjen en ndo Berequías, kóñaxinnta tjenka altar ni ngo.

<sup>36</sup> Ko nduaxin ntatjunta ixi kain ijje me e tsama chujni jii jai.

### *Tsjanga ndo Jesús*

*(Lc. 13:34-35)*

<sup>37</sup> Tjume e ndachro ndo Jesús:

—Jerusalén, Jerusalén, ja anta ti ton innta sen tjako chijnie ndo Dio ko tóñaxinnta ixro sen xruan an ndo Dio ngajinnta. Jan an tsango tja on xrojuejunta xranchi naa kuchika tejo chjen en ba chringi nene e ba ko ja anta tjaun anta.

<sup>38</sup> Ko jai ndo Dio tsintu anta ndo.

<sup>39</sup> Ko jan an ntatjunta ixi í tsikon aninta jan an ijngo tsitjaja nchakon xrondachronta: “Tsango jian ngisen kuji ixi juachaxien Ncháina.”†

## 24

### *Ndo Jesús chronga ndo ixi xrojamangi ni ngo*

*(Mr. 13:1-2; Lc. 21:5-6)*

<sup>1</sup> Hora kuachrjexin ndo Jesús ni ngo, konchjiñe e sen teyuu chrikao ndo ixi tsanchangi e sen ndo Jesús xranchi tsikonchjian ni ngo.

<sup>2</sup> Tjume e ndo Jesús ndachro ndo:

—¿Á stetsje enta nchijí tjatu o ji in? Ko jan an nduaxin ntatjunta ixi kain ji in xrochjejin, ko

---

† **23:39** *Ncháina* Señor *Ncháina* Jesús o *Ncháina* Dio

xro an ixro tsake e ngata a inaa ixro, kain xrochje-jin.

*Nge e tson en nchakon tsjexin kain nge e*

*(Mr. 13:3-23; Lc. 21:7-24; 17:22-24)*

<sup>3</sup> Tjume e ikjui sen ti jii ijna Olivo ko nti a ndo Jesús bake e ndo nunte ko sen chrikao ndo konchjiñe e sen ko ja in ndachro sen:

—Ndachronta ngisa xrojамangi ni ngo ko, ¿nge e tson en nchakon tsji inta íngo, ko nchakon tsjexin kain nge e jii ngata a nunte xasintajni?

<sup>4</sup> Ko ja in juate e ndo Jesús:

—Jian tsje enta xro an ngisen sintaya anta.

<sup>5</sup> Ixi tsii kueya chujni xronichja na xranchi jan an ko ja in xrondachro na: “Jan an ndo Cristo.” Ko sincheye e na kueya chujni.

<sup>6</sup> Ko tsin ennta steteto kaxin tjajna ko kaxon tsin ennta xro tsaxi tse to ikaxin tjajna, ja anta xrakon anta xro kain ji i xrokonda tson en ko xra je a tsjexin kain nge e ngata a nunte.

<sup>7</sup> Naa tjajna tse to ngajin inaa tjajna ko naa xi tituan an tse to xa ngajin inaa xi tituan an. Ko tsango itsje chujni tsoni e na ko tsango tsatse na jinta ko tsango tsontengi nunte ngixe i tjajna.

<sup>8</sup> Kain ji i je o nanda xrangixin ti ijié juachjaon tson en chujni.

<sup>9</sup> \*Ko nchakon me e xrotsenta na xro tsikaonta ko kaxinnta naatsónaxónnta na ko itsje chujni xroningakon annta kondanaxin jan an.

<sup>10</sup> Ko nchakon me e itsje sen íxrochuntia ina sen ko je o sen tsjangí e kichuu sen xrochónde e kichuu sen juaño.



11 Ko kueya xi xrondachro xa ixi je e xa nichja xa chijnie ndo Dio ko jaña sincheye e xa kueya chujni.

12 Ko ixi tsango tsonkueya ni ndako a nche e, méxin kaxon sen titikaonna íxrotjue a kichuu sen.

13 \*Ko kain sen xrochuntiana jan an ko tsokuaxi en sen ti chinga sinchekaon na sen, sen me e tsjacha sen tsechón sen kain nchakon.

14 Ko chijni ji i ti tjako jan an tsono e kain chujni jii ngata a nunte xasintajni, ixi jaña kain tjajna, je e na tsono e na ngisen jan an, tjume e tsjexin kain nge e.

15 'Nchakon tsikonnta tsii xi tsango ndako a nche e ko tsake e xa ngaxin in ni ngo tsango tjúá, ji in ti ó tsichronga ndo Daniel jitaxin chijnie ndo Dio. Méxin ngisen nchekuanxin xroon ji in xrokonda tsienxin sen.

16 Nchakon me e sen ste nunte Judea xrokonda tsinga sen ti jii ijna.

17 \*Ko ngisen jii ngata a nchando a, xroxingajin a sen tsjirué e sen xrojan nge e.

18 Ko sen ste ngataon ijngi, íxrokjan i sen ixi tsikao sen ti tsetsáa sen.

19 Ko lastu sen nchri, sen steyá chjen en ko sen stenchekaki ichjan nchakon me e.

20 Nichje enta ndo Dio ixi nchakon tsinge enta ti chinga tson en, je a nchakon tania ichrin o je a nchakon tjoké e chujni.

21 \*Ixi tsake e ijié juachjaon ngata a chujni, xranchi bake a xra ti xrangixixión nunte xasintajni, ko tsoen a ícha tjume e.

<sup>22</sup> Ndo Dio tsango tjue e ndo sen kuinche e ndo, méxin nchakon tsii ijié juachjaon, tsonchrjen a juachjaon me e, ixi siá na i, kain sen tsen en sen.

<sup>23</sup> 'Méxin siá xrojan ngisen xrondachro: “Tsje enta nti i jii ndo Cristo”, o “Tsje enta noyá a jii ndo”, titikaon anta na.

<sup>24</sup> Ixi tsonoxin kaxin xi xrondachro xa je e xa ndo Cristo ko kaxin xa xrondachro xa ixi je e xa nichja xa chijnie ndo Dio ko tsjako xa ijié juachxin ko ijié ixra sinche e xa, jaña tjaun xa sincheye e xa chujni tsikinche e ndo Dio.

<sup>25</sup> Ó sa ó ntatjunta nge e tson en.

<sup>26</sup> \*Méxin, siá xrontatjunta na: “Tsje enta ti jii ntajie, nti a jii ndo Cristo”, tji anta. O xrondachro na: “Jii ndo ngaxin in nchia”, titikaon anta.

<sup>27</sup> Ixi xranchi tachrjexin xro i tóngixin ndat-sjonxin chuya ko ti jii xro i ti tetaonxin nchakon, jaña tsikon chujni nchakon tsii Chjen en ndo Dio, xjan jongí e xranchi chujni.

<sup>28</sup> \*Ixi ti no jitsinga ti tsiken en, nti a xroxexo kuntachrjen.

### *Nchakon xrokjan Chjen en ndo Dio*

*(Mr. 13:24-37; Lc. 21:25-33; 17:26-30, 34-36)*

<sup>29</sup> \*Ko tsatsinga ti chinga tson en chujni, nchakon me e chjiixro ítsingasáña i chjiixro ko tsonaxixe e. Ko nchanitjao ítsajon a chjixrue, ko nchanotsé tsitsingaxin nchanotsé ngajní ko kain nge e jii ngajní tsontengi.

<sup>30</sup> \*Ko tjume e tsonoxin ti jii ngajní naa nge e xrochronga ixi ikjan Chjen en ndo Dio, xjan

jongí e xranchi chujni. Ko kain chujni jii ngata a nunte tsango xroxronka nā ixi tsikon nā Chjen en ndo Dio tsii xjan ngakjen en itjuj ko tsika o xjan ijié juachaxin ixi tsango tituan an xjan.

<sup>31</sup> Ko xroxruan an xjan sen ángel ne e xjan ixi séen tsanoa sen tjao e sen, me e xroxejo kain chujnie xjan tsj xin nganoó lado nunte xasintajni.

<sup>32</sup> 'Tanginta chijnie naa ntaa tu higo: nchakon taxi xechji ntaa, ko tajon ntaa kayua me e xrondachro ixi ó tsaxi tsii ichrin.

<sup>33</sup> Jaña nche e ja anta kaxon, nchakon tsikonnta tsatsinga kain ji i, me e tsono anta ixi Ncháina ó tuinxin tsii ndo.

<sup>34</sup> Ko nduaxin ntatjunta ixi kain jii sa ó xrokonda tson en, ko chujni jichón jai xratsen a nā.

<sup>35</sup> Ngajní ko nunte xasintajni tsitjáña. Ko chijni nichja jan an, nai a tsitjáña chijni.

<sup>36</sup> 'Ko ngiora ko ngixe e nchakon tsii ndo xro an ngisen no e, ni sen ángel ste ngajní noe a sen, ni jan an, Chjen en ndo Dio, nóna i. Je o Ndotána, me e ndo no e.

<sup>37</sup> 'Ko xranchi kon en nchakon bake e ndo Noé jaña tson en nchakon tsii Chjen en ndo Dio, xjan jongí e xranchi chujni.

<sup>38</sup> Ixi nchakon xra chrete a chujni inda, je e nā bajine nā ko baki i nā, bakute e nā ko bakajon kichuu nā ixi tsute e nā, ko kuij nchakon kuixin in ndo Noé ntabarco,

<sup>39</sup> ko kuienxin a nā nge e xrokon en, kuija ichrin ko inda sabikao nā ko kjun en nā inda. Jaña tson en nchakon tsii Chjen en ndo Dio, xjan jongí e xranchi chujni.

<sup>40</sup> Ko xranchi nchakon me e jaña tsake e yuu xi ngataon ijngi, naa xa satsikao ndo xa ko í naa xa tsitu e xa.

<sup>41</sup> Yuu nchri jita o nchra, naa nchra satsikao ndo nchra ko inaa nchra tsitu e nchra.

<sup>42</sup> 'Jian tsje enta ixi noa inta ngiora tsi i Ncháina.

<sup>43</sup> \*Ja anta xrokuienxinnta ji in ixi nchéé naa nchia, siá xrokono e xa ngiora tiie tsij naa xiche e ixi tsee xa, je e nchéé nchia xrokuejua i xa ixi tsintue a xa xiche e tsixin in xa ko tsee xa.

<sup>44</sup> Méxin, ja anta tarichrin anta ixi Chjen en ndo Dio, xjan jongí e xranchi chujni, tsij xjan hora ja anta xraxaon anta.

*Xinchexra titikaon ko xinchexra titikaon a  
(Lc. 12:41-48)*

<sup>45</sup> 'Naa xinchexra, xi jian titikaon, xi me e tituen en xa xinchexrée nchéé xa ko tsajon xa nge e sine ni nchexra hora xrokonda sine na.

<sup>46</sup> Juaxruxin tsake e xinchexra, xi titikaon, ixi nchakon tsij nchéé xa tsitja ndo xa ixi jinche e xa nge e kuituen en xa.

<sup>47</sup> Ko nduaxin xinchexra me e tsayé e xa ijié juachaxin tsituan an xa ngata a kain ti tjintee chóna nchéé xa.

<sup>48</sup> Ko siá xinchexra ña i xroxaxaon xa ixi nchéé xa tsonchrjen en tsij

<sup>49</sup> ko tsaxi xa tsóña xa xinchekao xa xra ko tjume e tsaxi xa tsi ikao ko sinekao xa ni tsikuan,

<sup>50</sup> ko nchakon tsij nchéé xi nchexra ña i, ngiora ko nchakon ti je e xa noe a xa

<sup>51</sup> ko nchéé xa tsituan an ixi tsikaon xa ko xroxruan an xa ti ste kain ni ña i ko nti a xrotsjanga xa ko tsē tō neno xa ixi tsango xroxronka xa.

## 25

### *Ndo Jesús juakoxin ndo ixi ite nchrichajan*

<sup>1</sup>\*Ndo Jesús ndachro ndo:

—Ti tetuan an ndo Dio tson en xranchi kon en ti ite nchrichajan, nchrichan ikjuí ti kute e chujni, ko kain je e nchrichan itsé nchrichan ti tikia ndaxi e ko kuachrje nchrichan kuichón en nchrichan ndo tsute e.

<sup>2</sup> Na ó nchrichan me e tsango jian titikaon nchrichan ko na ó nchrichan tsango se e nchrichan.

<sup>3</sup> Ko nchrichan se e bikao nchrichan ti no tikia ndaxi e ko tsikikao a nchrichan yee ndaxi e xrohexin xro i.

<sup>4</sup> Ko nchrichan jian titikaon bikao nchrichan ti no tikia ndaxi e ko kaxon bikao nchrichan ícha ndaxi e ixi tsanga i xroie nchrichan.

<sup>5</sup> Ko konchrjen en ndo tsute e, ko je e nchrichan itja jaa nchrichan ko kuejua nchrichan.

<sup>6</sup> Ko ngusine tiie kuin en nchrichan nichja kaxin chujni: “Ó kuji ndo tsute e, tachrjenta ixi ó kuji ndo.”

<sup>7</sup> Me e kain nchrichajan bingatjen nchrichan ko kuaxi bikia nchrichan ndaxi e.

<sup>8</sup> Ko na ó nchrichan se e, juanchia nchrichan ndaxi e ngajin na ó nchrichan jian titikaon: “Chjánananta nchín ndaxi e ixi jitanga xroina.”

<sup>9</sup> Ko nchrichan jian titikaon ndachro nchrichan: “Na i, ixi batsitjáña ina ndaxi e jan anna ko

ja anta. Cháña itjinta tike nanta ndaxi e ti no nchekji na nda.”

<sup>10</sup> Ko na ó nchríchan se e, nandá kuachrje nchríchan bike na nchríchan ndaxi e, ko je e ndo tsute e kuij ndo. Ko nchríchan na ó, jian titikaon, kuixinkao nchríchan ndo tsute e, ko bibe e ntachja.

<sup>11</sup> \*Ko tjume e kuij na ó nchríchan se e, ko kuaxi ndachro nchríchan: “Ja anta ti tsuta anta, tantje enta ntachja ixi tsixin inna.”

<sup>12</sup> Ko je e ndo ja in juatingíexin ndo: “Jan an nduaxin ntatjunta ixi chuxin anta.”

<sup>13</sup> Ko ndo Jesús ndachro ndo:

—Tarichrin anta ko jian tsje enta ixi noa inta ngixe e nchakon ko ngiora tsii Chjen en ndo Dio, xjan jongi e xranchi chujni.

### *Ndo Jesús juakoxin ndo ixi tomi*

<sup>14</sup> \*Tjume e ndachro ndo Jesús:

—Ti no tituan an ndo Dio tson en xranchi naa xi satsji xa ikjín, me e kuiye e xa xinchexrée xa ko bake e xa ngaya itja xinchexrée xa kain ti tjintee chóna xa ixi xinchexrée xa sinchenche e xa tomi xra.

<sup>15</sup> 'Ko naa xinchexrée xa kuayé e xa na ó mil tomi, ko inaa xinchexrée xa kuayé e xa yuu mil tomi, ko xi nínxin kuayé e xa naa mil tomi. Ko xi tomie kuajon xa tomi ngajin xinchexrée xa xranchi bikon xa chjakon en xinchexrée xa. Ko juexin kuajon xa tomi, tjume e sakjui xa ikjín.

<sup>16</sup> Ko xi kuayé e na ó mil tomi juinchenche e xa tomi xra ko juacha xa íjngo na ó mil tomi.

17 Jaña kaxon xi kuayé e yuu mil tomi juacha xa íjngo yuu mil tomi.

18 Ko xi kuayé e naa mil tomi ikjui xa ko juinchéña xa naa tuye ko juabaa xa tomie nchéé xa.

19 'Ko kuatsinga itsjé nano ikjan nchéé xinchexrā me e, ko juinchéñaka o kichuu xa kuenta.

20 Ko sa ó kuij xi kuayé e na ó mil tomi ko chjée xa nchéé xa íjngo na ó mil tomi ti juacha xa ko ndachro xa: “Ja anta chjánanta na ó mil tomianta ko jan an juacha íjngo na ó mil tomi.”

21 Tjume e nchéé xinchexrā me e ndachro: “Chao jian juinche e ja a, xinchexráana, ixi jian kuitikaoan. Ti kueya i tomi tjá a ko jian juinche e, ko jai ícha kueya tsaye é. Take é juaxruxin ja a.”

22 Tjume e kuij xi kuayé e yuu mil tomi ko ndachro xa: Yuu mil tomi chjánanta ko nti i jii íjngo yuu mil tomi juacha.

23 Tjume e nchéé xa ndachro: “Chao juinche e ja a, xinchexráana, ixi ja a jian kuitikaoan. Ko maski tsjé a kuayé e, jian juinchenche e tomi xrā, ko jai ícha itsjé tsaye é. Tatsinga ko juaxruxin tsojuna.”

24 Tjume e kuij xi kuayé e naa mil ko ndachro xa: “Nchána jan an nóna ixi ja a chujni tsango jintā ixi taye é nge e tikinixian ia ko tjejua ti no benga ia.

25 Méxin, xronkana ko ikjui juabaa tomia, taye é tomia. Nti i jii tomi.”

26 Tjume e juate e nchéé xinchexrā me e ko ndachro xa: “Ja a xinchexrā tsango ña ia ko tsango sa a. Siá no a ixi jan an tsango jintāna ko tandáa ti no benga i ko tjejo ti no kuintjī a tsee,

<sup>27</sup> cháña xrokuajuan tomina ngajin ninchexra banco. Nti a xrojuinchenche e na tomina xra, ko nchakon xrojui i jan an xrokuaya a chjen en tomina.”

<sup>28</sup> Kaxon ja in ndachro xa: “Tantsje enta xi ji in tomi chóna xa ko chje énta xi chóna ite mil tomi

<sup>29</sup> \*ixi ngisen chóna itsjé tomi, je e sen tsayé e sen ícha, ko ngisen tsjé a chóna, ti tsjé a chóna sen kaxon ti me e tsachrje e sen.

<sup>30</sup> \*Ko xinchexra ña i, xi se e, tjankanta xa nduja ti naxixe e, nti a xrotsjanga xa ko tse to neno xa.”

### *Tsoñe e ijje chujni ste nunte xasintajni*

<sup>31</sup> \*Nchakon xrokjan Chjen en ndo Dio, xjan jongí e xranchi chujni, tsika o xjan ijié juachaxin ixi tsango tsituan an xjan ko tsij kain sen ángel ko tjume e tseta a xjan ntaxitaon ko xrochóna xjan ijié juachaxin.

<sup>32</sup> Ko nti a xroxexo kain chujni ne e kain tjajna nunte xasintajni, nti a tsantsjendexin xjan ngujngu chujni, xranchi nche e sen tingatjia kutuchjon, tantsjendáa sen kutuchjon ko nango tsake e kubito.

<sup>33</sup> Ko tsake e xjan kutuchjon ndatsjonxin jian ko kubito ndatsjonxin ikjon.

<sup>34</sup> Tjume e ndo rey xronfache ndo sen ste ndatsjonxin jian: “Xrokujinta ti juinchenchaonnta Ndotána ixi tsaye enta ti juentakiton annta ndo, ti juinchéña ndo nchakon xrangíxixión kóna nunte xasintajni,

---

**25:29** Mt. 13:12; Mr. 4:25; Lc. 8:18.  
13:28. **25:31** Mt. 16:27; Mt. 19:28.

**25:30** Mt. 8:12; 22:13; Lc.



<sup>35</sup> Ixi kuen enna jinta ko ja anta chjánanta juiné, ko kuen enna inda ko kuajonnta nge e kui i, kuaji xranchi naa chujni kuixin ikjín ko ja anta kuajonnta ti no jokéna.

<sup>36</sup> Ko chonda i nge e tsaria ko ja anta juinchekit-siininta, ko konína ko ja anta juasotsjenaninta, ko ndo achjiso bake é ko juasonta bikitsjenanta.”

<sup>37</sup> Ko tjume e sen nche e jian ndachro sen: “Nchána, ¿ngisa bikona kuen ennta jinta ko kuajonna nge e juntenta?, ko, ¿ngisa bikona ixi kuen ennta inda ko kuajonna nge e kui inta?

<sup>38</sup> ¿Ko ngisa bikonanta xranchi naa ni kuixin ikjín ko kuajonna ti no joká anta? ¿Ko ngisa bikona ixi chonda inta nge e tsarianta ko jan anna juin-takitsananta?

<sup>39</sup> ¿Ko ngisa bikona koni anta o bake enta ndo achjiso ko juasotsja ananta?”

<sup>40</sup> Ko ndo Rey xrondachro ndo: “Nduaxin ntatjunta nchakon bingijnanta naa sen kichu-unta, sen ícha nóa, me e xranchi xrobingijnaninta jan an.”

<sup>41</sup> Tjume e ndo Rey kaxon xrondache ndo ni ste ndatsjonxin ikjon: “Ja anta ti yamanta ijie, satjixinnta ti ritjén jan an ko itjinta ti jii xro i nai a tsanga jichón en xrohexin Xixron anxrée ko kain ni ángel ne e xa.

<sup>42</sup> Ixi kuen enna jinta ko ja anta kuajon anta juiné ko kuen enna inda ko kuajon anta inda kui i.

<sup>43</sup> Kuaji xranchi naa ni kuixin ikjín ko ja anta kuajon anta ti no xrojukéna ko kuachonda i manta tsaria ko ja anta xro an nge e chjánanta tsaritsa a, konína ko bake é ndo achjiso ko ja anta juaso anta tsjenanta.”

<sup>44</sup> Tjume e je e n̄a kaxon xrondachro n̄a: “Nchána, ¿ngisa bikona ixi kuen ennta jinta ko kuen ennta inda ko tja inanta, ko xranchi ni kuixin ikjín ko chonda inta nge e tsarianta ko ni anta ko jija anta ndo achjiso ko jan anna bingina inanta?”

<sup>45</sup> Tjume e Ndo Rey ja in tsjate e ndo: “Nduaxin ntatjunta ixi siá bingijna inta naa chujni kichu-unta, naa ni ícha nóa, me e xranchi jan an xro-juinchenaninta.”

<sup>46</sup> Ko ni ña i satsji n̄a ti no tsikaon n̄a kain nchakon. Ko sen jian nche e itsji sen ti tsechón sen kain nchakon —jaña chronga ndo Jesús.

## 26

*Ni ningakon en ndo Jesús juao n̄a xranchi naat-sóñaxón n̄a ndo*

*(Mr. 14:1-2; Lc. 22:1-2; Jn. 11:45-53)*

<sup>1</sup> Juexin chronga ndo Jesús kain ji i, tjume e nichje e ndo sen teyuu chrikao ndo, ko ndachro ndo:

<sup>2</sup> —Ja anta no anta ixi titjáña yuu nchakon tsaxi kia pascua ko Chjen en ndo Dio, xjan jongí e xranchi chujni, tsajon n̄a xjan ixi tsenito n̄a xjan ntacru.

<sup>3</sup> Tjume e kain xitaana ícha tetuan an ko xi tjako ley ne e ndo Dio ko xi tachríi tetuan an tjajna judío, jua o kichuu xa ti ntasien ndo a xitaana ícha tetuan an ndatin in Caifás.

<sup>4</sup> Ko nti a juao n̄a xranchi sincheye e n̄a ndo Jesús ko xrotsé n̄a ndo ixi tjaun n̄a naatsóñaxón n̄a ndo.

<sup>5</sup> Ko kaxon ndachro n̄a:

—Kain nchakon tsonchrjen en kia, xro an nge e sinchekuuna xi Jesús ixi batsoñao chujni tjanya.

*Naa nchri bingamá nchra ndo Jesús inda chaxro xraxe*

*(Mr. 14:3-9; Jn. 12:1-8)*

<sup>6</sup> Ndo Jesús jii ndo tjanya Betania ndo a ndo Simón, ndo kuachóna chinlepra.

<sup>7</sup> \*Me e konchjiñe e naa nchri ngajin ndo Jesús, ko bika o nchra naa xroxrao jitjiá inda chaxro xraxe, nda me e tsango tjintee nda. Tjume e je e nchra bingamá nchra nda ngata a jaa ndo.

<sup>8</sup> Ko sen teyuu chrikao ndo Jesús, hora bikon sen nge e juinche e nchra, tsango koñao e sen nchra ko ndachro sen:

—¿Sonda juinche xienxian inda xraxe ña?

<sup>9</sup> Cháña xrokúchji nda ko kueya tomi xrokuajon na ixi je e nda ko tomi me e xrochjeye e ni nóa.

<sup>10</sup> Ndo Jesús kuin en ndo nge e stendache sen nchra, me e ndachro ndo:

—¿Sonda toñao enta nchra? Ti juinche e nchra ngajin, me e naa ixra tsango jian.

<sup>11</sup> Sen nóa kain nchakon xrochondanta sen, ko jan an íse a tsake e ngajinnta.

<sup>12</sup> Ixi ti bingamána nchra inda chaxro xraxe, me e xrondachro juinchekonchjianna nchra ixi xroxrabaana.

<sup>13</sup> Ko nduaxin ntatjunta ixi nchakon tsin en chujni chijnina nguixin ngata a nunte xasintajni, kaxon xroxraxaon na ixi je e nchra bingamána nchra nda chaxro xraxe.

*Xi Judas juinchekji xa ndo Jesús*

*(Mr. 14:10-11; Lc. 22:3-6)*

<sup>14</sup> Tjume e naa xi teyuu chrikao ndo Jesús, ndatin in xa Judas Iscariote, ikjui xa kuitsje e xa xitaana ícha tetuan an

<sup>15</sup> ko ndachro xa:

—¿Ngijan in xrochjánana ko jan an tsingijna xrotséna ndo Jesús?

Ko xitaana tetuan an juenga xa na ngajin xi Judas, ní ite\* tomi chika plata.

<sup>16</sup> Ko nchakon me e kuaxi xi Judas tjée xa ngiora tsajon xa ndo Jesús ngajin na.

*Ndo Jesús ko sen teyuu chrikao ndo juine sen kónkjín me e*

*(Mr. 14:12-25; Lc. 22:7-23; Jn. 13:21-30; 1Co. 11:23-26)*

<sup>17</sup> Nchakon xrangíxixín kia ne e nutja chonda i nge e tjainxin nio, sen teyuu chrikao ndo Jesús konchjiñe e sen ngajin ndo ko ndachro sen:

—Ndachronta, ¿no tjaunnta tsonchjian sinexinna nutja kia Pascua?

<sup>18</sup> Tjume e je e ndo ndachro ndo:

—Itjinta tjajna ijié, ndo a naa xi ko ja in ndachenta xa: “Ndachro ndo nchekuannana: Íse a tsake e ngata a nunte xasintajni, méxin nchanduya tja on sineki an sen ntakuan an ti nutja kia Pascua.”

<sup>19</sup> Ko sen teyuu chrikao ndo Jesús juincheckonchjian sen ti sine sen kia Pascua xranchi je e ndo kuituan an ndo.

<sup>20</sup> Hora kontie ndo Jesús bake ekao ndo sen teyuu ti jii mesa,

<sup>21</sup> ko xra stene sen, je e ndo ndachro ndo:

---

\* **26:15** *ite* diez

—Nduaxin xrontatjunta ixi naa ja anta tsajon-ninta ngajin ni ningakonna.

<sup>22</sup> Ko me e juincheni e aséen sen ko ngujngu sen teyuu chrikao ndo kuaxi ndachro sen:

—Nchána, ¿á jan an sinta a jaña?

<sup>23</sup> Ko je e ndo juatingíexin ndo:

—Ngisen nekian ngaya latona, me e sen sinchekjina.

<sup>24</sup> Ko nduaxin Chjen en ndo Dio, xjan jongí e xranchi chujni, tsen en xjan xranchi nichja xroon chijnie ndo Dio, ko lastu xi sinchekji xjan. Cháña xi me e xrojongíe a xa ngata a nunte xasintajni.

<sup>25</sup> Ko ndachro xi Judas, xi sinchekji ndo Jesús:

—Ja anta ti nchekuannaninta, ¿á jan an sintakjinta?

Ko ndachro ndo Jesús:

—Ja a ndachrua.

<sup>26</sup> Ko xrastene sen, ndo Jesús itsé ndo naa nutja ko kuajon ndo juasaya ngajin ndo Dio. Tjume e konchrinjin ndo nio ko konchjeya ndo nio ngajin sen chrikao ndo ko ndachro ndo:

—Itsenta nutja ko intenta nio, ixi nutja ji in xranchi xrokjui cuerpona.

<sup>27</sup> Tjume e itsé ndo naa vaso jitjiá ndée tu uva ko kuajon ndo juasaya ngajin ndo Dio ko chjée ndo sen ko ndachro ndo:

—Tin innta kainnta

<sup>28</sup> ixi ji in ndée tu uva me e xrokjui xranchi jnina, jnī konchjianxin ley natjúá, ko tsintji jnī kondeexin itsjé chujni ko jaña tsoméxin ti ndako a juinche e na.

<sup>29</sup> Ko jai ntatjunta ixi ítsi a ndée tu uva íjngo, ti tsijija nchakon tsojuna ti jii juachaxin tetuan an

ndo Dio. Ko nchakon me e tsi i ndée tu uva natjúá íjngo.

*Ndo Pedro xrondachro ndo chúxin a ndo ndo Jesús*

*(Mr. 14:26-31; Lc. 22:31-34; Jn. 13:36-38)*

<sup>30</sup> Ko juexin itsje sen naa soon, tjume e sakuin-tekji sen ijna Olivo.

<sup>31</sup> Nti a ndachro ndo Jesús:

—Tiie jai kain ja anta íxrochuntia ininta ixi ndachro xroon chijnie ndo Dio: “Sintani a ndo tingatjia kutuchjon ko kutuchjon xrochjeke e ba.”

<sup>32</sup> \*Ko nchakon xroxechónna tsitao annta itsjina nunte Galilea.

<sup>33</sup> Ko ndo Pedro ndachro ndo:

—Maski kain sen tsintu anta sen, jan an na i.

<sup>34</sup> Ko ndo Jesús juatingélexin ndo:

—Nduaxin xrontatjua ja a tiie jai, xraxrotsje a kuntaxichíká ní vez, ja a xrondachrora ixi chuxin ana.

<sup>35</sup> Ko ndachro ndo Pedro:

—Maski naatsóñaxónna na, jan an xron-dachrjan i chuxin anta.

Ko kain sen chrikao ndo jaña ndachro sen kaxon.

*Ndo Jesús nichje e ndo Ndotée ndo ti jii ijngi Getsemaní*

*(Mr. 14:32-42; Lc. 22:39-46)*

<sup>36</sup> Tjume e kuiji ndo Jesús ko sen chrikao ndo ti jii naa huerto ndatin in Getsemaní ko ndache ndo sen:

—Nti i tinteenta ko jan an itsji xronichja a Ndotána.

37 Tjume e sabikao ndo ndo Pedro ko yui chjen en ndo Zebedeo ko tsango kuaxi koni e aséen ndo.

38 Ko ndache ndo sen:

—Tsango jitoni e aséenna xranchi ti xrokue enna. Ja anta nti i tituan anta ko tarichrin anta.

39 Ko sakjui ndo ícha kjínxin ko bake exin ntatuchi in ndo ko kuisée ndo ti ngata a inche ko ja in nichje e ndo ndotée ndo:

—Ndotána, siá chao, tájonnta juachaxin ixi tsi a ti tsango itsjá jitjiá copa ji i. Ko ntatjunta ixi tsoen a xranchi jan an tja on. Na i. Ja anta nche enta xranchi ja anta tjaunnta.

40 Ko tjume e ikjan ndo Jesús ti no kuintu e ndo sen ko je e sen stejua sen. Ko ja in ndache ndo ndo Pedro:

—¿Á jua i kuarichonnta naa hora?

41 Nichje enta ndo Dio ko tarichrin anta ixi jaña sinchengachrue a Xixron anxrée asáanta ixi espírituanta tjée ndo Dio ko ntau anta tjaun a.

42 Tjume e sakjui ndo íjngo ko ó yuxin kuinóatée ndo ngajin Ndotée ndo, ko ndachro ndo:

—Ndotána, siá xrokonda tsi i ti itsjá jitjiá copa ji i ko jaña tjaun ja anta, jan an tsitika on.

43 Ko ikjan ndo ti no ste sen ko je e sen stejua sen ixi tsango chjé e sen kotachrin.

44 Ko sakjui ndo íjngo ko nínxin nichje e ndo Ndotée ndo ko xraje o kuinóatée ndo.

45 Tjume e ikjan ndo ti ste sen chrikao ndo ko ndachro ndo:

—¿Á xrarichrinnta ko stetjoka anta? Ó kuitja hora Chjen en ndo Dio, xjan jongí e xranchi chujni, tsajon nā xjan ngaya itja chujni ña i.

<sup>46</sup> Tingatjennta sachjina ixí ó kuij xi sinchekjina ko jai tsajonna xa.

*Xraxin in nā ndo Jesús ndo achjiso*

*(Mr. 14:43-50; Lc. 22:47-53; Jn. 18:2-11)*

<sup>47</sup> Ko xrajnichjao ndo Jesús, kuij xi Judas, naa xi teyuxin chrikao ndo, ko tsango itsjé chujni bika o xa, ni stejá ntāa ko chika espada, ni me e tsixrua an xitaana tsango tetuan an ko ni tachríi ne e tjanya judío.

<sup>48</sup> Ko xi Judas, xi juinchekji ndo Jesús, ja in tsindache xa nā:

—Xi tsetoxin jan an, me e xi xrotsénta.

<sup>49</sup> Tjume e konchjiñe e xa ngajin ndo Jesús ko ndachro xa:

—¿Á chao ritjennta, ja anta ti nchekuannaninta?

Ko kuętoxin xa ndo.

<sup>50</sup> Ko ndo Jesús ndachro ndo:

—¿Nge e tjauan ja a, xi tjento jan an?

Ko tjume e konchjiñe e nā itsé nā ndo.

<sup>51</sup> Ko naa sen teyuu chrikao ndo Jesús kuantsje xa chika espada ko konchrinjin xa ndatsjon naa xinchexrée xitaana tetuan an.

<sup>52</sup> Ko tjume e ndachro ndo Jesús:

—Xraxi ian chika ñā ngaya tjue é chika, ixí kain sen tjayaxin chika espada, chika espada tsenxin sen kaxon.

<sup>53</sup> ¿Nge e chrua ja a, á jua i tsjánchá a Ndotána ko je e ndo xroxruanna ndo teyuu ejército sen ángel?



54 Ko siá xrokuii sen ángel, jaña íxrokuen a ti nichja xroon chijnie ndo Dio ó seno.

55 \*Tjume e ndo Jesús ndache ndo ni kuii itsé ndo:

—Ja anta ya anta ntaa ko chika espada xranchi xrotsénta naa xiche e. Ngujngu nchakon bake e ngaxin in ni ngo ixi ntakuan annta ko tsé aninta.

56 Ko kain ji i jaña xrokonda tson en, ixi jaña chronga sen tsikjin xroon chijnie ndo Dio ó sa ó.

Tjume e kain sen chrikao ndo Jesús sabinga sen ko je o ndo kuitu e ndo.

*Bikao na ndo Jesús ngajin ni nchéña ijie*

(Mr. 14:53-65; Lc. 22:54-55, 63-71; Jn. 18:12-14, 19-24)

57 Tjume e ni tsé ndo Jesús bikao na ndo ngajin xitaana ícha tetuan an ndatin in Caifás, ko nti a ste kain ni tjako ley ne e ndo Dio ko xi tetuan an ni ngo.

58 Ko ndo Pedro imao jirué e ndo ko kuiji ndo ti ntasien ndo a xitaana tetuan an ko hora kuixin in ndo nti a, bake e ndo tjenka ti ste xi stendáa nti a ixi tjaun ndo xrotsje e ndo nge e tson en.

59 Ko xitaana ícha tetuan an ko xi tachríi, ni me e tjaun na tsjankata a na ndo Jesús ijie maski nduaxin a ti ndachro na ixi tjaun na naatsóñaxón na ndo.

60 Ko xro an ti ndako a kuitja na, maski kuiji kueya chujni juangí e na ndo. Ko ni me e ncheya na, ko tjume e kuii íjngo yuu ni nduaxin a nichja,

61 \*ko ndachro na:

—Xi Jesús ji i kuin anna ndachro xa: “Jan an chao tsonchjejin ningue ndo Dio, ko je o ní nchakon sintakonchjianxin ni ngo íjngo.”

<sup>62</sup> Ko xitaana ícha tetuan an bingatjen xa ko juanchangi e xa ndo Jesús:

—¿Á tsjatee a ti nge e ichro ni tjangi a?

<sup>63</sup> Ko ndo Jesús nichja i ndo. Ko ndachro xitaana ícha tetuan an:

—Jan an tituan an ixi nombrée ndo Dio, ndo jichón, ixi xronchijiana, ¿á ja a ndo Cristo, Chjen en ndo Dio?

<sup>64</sup> Ko ndo Jesús ja in juatingíexin ndo:

—Ja a ndachijiana jaña. Ko jan an kaxon xrontatjua ixi jai tsaxi tsikonnta Chjen en ndo Dio, xjan jongí e xranchi chujni, tsake e xjan ndatsjonxin jian ti jii ndo Dio, ndo tsango tituan an, ko tsikonnta xjan tsí xín xjan ngajní ngakjen en itjui.

<sup>65</sup> Ko xitaana ícha tetuan an, tsango koñao xa ko kuinchje xa manta jitsáa xa ko ndachro xa:

—Xi i tsango nichjangí e xa ndo Dio. ¿Nge e ícha tjaunnta tsin ennta? Íxrokonda i xi tangi. Ti kuin enna nichjangí e xa ndo Dio, ixi me ó.

<sup>66</sup> ¿Nge e ichro ja anta?

Ko ni kaxin ja in juate e nã:

—Xi i chóna xa ijie, xrokonda tsen en xa.

<sup>67</sup> Tjume e kuaxi nã bikitée nã ndo ndatée nã ngaya ikon ndo ko ikaxin nã kuande e nã iton ikon ndo.

<sup>68</sup> Ko ndachro nã:

—Siá nduaxin ja a ndo Cristo, ndachrua ngisen kuanda a iton.

*Ndo Pedro ndachro ndo ixi chúxin a ndo ndo Jesús*

*(Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Ko ndo Pedro jii ndo ti jii ntasién nchia, ko konchjiñe e naa nchri nche e ixra nti a ko ndachro nchra:

—Ja a kaxon kuajiku a xi Jesús, xi nunte Galilea.

<sup>70</sup> Ko kain ni ste nti a kuin en na nge e juate e ndo Pedro:

—Jan an chuxin a xi ña.

<sup>71</sup> Tjume e ndo Pedro kuachrje ndo nduja ko tjenga ntachja inaa nchri bikon nchra ndo ko ndache nchra kain ni ste nti a:

—Xi ji i kaxon chrikao xa xi Jesús ne e tjajna Nazaret.

<sup>72</sup> Tjume e ndo Pedro ndachro ndo íjngo ixi je e ndo chúxin a ndo ndo Jesús:

—Ndo Dio no e ndo ixi jan an chuxin a xi ña.

<sup>73</sup> Ko nchion tjume e ni ste nti a, konchjiñe e na ti jii ndo Pedro ko ja in ndachro na:

—Ja a nduaxin kuajiku a xi Jesús ixi kaxon nichja xranchi je e xa.

<sup>74</sup> Ko ndo Pedro kuaxi benga ndo teka ko ndachro ndo:

—Jan an chúxin a xi ña.

Ko hora me e itsje kuntaxichíká.

<sup>75</sup> Ko ndo Pedro xraxaon ndo ti nichja ndo Jesús: “Ko xraxrotsje a kuntaxichíká ní vez, ja a xrondachrua ixi chuxin ana.” Tjume e ndo Pedro kuachrje ndo nduja ko tsango tsjanga ndo.

## 27

### *Bikao na ndo Jesús ngajin xi Pilato (Mr. 15:1; Lc. 23:1-2; Jn. 18:28-32)*

<sup>1</sup> Ko ngasáña, kain xitaana tetuan an ko xi tachríi tetuan an tjajna judío juao kichuu xa xranchi sinche e xa ixi naatsóñaxón xa ndo Jesús.

<sup>2</sup> Ko kuintexin na ndo Jesús ino ko bikao na ndo ngajin xi Poncio Pilato, xi tetuan an kuixín tjajna Roma.

### *Kuen en xi Judas*

<sup>3</sup> \*Tjume e xi Judas, xi tsijincheckji ndo Jesús, bikon xa ixi naatsóñaxón na ndo, me e juincheni e aséen xa, ko ikjui xa bijincheckjan xa ti níite tomi chika plata tsikayé e xa, ti kuajon xitaana tsango tetuan an ko ni tachríi.

<sup>4</sup> Ko ndachro xa:

—Jan an ndako a junta a ixi juntakji naa xi tsango jian.

Ko je e na juate e na:

—Jan anna kondana ina me e. Ja a no a nge e nche e.

<sup>5</sup> Tjume e xi Judas juanka xa tomi chika plata ngaxin in ni ngo ko sakjui xa kuisintjianxin xa ixi ino tusin xa.

<sup>6</sup> Ko xitaana tetuan an juejo xa tomi ko ndachro xa:

—Tomi ji i jua i tsake e na tomi ngaya ti tinga ofrenda, ixi tomi ji in yaa tomi jnié chujni.

<sup>7</sup> Ko juao na kondee tomi, tjume e kue na na naa ijngi ndatin in Nunte xi Nchéña Ichi ixi nti a tsjabaa na chujni tsikí xin inaa tjajna.

<sup>8</sup> Ko nchakon jai jaña tin in nunte me e: Nunte Chón<sup>da</sup> Ij<sup>ni</sup>.

<sup>9</sup> Jaña kon en nge e tsikjin ndo Jeremías, ndo kuachronga chijnie ndo Dio ó sa ó: “Kua n<sup>a</sup> ní ite tomi chika plata, tomi xengaxin n<sup>a</sup> xixi xi kuen en, (ñ<sup>a</sup> ti tsindachro ni tjajna Israel tjintee xa),

<sup>10</sup> tomi me e kuenaxin n<sup>a</sup> nunte ndatin in xi Nch<sup>é</sup>ña Ichi, xixi jaña kuituanna Nch<sup>á</sup>ina.”\*

*Xi Pilato juanchangi e xa ndo Jesús*

*(Mr. 15:2-5; Lc. 23:3-5; Jn. 18:33-38)*

<sup>11</sup> Ndo Jesús jii ndo ngajin xi ícha tetuan an ko ja in juanchangi e xa ndo:

—¿Á ja a Rey ne e ni judío?

Ko ndo Jesús ndachro ndo:

—Ja a ndachrua.

<sup>12</sup> Ko kain xitaana tetuan an ko xi tachríi tetuan an tjankata a n<sup>a</sup> ndo iji<sup>e</sup> ko je e ndo Jesús xro an nge e juate e ndo.

<sup>13</sup> Tjume e xi Pilato juanchangi xa:

—¿Á kuin en kain nge e ichro n<sup>a</sup>, juinche e?

<sup>14</sup> Ko ndo Jesús xro an nge e juatingí<sup>e</sup>xin ndo, méxin xi tetuan an xronka xa ko noe a xa nge e sinche e xa.

*Stetoyako n<sup>a</sup> xixi tsen en ndo Jesús*

*(Mr. 15:6-20; Lc. 23:13-25; Jn. 18:38–19:16)*

<sup>15</sup> Ko kia Pascua xi tetuan an ngujngu nano bakajanda xa naa xi jixin in ndo achjiso, naa xi tjaun chujni tsachrje.

<sup>16</sup> Ko xi jii ngaxin in ndo achjiso, naa xi tsango ñ<sup>a</sup> i, ndatin in Barrabás.

---

\* **27:10** *Nch<sup>á</sup>ina* Señor *Nch<sup>á</sup>ina* Jesús *o* *Nch<sup>á</sup>ina* Dio

17 Ko nti a ste itsjé chujni, tjume e xi Pilato juanchangi e xa n̄a:

—¿Ngisen tjaunnta tsajanda, á xi Barrabás o xi Jesús nchekin innta Cristo?

18 Ko xi Pilato no e xa ixi tsango tochjuye e n̄a ngajin ndo Jesús, méxin tjaun n̄a tsen en ndo.

19 Ko xi Pilato jita a xa xitaon ti no tonchjianxin ijię ko nchrinchri e xa tsixrua an nchra naa juajna ngajin xa:

—Xro an nge e nchekua ndo Jesús ixi tsango tjúá aséen ndo ixi nakonkjin tsango chinga kuxinaxin kondee je e ndo.

20 Ko xitaana tetuan an ko ni tachríi tetuan an juincheckateya n̄a chujni ixi tsjanche e n̄a xi Pilato tsajanda xa xi Barrabás ko naatsóñaxón n̄a ndo Jesús.

21 Ko tjume e xi Pilato íjngo nichje e xa kain chujni ste nti a ko ndachro xa:

—¿Ngisen tjaunnta tsajanda?

Ko je e n̄a juatingíexin n̄a:

—Tajanda xi Barrabás.

22 Tjume e xi Pilato juanchangi xa:

—¿Nge e sintakian xi Jesús, xi nchekin innta Cristo?

Ko kain n̄a kuyako n̄a:

—¡Tjankanitua xa nt̄acru!

23 Tjume e xi Pilato ndachro xa:

—¿Me nge e junta anta xi ji in?

Ko je e n̄a ícha séen kuyako n̄a ko ndachro n̄a:

—¡Tjankanitua xa nt̄acru!

24 Ko xi Pilato bikon xa ixi chujni ítitikaon a n̄a nge e ichro je e xa ixi je e n̄a ícha kuyako n̄a, méxin

juanchia xa inda ko juné ma itja xa ko kain me e stetikon chujni ste nti a ko ndachro xa:

—Jan an tsama i ijie ti tsen en xi ji i, ixi xro an nge e sínká xa. Ja anta ti tsamanta ti tsen en xa.

<sup>25</sup> Ko kain chujni ste nti a ja in juatingíexin n̄a:

—Jan anna ko chjan n̄ana tsamana ijie ko jnié xi ña.

<sup>26</sup> Ko tjume e xi Pilato kuantsje xa xi Barrabás ko kuetuan an xa ixi tsikaon ndo Jesús ko tjume e tsjankanito n̄a ndo nt̄acru.

<sup>27</sup> Ko xi soldadoe xi Pilato bikao n̄a ndo Jesús ti jii ntasién nchia tituanxin n̄a ko nti a xejo kain xi soldado.

<sup>28</sup> Tjume e kuantsje e n̄a ndo manta jiá ndo ko juinçekake e n̄a ndo naa manta játsetié.

<sup>29</sup> Ko b̄ake e n̄a ngata a jaa ndo naa corona tsikonchjianxin nt̄acha a ko b̄ake e n̄a ngaya itja ndo ti ndatsjonxin jian naa ntakuto. Ko tjume e take exin ntatuchi in n̄a ko tjanoa n̄a ndo ko ndachro n̄a:

—Kain nchakon tsake e, ndo rey tituen en ni judío.

<sup>30</sup> Ko tikitée n̄a ndatée n̄a ngaya ikon ndo ko itsé n̄a nt̄aa jiá itja ndo, me e tande e n̄a nt̄aa jaa ndo.

<sup>31</sup> Ko juexin juano n̄a, tjume e kuantsje e n̄a ndo manta játsetié ko juinçekitsa n̄a ndo mantée ndo. Tjume e bikao n̄a ndo ixi tsenito n̄a ndo nt̄acru.

*Kuasintjian n̄a ndo Jesús ko nti a kuen en ndo  
(Mr. 15:21-32; Lc. 23:26-43; Jn. 19:17-27)*

<sup>32</sup> Ko hora stetachrjeka o n̄a ndo Jesús, nti a jii naa xi tjajna Cirene, ndatin in xa Simón, ko

kuetuen en n̄a xa tsama xa nt̄acru ti no tsake e n̄a ndo Jesús.

<sup>33</sup> Ko ti kuiji n̄a ti no ndatin in Gólgota, (me e xrondachro Ntajaa ni tsiken en).

<sup>34</sup> Nti a chjée n̄a ndo Jesús tsi i ndo nchíín vina-gre tsikintekjanxin xrōan tsjá ko je e ndo tsjexion ndo xrōan me e, ko kui a ndo.

<sup>35</sup> Hora juexin bake e xi soldado ndo Jesús ngan-ito nt̄acru, tjume e sondaonxin xa ixro ixi jaña tsono e xa ngisen tsjacha tsitue e manta jíá ndo ixi jaña tson en xranchi tsinichja sen kuachronga chijnie ndo Dio ó sa ó, ko ja in tsindachro sen: “Chj-eye e n̄a mantána ko sondaonxin n̄a ixro ngata a manta.”

<sup>36</sup> Tjume e xi soldado nti a kuitu e xa ixi tsendáa xa ndo Jesús.

<sup>37</sup> Ko bake e n̄a naa nt̄aa ícha noixin ti jii jaa ndo, nti a jitaxin nge e kondeexin kóña n̄a ndo:

“Ndo Jesús, ndo Rey tikinixin en ni judío.”

<sup>38</sup> Kaxon kuenito n̄a yuu xiche e nganito nt̄acru, naa xa ndatsjonxin jian ko í naa xa ndatsjonxin ikjon ti jii je e ndo.

<sup>39</sup> Ko ni stetatsinga nti a chinga ndache n̄a ndo ko nchetengi jaa n̄a,

<sup>40</sup> \*ko ndachro n̄a:

—Ja a ndachrua ixi tsonjamangia ni ngo ko níiko nchakon sinchekonchjian ni ngo íjngo, cháña xingajinxian nt̄aa ñ̄a siá nduaxin ja a Chjen en ndo Dio.

<sup>41</sup> Kaxon xitaana tetuan an ko xi tjako ley ko xi fariseo ko ni tetuan an tjajna, kain n̄a juanoa n̄a ndo Jesús, ko stetjao n̄a:



42 —Ikaxin na bingijna xi ña ko je e xa jua i xingajinxin xa ntacru. Siá je e xa Rey ne e ni Israel, ko siá xroxingajinxin xa ntacru, me e tsitika onna xa.

43 Je e xa chúntia xa ngajin ndo Dio, je e ndo tsingijna ndo xa siá nduaxin je e ndo Dio tjue e ndo xa ixí je e xa ndachro xa: “Jan an Chjen en ndo Dio.”

44 Kaxon xiche e stenito ntacru chinga ndache xa ndo Jesús.

*Kuen en ndo Jesús*

*(Mr. 15:33-41; Lc. 23:44-49; Jn. 19:28-30)*

45 Ko xrangusine nchakon ko kuiji hora nínxin konaxixe e ngata a nunte xasintajni.

46 Ko hora me e ndo Jesús séen ndachro ndo:  
—Elí, Elí, ¿lama sabactani? —ji i xrondachro: Ndotána, Ndotána, ¿sonda jan on kuintunaninta?

47 Ko kaxin ni ste nti a kuin en na nge e ichro ndo, me e ndachro na:

—Ndo kuanichjaxin chijnie ndo Dio, ndo Elías jitiye e xi Jesús.

48 Ko naa xi jii nti a itsé xa naa manta ko juinchetjao xa vinagre ko baķe e xa ikon naa ntasé ko chjée xa ndo Jesús xrokui i ndo.

49 Ko ikaxin ni ste nti a ndachro na:  
—Chon én, tsikonna á tsii ndo Elías tsingijna ndo xi Jesús.

50 Tjume e ndo Jesús séen kuyako ndo íjngo, ko me e juexin kuen en ndo.

51 Ko hora me e kaxon velo jii ngaxin in ni ngo ti jingakuenxin luga tsango tjúá, chrinjin ngusinexin xrangíxixión noi hasta ti nunte. Ko hora me e kontengí nunte ko chjenga ixro.

<sup>52</sup> Ko xitje e tuye ti xrabaa chujni ko itsjé sen tsikitikaon ndo Dio, sen tjúá aséen, xechón sen.

<sup>53</sup> Nchakon xechón ndo Jesús, tjume e sen xechón, kuji sen tjajna Jerusalén, tjajna tjúá, ko nti a itsjé chujni bikon ixi je e sen tsixechón sen.

<sup>54</sup> Ko xi centurión ko xi soldado jindaa ndo Jesús, bikon xa ixi kontengí nunte ko kain nge e kon en, tsango xronka xa, ko ndachro xa:

—Xi ji i nduaxin Chjen en ndo Dio.

<sup>55</sup> \*Ko kjínxin stetsje e kueya nchri, nchri tsirue e ndo Jesús tsiki xin tjajna Galilea, nchri me e kuayakon en ndo hora bika o na ndo.

<sup>56</sup> Ngakjen en ni ste nti a jii jan María Magdalena ko jan María, janée ndo Jacobo ko ndo José, ko janée chjen en ndo Zebedeo.

*Ndo Jesús xrabaa ndo*

*(Mr. 15:42-47; Lc. 23:50-56; Jn. 19:38-42)*

<sup>57</sup> Hora kontie, kuji naa xi chóna tsango itsjé tomi, kuixin tjajna Arimatea, xi me e ndatin in xa José. Kaxon xi me e juinchekuen en ndo Jesús xa.

<sup>58</sup> Ko xi José ikjui xa ngajin xi Pilato, bijanchia xa cuerpoe ndo Jesús ko xi Pilato kuajon xa juachaxin.

<sup>59</sup> Tjume e xi José ikjui xa ko kuajin xa ndo Jesús ko kuintsia xa ndo naa manta tjúá.

<sup>60</sup> Ko baje e xa cuerpoe ndo ngaya naa tuye natjúá tsikoña nganito naa itjao ko kuincheka xa naa ixro ijié bijeexin itjao ko tjume e sakjui xa.

<sup>61</sup> Ko nti a jii jan María Magdalena ko inaa jan María, ste sen nunte ti jii tuye.

*Xi soldado jindaa tuye jixrabaa ndo Jesús*

<sup>62</sup> Ko ndúyaxin ti nchakon tjoké e sen tjajna Israel, xitaana tetuan an ko xi fariseo kuitsje e na xi Pilato

<sup>63</sup> \*ko ndachro na:

—Jan anna stexraxa onna ixi xi Jesús, xi kuancheya, ti xra jichón xa ndachro xa: “Nchakon tsen enna, jan an xroxechónna nchakon nínxin.”

<sup>64</sup> Méxin, xruan an xi soldado tsendáa xa tuye kaníi nchakon, ixi ba tiie tsii ni bajikao xi Jesús ko tsee na cuerpoe xa ko tjume e xronache na chujni tjajna ixi xechón xa. Ko me e ícha tsitikaon na xi Jesús.

<sup>65</sup> Tjume e ndachro xi Pilato:

—Ña ste xi soldado. Ja anta itjinta ko jian tije enta tuye ti tsijabaa na xi Jesús.

<sup>66</sup> Ko je e na ikjui na ko bake e na naa ixro ijié bijeexin tuye ko bake e na naa seña ngata a ixro ko nti a kuintu e na kaxin xi soldado ixi tsendáa xa tuye.

## 28

### *Ndo Jesús xechón ndo*

*(Mt. 16:1-8; Lc. 24:1-12; Jn. 20:1-10)*

<sup>1</sup> Kuatsinga nchakon tjoké e sen tjajna judío. Xratingasáña i nchakon xrangíxixín semana, kuii jan María Magdalena ko inaa jan María kuitsje e sen ti tsixrabaa ndo Jesús.

<sup>2</sup> Ko hora me e kontengí nunte ixi naa ndo ángel ne e ndo Dio xingajinxin ngajní ko je e ndo kuintjian ndo ixro jijeexin itjao ko bake e ndo ngata a ixro me e.

---

**27:63** Mt. 16:21; 17:23; 20:19; Mr. 8:31; 9:31; 10:33, 34; Lc. 9:22; 18:31-33.

<sup>3</sup> Ko ndo ángel me e tóngíxin ndo ko manta jiá ndo tsango tjúá xranchi chrinta.

<sup>4</sup> Ko xi soldado ste nti a, hora bikon xa ndo ángel, tsango xranga xa ko tjaun xrokuinteken en xa ixi tsango xronka xa.

<sup>5</sup> Ko ndo ángel me e ja in nichje e ndo sen nchri:

—Ja anta sen nchri, xrakon anta. Jan an nóna ixi tjéenta ndo Jesús, ndo kuenxin nganito ntacru.

<sup>6</sup> Ko a ndo nti i, ixi je e ndo ó xechón ndo xranchi chronga ndo ó sa ó. Xrokuiinta ko tsje enta ti no bake e na ndo.

<sup>7</sup> Ko tuinxin satjinta tindachenta sen bajikao ndo ixi je e ndo ó xechón ndo ko je e ndo ó sakuitaon ndo tjajna Galilea. Nti a tsikonnta ndo. Me e ntano anta.

<sup>8</sup> Ko sen nchri kuachrjexin sen ti no tsixrabaa ndo Jesús, ko stexronka sen ko steché e sen. Tjume e nteeto sakjui sen kuichronga sen ngajin sen chrikao ndo Jesús.

<sup>9</sup> Ko je e ndo Jesús konoxin ndo ko kuajon ndo juajna ngajin sen nchri. Ko je e sen konchjiñe e sen ngajin ndo ko joa sen tutée ndo, ko kuajon sen juasie sen.

<sup>10</sup> Tjume e je e ndo ndachro ndo:

—Xrakon anta, ko satjinta tikeki enta sen kichu-una ko itsji sen tjajna Galilea, nti a tsikonxin sen.

### *Ti chronga xi soldado*

<sup>11</sup> Ko hora sakjui sen nchri, kaxin xi soldado jindaa ti tsixrabaa ndo Jesús sakjui xa tjajna Jerusalén kuichronga xa ngajin xitaana tetuan an kain nge e kon en.

12 Tjume e xitaana tetuan an nichje e xa xi tetuan an tjajna ko juao nã ixi xrochjée nã kueya tomi xi soldado.

13 Ko ndache nã xi soldado:

—Ja anta ndachronta ixi ó tiie me e itsenta kotachrin ko stechrinnta, me e kujj ni chrikao xi Jesús, ko kuee nã cuerpoe xa, jaña chronta.

14 Ko siá tsono e xi tetuan an nunte Israel, jan anna xronichja ana xa ixi tsoñao a xa ngajinnta.

15 Ko xi soldado kuayé e xa tomi ko juinche e xa xranchi kuituan an xitaana. Ko ti kon en nchakon me e ni tjajna Israel jaña teki nã hasta ti nchakon jai.

*Ti kuetuan an ndo Jesús*

*(Mr. 16:14-18; Lc. 24:36-49; Jn. 20:19-23)*

16 \*Ko ti tenaá sen chrikao ndo Jesús sakjui sen ijnã nunte Galilea ixi jaña tsiketuan an ndo.

17 Ko hora bikon sen ndo, kuajon sen juasaya ngajin ndo ko kaxin sen xratitikaon a sen ixi á je e ndo o na i.

18 Ko ndo Jesús konchjiñe e ndo ko ndachro ndo:

—Ijié juachaxin chjána ndo Dio ngajni ko ngata a nunte xasintajni,

19 \*méxin, itjinta kain tjajna jii ngata a nunte xasintajni ko nchekuen ennta kain chujni chijnina ixi jaña tsitikaonna nã kaxon. Ko ni tsitikaon, tikitéenta nã ixi juachaxien Ndotána ko nombrée Chjen en ndo ko Espíritue ndo.

20 Ko nchekuen ennta sen ixi tsitikaon sen kain nge e kuetuan an. Ko jan an tsake e ngajinnta kain

nchakon hasta tsjexinja nunte xasintajni. Jaña  
tson en.

**Chijnie ndo Jesucristo  
Popoloca, San Luís Temalacayuca: Chijnie ndo  
Jesucristo New Testament**

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source files  
dated 29 Jan 2022

ee37a138-f1b9-51ef-b60f-e89d6de4d06f